

DITÈÈKIIBWA ²



Ndi . . . anu pashiishe ndambu. Mwawa ne muntu kampanda uvwa wa ciputuku, ciputuku cya dikema, kadi pààbì bìvwa bikèngela bwa mèmè kuya pa diine dîbà adi, bwalu ùvwa bibi, bibi be. Ki mèmè kwendesha kashinyi njila mujima kuumukila ku Michigan, munene wa bampulushi ùvwa mubiikile, ne bikwabo, bwa ne yèyè ùvwa bibi, bibi be. Mpindyewu, kadi's nebilengele; byònsò—byònsò bìdi mu bukòntononyi, pa nanku bìdi bìmpè. Pàdi anu Mukalenge ùbwela, byònsò bìdi mu bukòntononyi dîbà adi, kî mmwòmò anyì? Kaa, Yèyè—Yèyè's mmwìmpè be; patùdi twela meeji ku bwìmpè Bwèndè ne luse Lwèndè, ku mushinga wùdiYe naawu kutùdi, ne mushindu mwine wùdi diMutumbisha ne mushinga's we.

Ee, tudi bateete bwa kubanga, twamba ne tudi bafwànyine kwangata nshapita yisatu ya kumpala ya Mukanda wà Efeso. Ne ndi ngeela meeji ne twangàci myaku yisatu ya kumpala, anyì *bikampanda* bisatu bya kumpala mwaba awu. Katùvwa baye kule menemene to, kadi pàmwàpa bwa diloolo edi tudi mwa kudifilamu ne mbàbi tuya kule ndambu. Mpindyewu, ndi muswe kwamba ne mèmè ncyèna mulongi wa Bible wa ku tulaasa tutumbuke to, nansha wa kànà, ne ndi kule menemene ne kwikala mwena tèòlòjì, kadi ndi—ndi munange Mukalenge, ne ntu munange kuMukwacila mudimu ne . . . [Mwaneetu wa balume kampanda ùdi wàkula ne Mwaneetu Branham—Muf.]

Muntu kampanda, anu mu bwalu bwa lukasalukasa, mwambe, anu kumpala menemene kwa twètù kutungunuka mpindyewu, mwànà wa bakaji mutekete mu lupitaadi lwà mu Louisville, ne bangangabuka bapiluke bònsò bamulekèle, ùdi munkaci mwa kupùnga ne lufu patùdi twakulangana apa, ne ùdi ùlòmba masambila bwa mwànà ewu. Twètù bu beena Kilisto, mmudimu wètù bwa kwinyika mitu, mpindyewu, bwa disambila.

Mukalenge wetù wa ngàsà, kacyèna anu mudimu wètù to, kadi ndyèsè dyetu, ne ndijinga dyetu—dyetu bwa kwinyika mitu diloolo edi twètù bu ekeleeziya, bu kasumbu kàà bantu babìikidiibwe bwa kupatuka, beena kwitabuuja kaaba aka diloolo edi, bwa kulongesha Dìyi Dyebe, diikàle ditushikika mu Mubidi bilondèshìle myaba, yitùdi ne cya kwikala, ne mutùdi mwa kukwacila mudimu pamwe mu mushindu mukùmbàne bu bidimba bya Mubidi wà Kilisto.

² Nenku mpindyewu tudi babìikidiibwe bwa kuya dyakamwe kùdi Nzambi. Ne yònsò wa kutùdi twètù baataatù ùdi ùdyàmbidila ne, bu mwine awu wìkala mwànà mutekete wa bakaji mulela wetù twètù, mushindu mwine wùvwa myoyi

yetu mifwànyine kulakuka kapyà ne kusaama munda mwètù, ne twètù bafwànyine kubiikila maekelēziya ku telefone bwa kwenzawu disambila's. Kadi mwoyi wà taatù kampanda wùdi wùlākuka kapyà, wùsaama. Mukalenge, swaku bwa Mupersona munene wa Nyuma Mwímpè awu alwe anu mpindyewu ku mwoyi wà yèyè taatù awu. Umushaku mpatà yònsò nansha ya mikese, ne disaama dyònsò, nenku enzaku bwa yèyè amanye ne Wèwè udi Nzambi ne kakwenaku disaamà didi mwa kwimana mu Bwikadi Bwebe to pàdi mudimu Wèbè wà kùdi Nzambi mukumbajiibwe kùdi ekeleziya Webè ne cisàmbà Cyebe.

³ Ne bu mùdibi ne munda mwa lumingu lujimà elu, tudi tusambila, kubangila ku dyalumingu dishàale ndi mwele meeji ku mishindu eyi anyi ku bya dikwata naabi mudimu bya disambila ebi. Katwena ne cingoma ciine cya ndolò to bwa ku dimona dya pa buloba, kadi ndundu wa nyuunyi mukese ewu ngwa ùshebeyangana pàdiye mukwaciibwe mu minu ya diitabuuja. Èyi Mukalenge, swaku bwa masambila etu afike ku kiipacila, lufu lùdi lulembèlèle kuulu kwa mwànà awu kuntu kwàka alu, swaku bwa lùsunsudiibwè; mídima, mifitù, yùmukè ku luseke lwà kalaalu kàà mwànà awu, mwànà wa mu diboko anyi mwànà awu, mwànà mutekete wa bakaji awu. Nenku swaku bwa Bukènkè bunene bwa Bwikadi bwa Nzambi bùteemè pambidi pèndè. Swaku bwa àpatukè mu lupitaadi amu, mwànà wa mubidi tumatuma.

⁴ Nzambi, tudi bamanye ne dyàmwàmwa dya musulu dyàdya bananga beetu mbindile, ne mbya butumbi. Kadi tudi banange bânà beetu bakese. Nenku tudi tulomba, Mukalenge, ciine aci bwa butumbi Bwebe, bwa Wèwè ulameku mwoyi wà mwànà awu. Twètù, bu ekeleziya Webe, tudi tutandisha lufu alu, twamba ne: “Shààla mwimane anu kaaba kamwe. Kwèna mwa kwangata mwànà awu nansha, bwalu tudi tunana mwoyi wèndè bwa bwalu bwa Bukalenge bwa Nzambi.” Filaku bintu ebi, Mukalenge, bwa kuyabi buludi ku kiipacila patùdi tubiludika apa, mu Dìna dya Yesu Kilisto, Musungidi wetù. Amen.

⁵ Tudi twitabuuja anyi? Ncyèna mumanye cìmvwà mèmè ewu mufwànyine kwenza to bu nncìvwa mwena Kilisto. Ncìvwaku mufwànyine kutungunuka ne kwikalaku to. Kakwena cintu nansha cimwe cya kwikadila ne mwoyi to, pa kuumusha anu difikisha dya bakwabo ku disungidiibwa, ki cìdi citàmbe bwímpè cìndiku mèmè ewu mumanye.

⁶ Mpindyewu, diloolo edi tudi baswe anu kubanga ndambu dyambulula dya dileesona dyetu dya musangu mushàale. Nenku nènteetè kubala, bwalu, nshapita mujimà awu, bu mèmè ne mushindu diloolo edi. Pa nanku mu dyalumingu mu dinda nebikengela pàmwàpa bwa mèmè kubàmbakaja dyalumingu mu dinda ne diloolo, pìikalàbi bikùmbàne nanku, bwa kuteeta kubwela mu mmwenekelu wa cìndi muswe bwa ekeleziya kumonaye awu. Kaa, s'mbya butumbi bwa wèwè kupeta mwaba

webe! Ne muntu nansha umwe kèna mwa kwenza cintu nansha cimwe pàdiye kàyi mumanye menemene cidiye wènza to.

7 Anjì ambabi tũng bu wêwè ne cya kwikala. . .kupandiibwa, ne kwikàle ngangabuka wa citende mucikàle ùcifuminaku ku dijikija tulaasa twèndè ne yêyè mmufwànyine. . .kacya kàyi mwanjì kupandanganaku to. Nansha mùdibi ne, yêyè nnsongàâlùmè wa citende ne mulenga kwìsù, ne nsuki myela cisaku mifinunuja, ne muvwale mvwadilu wa kapelu, wa mankenda, ne bikwabo byònsò. Bu yêyè mwa kwamba ne: “Ngààmanyi kunoona twele, ne ngàashipi twìshì ne manga ku byamu byònsò bya mudimu ne bikwabo byònsò.” Kadi wêwè’s udi mufwànyine kudyumvwa anu ndambu mushindu kampanda wà mwoyi kuulukuulu pa bwalu abu. Bwànyì mème mbipiciibwe ne mwangate ngangabuka wa kale ukààdikù mupandangane kwònsò eku misangu ne misangu, kumpala kwa ne nya’ nkàadi nswa bwa kungeelabo keele. Ndi—ndi muswe kumanya muntu kampanda wa kàyi ùcìjikijilakù tulaasa to, ndi mèmè muswe muntu kampanda mwikàlekù ne ndambu wa malabula.

8 Nenu Kampanda udi mutàmbe bwìmpè ku malabula ùndiku mèmè ewu mumanye, wa dibìikidisha diloolo edi, n’Nyuma Mwìmpè. Yêyè awu ki Ngangabuka munene ne Mulongeshi munene wa Nzambi.

9 Nenu bu mwaba wà dishindamijila Diyiisha dyànyì diloolo edi, diikàle anu dipàtukila mu diyiisha dya mu dyalumingu, bwa ne bìdi ne, bôbò bààkabènga Samwèlè pamwe ne Dìyì dya Mukalenge, ne bààkiitaba Shawùlà, mwànà wa Kishà awu, ne bààkabènga Samwèlè, mwine uvwa uleeja mpala wa Nyuma Mwìmpè awu, bwalu yêyè ùvwa wàkula anu mùvwà Nyuma ùmulombola mwa kwakulaye. Kadi pààkakòkàye ntema yabo ku cyòci aci, wàkamba ne: “Vùlukàayi ne, kacya mèmè ncitukù munwàmbile cintu nansha cimwe mu Dìnà dya Mukalenge citù Mukalenge kàyikù mukumbaje to. Anyì ncitukù mwendè lwendu lwà muditwale bibi kumpala kwenu to. Ne muntu nansha umwe kèna mwa kumbanda bwa mpekaatu to.”

Bu mwàkambà Yesu ne: “Nganyì udiku mwa kuMbanda bwa mpekaatu?” Nwamonu anyì?

10 Ki kwambaye kabidi, ne: “Ncìtukù mulwe kunùdi bwa kunulomba mfranga ne bikwabo bu kàà pa luse nansha. Ncìtukù munwàngate kantu nansha kamwe to. Kadì byònsò bìnkaadiku mwambe’s bìvwa bwa dyakalenga dyenu, bîntù munutwadile bìpàtukila mukana mwa Mukalenge abi.”

11 Ki cisàmbà cijimà kufilaci bujaadiki ne: “Bwa aci kaayi ncilelela. Byònsò abi mbilelela, kadi tudi anu baswe kwikala ne mfumu. Tudi baswe kwikala mùdì bakwabo bàà pa buloba amu.”

12 Mpindyewu, diloolo edi, Mufundu wètù ndyabanya. . . Mukanda wà Efeso, m’Mukanda wà Yoshùwà wà Dipungila

Dipyadipya. Ndyabanya ne diteeka dya mu bulongame dya “bacimunyi.” Mpindyewu, cidi anu mmwaba wà dishindamijila bitùdì twamba bwa ndambu wa tusunsa cyanààna, bwa kupetaku kaaba kumpala kwa twètù kubanga kubala, kubanga ne mvensa mwi³. Mpindyewu, tudi tusangana mu dyalumingu diloolo dyàshààdi edi ne . . . Nzambi mu Dipungila Dikulukulu wàkapèèsha Izaleela mulayi wà buloba bwa diikisha, bwalu bàkaavwa balwè beena lwendu ne balalakanyi. Nenku bàvwa bàsanganyiibwa mu buloba bùvwà kabùyi bwàbò bòbò to, nenku Nzambi wàkalayila kùdì Abraham ne yèyè neñjì kusòmbela . . . dimiinu dyèndè nedyànjì kusòmbela mu cisàmbà cyenyi munda mwa bidimu nkama yinaayi, ne nebabakengeshe, kadi ku cyanza cya bukole Yèyè neabapatulemu ne neababweje mu buloba bwìmpè mùvwà mabeele ne bwìci bituuta nkoka.

¹³ Nenku, mpindyewu, pàakaseemenà cikondo cya mulayi, Nzambi kujuulaYe muntu kampanda bwa kuyaye naabo ku bwine buloba abu. Mbanganyi bàdì mu kalaasa aka diloolo edi bàvwà . . . bàdì bamanyè ne yèyè awu ùvwa nganyi? Mòsà. Monaayi, cifwanyikijilu cilelela cya menemene, cya menemene cya Kampanda wetù udibo batupeeshe bwa katufikisha ku Buloba bulaya, Kilisto. Mpindyewu twètù tudi ne mulayi, bwalu wètù mulayi wòwò n’Diikisha dya mu nyuma, pàvwàbi ne, dyàbò diikisha bòbò divwa dya mu mubidi. Ne pa nanku bàvwa bàlwa ku buloba bùvwàbo mwa kwambaku ne: “Ki bwètù peetu buloba mbwòbù ebu, katùcyèna kabidi balalakanyi to, twasòmbedi apa, ebu ki bwètù pèètù buloba, ne muneemu ki mutùdiku ne diikisha. Netukune wetù blé, madimi etu a mvinyo, ne netudye bya pa madimi etu a mvinyo. Ne pashiishe patwafwa, netubishiile bânà beetu balela.”

¹⁴ Kaa, mushindu mwine wutùdì bafwànyine kubwela mu buloba abu, mikenji ya bumpyanyi, bu mùvwà Naomi ne Luuta, Boàzà, kwaluja byònsò abi, mùvwà mwanaabo ne muntu mu Izaleela, mùvwàye ne cya . . . cyònsò cìvwàyekù mujimije cìvwa ne cya kupikudiibwa kùdì cilongo kampanda. Kaa, bilenga be! Mbifwànyine kwangata mbingu ne mbingu ne mbingu ne mbingu, katùyiku bafwànyine kushiya nshapita ewu, bwa kuya ku cyòci to. Tudi bafwànyine kutwangaja Bible mujimà anu mwòmò emu, anu mu nshapita umwepele ewu.

¹⁵ Nenku, kaa, mèmè ntu anu munange kuCilonga. Kale wàwa tuvwa tuCyàngata, kadi tuCyàngata munda mwa cidimu cijimà ne citùpà, kadi katùyi tushiyakù Mukanda to. Anu kushààla naaCì.

¹⁶ Mpindyewu, kadi, cìvwa cintu cinène be bwine bumpyanyi abu, mushindu wùvwàbi ne bumpyanyi mu buloba bùvwà kampanda mukwabo nansha umwe pa kuumusha cilongo cya mu dísù kàyì mufwànyinekù kupikula bumpyanyi abu nansha. Mpindyewu, ngànjì ndengeku anu kaacimanyinu kakese kaaba aka kàmvwà mulengè diloolo adi, bwenu nwènù baamàmù.

Mbanganyi mwab'ewu bàdiku basambidile bananga baabo, bajimine? Eyo. S'ki bwalu mbwôbù abu cyakabidi, nwamonu's: "Bumpyanyi bwebe." Nwamonu anyi?

17 Pôlò wàkambila mwena Loomo awu, yêyè ne: "Itabuuya Mukalenge Yesu Kilisto, nenku neusungidiibwe ne wêwè ne bàà mu nzubu mwebe." Wêwè ne diitabuuya búngi bukumbàne bwa wêwè mwine kusungidiibwa, mwikàle ne diitabuuya búngi bukumbàne, mwànà wa balume awu nansha mwikàle ne mutu mukole wà mushindu kaayi, anyi mwànà wa bakaji awu, yêyè neasungidiibwe nansha bya munyi. Nzambi, mu mushindu kampana anyi kansanga! Byôbì bikèngela bwa kumulaadikaYe cyâdì muulu, mulààle mu lupitaadi mwàmwa, ùpunga ne lufu, yêyè neasungidiibwe. Nzambi ngudi mucilaye. Bumpyanyi! Kaa! "Ne bôbò nebiikalèmu," mùdì Yeshàayi mwambe, "ne bânà baabo balela bônso pamwe naabo. Kabààkwenzelanganakù bibi anyi kabààkubùtulanganakù to pa mukuna Wànyì wônso wà cijila, mùdì Mukalenge wàmba."

18 Kaa, ndi ne kaaba kakese kândi ntekemena ne ndi mwa kufikaku diloolo edi, bwenu nwênù. Cìdi anu cìlàkuka kapa munda mwa mwoyi wànyì, ciikàle cyàlukila ku bwôbù bwalu abu.

19 Kadi mpindyewu, tûyaayi kumpala. Dìbà adi nukààvwakù bamone ne Mòsà, mwenji munene wa bishima wàkaya ne Izaleela too ne ku buloba abu, ne wàkabàfikisha ku buloba bulaya, kadi kàyi mubateekele bumpyanyi bwabo awu anyi? Yêyè kî ngwàkabàpèèsha bumpyanyi bwabo nansha; yêyè wàkabàlombola too ne ku buloba abu, kadi Yoshùwà ngwàkaabanyina bantu buloba. Neya bushuwa anyi? Ne Kilisto wàkaya ne Ekeleeziya too ne kaaba kàà ne bìvwà bu byabo byàkatèekiibwa kumpala kwabo, byàkabàpèèshiiwba, kushààle anu bwa kusabuka Yadènè cyanàànà, kadi Nyuma Mwímpè ki Yêyè Udi utèèka Ekeleeziya mu bulongame. Yoshùwà wa leelu ngudi utèèka Ekeleeziya mu bulongame bwèndè, mwikàle ùpèèsha muntu ne muntu, mapà, myaba, mwaba wà kwikala. Ne Yêyè ngudi Dìyì dya Nzambi didi dyàkwilà ku muntu wa munda udi Kilisto musungile, Nyuma Mwímpè. Mpindyewu nudi bacyùmvwè bìmpè menemene anyi? Mpindyewu tukàadi tubwela mu Mukanda wà Efeso. Mpindyewu, mushindu wumwewumwe awu, ngùdìYe ùshikika Ekeleeziya bilondèshile myaba yidì yikèngela kwikalabo. Mpindyewu, Yoshùwà wàkabashikika mu buloba bwa mubidi. Mpindyewu Nyuma Mwímpè ùdi ùshikika Ekeleeziya, bilondèshile myaba, mu buloba, bùdìbo, mu mwaba wùdìbo bàsanganyiiwba, bumpyanyi bwabo.

20 Mpindyewu, cintu cya kumpala cidìye ùbanga naaci kaaba aka, yêyè ùdi ùfùnda mukanda wèndè ne: "Pôlò, . . ." Bwalu, twètù netujandule paanyima pàà katanci ne bwalu busokoka bwônso ebu bùvwà bubuulùdiibwe kùdìye, kabìyi mu seminere kampana to, kabìyi kùdì mwena teoloji kampana to, kadi

cìvwa ndibuulula dya Nzambi dya kùdi Nyuma Mwîmpè òvwa Nzambi mupeeshe Pòlò. Mumanye ne bwalu busokoka bwa Nzambi, mwàkambàye, bùvwa busokoka kacya ku difuka dya dyulu ne buloba abu, bwàkamubuuludiibwa yèyè kùdi Nyuma Mwîmpè. Ne Nyuma Mwîmpè munkaci mwa bantu ùvwa munkaci mwa kuteeka muntu ne muntu mu bulongame, mwikàle ùshikika Ekeleeziya mu mwaba.

21 Mpindyewu, cintu cya kumpala cìdi Pòlò ùbanga kaaba aka bwa kwambila bantu, ncyà kwangata byònsò bya . . . Vùlukàayi ne, eci ncutumina Ekeleeziya, kî mmuntu wa pambelu to. Cidi mbwalu busokoka mu tusùmù kùdiye, kàyikù mwa kuumvwa to, ciikàle cìmupicila pamutu, kàyikù mumanye kantu nansha kamwe pa bwalu abu to. Kadi, bwa Ekeleeziya, cìdi mbwìci mu lubwebwe, ndisanka didi kadiyi kwamba, nditwishiiibwa dibènèshiiibwe, ndwongò bwa musuuka, nditekemena dyetu ne cisòmbedi cyetu, n'Dubwebwe lwà Bikondo, kaa, cìdi ncyònsò cìdi cìmpè aci. Bwalu maulu ne buloba nebijimine, kadi Dìyì dya Nzambi kadyakujiminaku to.

22 Kadi muntu udi pambelu pàà Kaanàànà kî mmumanye kantu nansha kamwe pa bwalu abu to, yèyè ùcidi anu wènda ùlalakana. Ncyèna ngamba ne yèyè kî mmuntu mwîmpè to, ncyèna ngamba nanku to. Ncyèna ngamba ne nansha muntu udi mu Ejiipitu kî mmuntu mwîmpè to, kadi yèyè . . . pàdiye kàyi anu mwanji kwikala mwangate bidì bu byèndè ebi.

23 Ne bintu biine, bidì, mulayi wùdi mufidiibwe kùdi Ekeleeziya kî mbuloba bwa mu mubidi to, kadi mbuloba bwa mu nyuma, bwalu twètù tudi bwakwidi bwa bumfumu, ditunga dya cijila. Nenku mu bwakwidi bwa bumfumu ebu, ditunga dya cijila edi, cisàmbà cya pabwàci, cibiiikidiibwe bwa kupatuka, cisungula, cisungudiibwe, citèèka ku luseke, dîbà adi maalu ònsò a pa buloba mmafwe pambelu. Ne tudi balombòdiibwe kùdi Nyuma. Bàna bàà balume ne bàà bakaji bàà Nzambi mbalombòdiibwe kùdi Nyuma wa Nzambi; kî nkùdi muntu to, kadi nkùdi Nyuma.

24 Byònsò mu dinanga, cintu cyònsò mu kaabujima patùdi twakulangana apa nciswikiibwe dibuki. Eci tudi bateetètètèe bwa kucilongesha misangu ne misangu, ne kakùyi mpatà to beena teoloji banene bàkaadi babwelèmu mu ndondo kule ne kule kutàmba mùndi mèmè mufwànyine kwenza. Kadi cintu cìndi njinga kunùfikisha ku dyumvwa ncyòci eci: cya ne muntu udi munda mwa Kilisto awu, mwikàle ne Nyuma Mwîmpè, ùdi mwa kutwàlakù muntu pàdiye mu ntùpàkànyi; ne mwoyimule, ne ditalala dya maalu, ne lutuulu; yèyè ùdi ne kalolo, ne mudipwekeshe, ne lulamatu, mùle tente ne Nyuma; kàyikù mubi to; mwikàle misangu yònsò anu ne meeji mîmpè; yèyè mmuntu mushiilàngane.

25 Kàyi anu muntu wa ne: “Kalekale wàwa tuvwa naaci. Bu twètù mwa kwela mbila, tuvwa naaci, twètù ba-Méthodistes. Kaa, patùvwà twela mbila apu, tuvwa mu Buloba abu.” Abi mbimpè, abi bìdi anu bilenga, ntu pàànyì ngiitabuujà aci.

26 Pashiishe ki beena Mpenta kulwabo biikàle bàakula mu myakulu, bôbò: “Tuvwa naaci; yônsò wàkaakula mu myakulu awu ùvwa naaci.” Ntu pàànyì ngiitabuujà aci, mémè ewu. Kadi nansha nanku twètù kusangana ne bààbúngì kabàvwa anu banji kuMupeta to, nudi numona’s. Nwamonu anyi? Mpindyewu bôbò bàdi . . .

27 Tukààdi tukafika mpindyewu ku bwalu busokoka bunene ebu bùdi busokoka kacya ku difuka dya dyulu ne buloba kadi biikàle mpindyewu munkaci mwa kubùbuulwila bânà bàà Nzambi mu matuku a ndekeelu. Nudi nwiitabuujà ne aci ncilelela ne, bânà bàà Nzambi mbamweneshiibwe anyi? Kumpala mene kwa twètù kuya nî mpenyi nî mpenyi, tûbuululàayi mu Loomo nshaapita wa 8 bwa katanci kakese cyanàànà, nnubadileku cintu kampanda. Anji monaayibi eci nî ncyôci cidi ciya ku cindi munkaci mwa kwamba kaaba aka eci. Mpindyewu netwangate Loomo 8, mvensa wa 19 wa—wa nshapita wa 8 wa Loomo:

Bwalu ditekemena dya ne mwoyi wùzùka . . . bufuki mbwindile dimweneshiibwa dya bânà bàà Nzambi.

28 Ne ditekemena dya ne mwoyi wùzùka, bufuki bwônsò mu kaabujima mbwindile dimweneshiibwa adi. Nwamonu’s, dimweneshiibwa! Dimweneshiibwa ncinyi? Kumanyisha!

29 Buloba bujimà. Ba-Mùzùlùmanyi kuntu kwàka, mbadindile. Mu nyungulukilu mwônsò, myaba yônsò, s’mbadindile. “Bantu biine aba bàdi penyi’s?” Tudi bapete. . . Tudi bapete cipepele cikole cya cívuma, tudi bapete mikungulu ne mikenyi, tudi bapete maanyi ne mashi, tudi bapete bintu bya mishindu yônsò, kadi tudi bapangè kuumvwa kaaDiyi kakese katekete menemene kààkakòkà ntema ya muprofeta wàkadijìngila muzabi pambidi awu ne kupatukaye, kwamba ne: “Ki mémè ewu, Mukalenge.” Nwamonu anyi?

30 Mpindyewu bufuki bujimà bùdi munkaci mwa kutwa mikemu ne kwindila dimweneshiibwa dya bânà bàà Nzambi. Mpindyewu, Pòlò neikalè mwa kwanji kushikika Ekeleeziya anu menemene mwaba wùdiYe ne cya kwikala. Mpindyewu anu bwa kupeta pàà kushindamijila bitùdi twamba, tubalàayi cyakabidi:

Pòlò, mupostole wa Yesu Kilisto ku diswa dya Nzambi, kùdi bansantu (mbàdi “bajidiibwe” abu) bàdi mu Efeso, ne . . . beena lulamatu mu Kilisto Yesu:

31 Mpindyewu, bwa beena kalaasa aka kabàlu kucipwa mwoyi to, tudi tubwela mu Kilisto munyi? Tudi tukashàala bàà mu ekeleeziya bwa kubwela munda mwa Kilisto anyi? Tudi twenza ditonda bwa kubwela munda mwa Kilisto anyi? Tudi

twinyijiibwa mu mâyi bwa kubwela munda mwa Kilisto anyi? Tudi tubwela munda mwa Kilisto munyi? Kolinto wa Kumpala, nshapita wa 12: “Bwalu ku Nyuma umwepele,” N-y-u-m-a ne dileeta dinene, umwepele, udi Nyuma Mwîmpè awu, “tudi bônso babàtijiibwe mu Buloba bulaya.”

³² Mu Buloba bulaya ebu, byônso mbyetu twêtù, mu Buloba bulaya ebu. Udi mucimone anyi, Mwaneetu Collins? Nwamonu’s, byônso mu Buloba bulaya! Izaleela pààkasabukàye Yadènè ewu, pààkabwelàye mu buloba bulaya, wàkalwangana ne kantu ne kantu kônso!

³³ Mpindyewu vùlukàayi ne, mu Buloba bulaya ebu, kî mbwena kwamba ne wêwè udi mutwibwe cisàlù cya kubenga kusaama nansha, kî mbwena kwamba ne wêwè udi mutwibwe cisàlù cya kubènga kupeta ntatu nansha. Kadi cidi cyùmvwija nunku, (Kaa, eci cipwekèku mu ndondo’s.), cidi cyàmba nunku ne, nceyebe wêwè! Juuka wêwè anu cyanààna ùcyàngàtè! Nwamonu anyi? Pàvwa . . .

³⁴ Nenku, vùlukàayi ne, mushindu wumwepele wàkajìmijàku Izaleela muntu, mpààkabwelà mpekaatu mu cituudilu. Ki mushindu wumwepele ngwòwò awu wutùdiku bafwànyine kujimija bu—bucimunyi, ngwà ne mpekaatu abwele mu cituudilu, cintu kampana kaciyi cyènda bîmpè mwaba kampana. Akàna pààkiibàye mulungu wà ngòlò awu ne civwalu cya mu Babùlònà aci, mpekaatu wàkasanganyiibwa mu cituudilu, ne mvita yakenda luboko.

³⁵ Mpèèshaayikù mêmè ekeleeziya ewu—ewu diloolo edi, kasumbu kàà bantu aka, mu bupwangane, mu bupwangane mu mulayi wà Nzambi, biikàle ne Nyuma Mwîmpè, bènda mu Nyuma, mêmè’s ndi ngeela disaama kanà dyônso kadyombo anyi lutatu kanà lwônso, anyi nî ncinyi cyônso cìdiku aci, Joe Lewis kanà yônso udikù mu ditunga emu awu, ne dipanga dyèndè dyônso dya ulamatu adi, ne beena bupidya bônso bàdiku abu, bwa kubwelabo ne disaamà anyi lutatu kanà lwônso mu ciibi eci, ne nebàpatukè mwab’ewu ne mubidi tumatuma anu wà menemene ewu. Eyowa’s, mukalenge. Nzambi mmufile mulayi, anu mpekaatu wa bupidya ngudi yèyè mwa kucipangisha. Mpindyewu tukàadi tukafika ku ne mpekaatu mukese ewu ùdi cinyi, paanyima pàà katanci. Mpindyewu:

. . . bàdi mu Kilisto Yesu:

Ngàsà ikalè kunùdì, ne ditalala, bya kùdì Nzambi Taatù wetù, ne . . . Mukalenge Yesu Kilisto!

Nzambi ne Taatù wa Mukalenge wetù Yesu Kilisto abeneshiibwe, yèyè udi mutubeneshe ne mabenesha ônsò a nyuma mu myaba ya mu dyulu mu Kilisto, mu—mu Kilisto!

36 Patùdì mu Kilisto, tudi ne mabenesha a nyuma. Pambelu pàà Kilisto, tudi ne masaluka. Mu Kilisto tudi ne mabenesha a cya bushuwa. Kabìyi bya miitabuuja a budìngìbudìngì to, kabìyi bya dikutakajangana naabi to, kabìyi bya didingidija to. Kadi paùdì anu wamba mùdì mu Buloba bulaya, kadi peebe kùyimù to, mpekaatu yebe neyikwele patooke. Nenku, katanci aka anyì, neudisangane wèwè mwine wa mafi ne—ne bikwabo byònsò, mutùtù tucibiikila pa buloba apa amu ne, musopàkàne mu nsebela. Neulwe kujandula ne kwèna ne ciine cyùdì wamba ne udi naaci aci to. Kadi paùdì mu Kilisto Yesu, Yèyè mmukulaye ditalala dya ku Dyulu, mabenesha a ku Dyulu, Nyuma wa ku Dyulu, byònsò mbyebe wèwè. Udi usanganyiibwa mu Buloba bulaya ne byònsò biikàle byebe wèwè. Amen. Mushindu mwine wùdibi bilenga's we! Kaa, tulongààyaaku:

Bilondèshile mùdiye mutusungule . . .

37 Mpindyewu, mwaba wùdì ekeleeziya mulendukile bya bibi menemene ngwòwò ewu.

Bilondèshile mùdiye mutusungule munda mwèndè . . .
(Munda mwa Nganyì?) Kilisto.

38 Tudi tusangana mpindyewu, mu—mu Genese mwàmwa ne mu Bwakabuulwibwa, Bwakabuulwibwa 17.8 ne, Yèyè wàkàtùsungula mu Kilisto kumpala kwa difuka dya dyulu ne buloba. Mpindyewu, mwaku ewu. . . Ngǎnjì kubalabi cidì cilondà aci:

. . . difuka dya dyulu ne buloba, bwa twètù kwikala bansantu ne katuyi ne cya ditubanda naaci kumpala kwèndè . . .

Mudyànjàle kutulongolola . . .

39 Mpindyewu ndi muswe kwimanaku pa mwaku awu wà “badyànjàla kulongolola.” Mpindyewu, *badyànjàla kulongolola* kî nkwamba ne: “Nènsungulè Mwaneetu Neville, ne ncyà—ncyà—ncyà—ncyà—ncyakusungula Mwaneetu Beeler” to. Kî ng'aci to. Ndidyànjàla—kumanya dya Nzambi uvwa mumanye ne uvwa mwa kwikala mululame ngwèpì ne uvwa kàyi mululame ngwèpì. Pa nanku, ku didyànjàla—kumanya, Nzambi mumanye civwàYe ne cya kwenza, Wàkadyànjàla kulongolola ku didyànjàla—kumanya Dyèndè bwa kwenza ne bintu byònsò bikwacishanganè bwa dyakalenga dya bàdì banangè Nzambi, bwa ne, mu cikondo cilwalwà, Yèyè wàmòna mwa kusangisha bintu byònsò mu Umwepele, udi Kilisto Yesu awu.

40 Ngǎnjì nkwènzèlèbi kaacifwanyikijilu kakese mwab'ewu. Nkìmpè. Tudi twanji kwaluka paanyima, ngeela meeji ne mvwa mwakulepu ndambu diloolo adi, anyì mulengèpu, mu Genese, nshapita wa kumpala, 1.26, pàvwà Nzambi mubiikile Dìnà Dyèndè ne, “Mukalenge Nzambi,” cidì mu mwaku wà El, Elah, Elohim, wùdì wùmvwijà ne “Ewu udi wikalaku

nkàâyendè.” Kakùvwa cintu cikwabo nansha cimwe ciikàlekù to pa kuumusha Yèyè. Kakùvwa nansha kapeepa, kakùvwa nansha bukênkè, kakùvwa nansha mitooto, kakùvwa nansha buloba, kakùvwa cintu cikwabo nansha cimwe to. Cìvwa n’Nzambi, ne Nzambi nkàâyendè, El, Elah, Elohim. Mpindyewu, Yèyè ki wàkenza aci.

⁴¹ Munda mwa cyôci aci mùvwa byambiibwà bìvwà byùmvwijà ne Yèyè ùvwa...Munda mwa El, Elah, Elohim munène awu mùvwa cyambiibwà anyì...Nwênù’s nudi bamanye cìdì *cyambiibwà* ne ncinyì, anyì ncyàmbè mémè nunku ewu ne, cìvwa “ngiikàdilù.” Aci mmu mushindu wà bânà batekete bààcyùmvwakù, ne mémè ndi umwe wa ku bânà batekete bàdi bàkèngela kucyumvwabo mushindu awu. Munda Mwèndè mùvwa ngiikàdilù wa kwikala taatù kampanda, kadi Yèyè ùdi wikalakù nkàâyendè, kakwena cintu nansha cimwe cya kwikadilaYeku Taatù to. Nenku, mpindyewu, munda menemene mwa cyôci aci mùvwa cintu cikwabo kampanda, cya ne Yèyè ùvwa Nzambi; ne nzambi ncintu kampanda cya dikuukwila; kadi Yèyè nyawu ùvwa wikalakù nkàâyendè, El, Elah, Elah, Elohim, mu mushindu wà ne kakùvwa cintu nansha cimwe cya kuMukuukwila to. Munda mwa cyôci aci, Yèyè ùvwa Musungidi, kadi pàakù kakùyi cintu nansha cimwe cijimine cìvwà mwa kusungidiibwa. Nwamonu anyi? Munda mwa cyôci aci, Yèyè ùvwa Mwondopi, nwamonu’s, kadi pàakù kakùyi cintu nansha cimwe cisaama cìvwà mwa kwondopiibwa, anyì cintu nansha cimwe cìvwà mwa kwikala cisaama. Mpindyewu nudi bumvwe cimfwanyi aci anyi? Pa nanku byambiibwà Byèndè, ngiikàdilù Wèndè kupatulaye cìdìku leelu ewu eci.

⁴² Bamwe bantu bàtu bàmba ne: “Ee, bwa cinyi Nzambi kàyikù mwa kwikala mucimànyike anu ku cibangidilu aku?” “Yèyè mmwena lwonji wa mwoyi wà cikisu,” mwàkambà Joe Lewis, wàkapiisha Joe awu, anyì wàkapiisha Jack Coe, nwamonu’s. Kwambaye ne: “Yèyè’s ùdi anu mmwena lwonji wa mwoyi wà cikisu. Cintu pààci ne n’Nzambi kacitukù to. Bu ne cintu bu nanku cìvwaku, Yèyè ùvwa mufwànyine kwikala...” Kaa, mémè... kuMutwaye anu mènà a mishindu yònsò, nwamonu’s. Kadi cìdì anu mbwalu yèyè ùvwa mufwànyine kwikala ne mamanya bùngi cyanàànà kumutu *eku*, kadi kàyikù ne cintu nansha cimwe kwinshi *eku* to.

⁴³ Mpindyewu, aci, ki mwaba wùdici ngwôwò awu. Nwamonu anyi? Dìyì edi dìdì dicyàmba kaaba aka, ne Yèyè mmucisokoke. Ne maalu masokoka aa àvwa masokoka mpindyewu, vùlukàayi, Bible mmwambe ne: “Kacya ku difuka dya dyulu ne buloba, mindile dimweneshiibwa dya bânà bàà Nzambi,” bwa kuàleya patooke kùdi ekeleziya. Kaa, ekelekele! Nwacyùmvù anyi?

⁴⁴ Mpindyewu ndi nganji anu kwimanyika ndambu kaabwalu kàànyì aku, anyì nèntwalè... Nènye ku meeji àànyì àdì àlondà bwa kuumvwa cyôci eci. Mpindyewu vùlukàayi ne, mu bikondo

byônsò bya Môsà, mu bikondo bya baprofeta amu, mu bikondo byônsò abi, bàvwa bindile too ne ku matuku a ndekeelu aa bwa bintu ebi kuleejiibwabì patooke, bilondèshile Mifundu. Aci's neya bushuwa, bwa kucibuulwilabo bânà bàà Nzambi. Bwa cinyiì? Kuumukila anu ku cyàkajiminà aci. . . too ne ku cifwànàngàne ne cipaapu cya musàkà, bu mungàmbi amu, ciibakiibwa cyènda citàmba kuseemena, citàmba kuseemena, citàmba kuseemena.

45 Anu múnkaadi mwambambe díyì adi misangu yàbûngì, mwambe ne, Nzambi ùtu mwenze Bibles yisatu. Wa kumpala, WàkaMutèeka mu dyulu, cidiminanzaji. Kacya nukàadikù bamone cidiminanzaji anyi? Cimfwànyì cya kumpala mu cidiminanzaji ncinyi? Virgo. Cimfwànyì cya ndekeelu mu cidiminanzaji ncinyi? Leo nyama wa ntambwe. Yèyè wàkalwa bwa musangu wà kumpala kùdi virgo, Ùdi ùlwa bwa musangu mwibìdi bu Ntambwe wa cisàmbà cya Yuda. Nwamonu anyi?

46 Wàkenza uvwa ulonda mu cipaapu cya musàkà, kale mu matuku a Henòkà, pààkenzàbo cipaapu cya musàkà. Ne bôbò bàtu bàbipima. Mèmè ncyèna ncyumvwa to. Kadi too ne bwa mvita, mwaba wùdibo biinama ne bèndela ku binù too ne mu ntanta bule kampanda, nenku bàdi mwa kupima ntanta wa pankaci pàà mvita. Nudi bamanye kùkaadibo ne dipima dyabo adi mpindyewu? Too ne mu cibambalu menemene cya mfumu. Ne pàvwà cipaapu cya musàkà eci cyènda cibànda apu. . . Twètù katwenaku bafwànyine kuciibaka to, ne byônsò bitùdikù twètù naabi leelu ewu ebi. Katwenaku bafwànyine kuciibaka to.

47 Nciibakiibwe buludi too ne kuulu mushindu *ewu*, too ne ku lusongo. Ne dibwe dìdì pa. . . Dibwe dya ku lusongo kabàakadipetakù to. Kacya bôbò kabàakaasakù mùsongà ku lusongo lwà cipaapu cya musàkà aci to. Ncyèna mumanye ní nwènù nutu bacimanye anyi kanùtu bacimanye, cipaapu cinènè cya musàkà cya mu Ejiipitu aci, kacya kacyàkateèkiibwakù dibwe dya mùsongà ku lusongo lwàci aku to. Bwa cinyi? Dibwe dya ku lusongo dyàkabèngiibwa, Kilisto, Dibwe dya Mùsongà, nwamonu's, dyàkabèngiibwa.

48 Kadi patùdi twenda tubànda kuumukila ku cikondo cya Luther, cikondo cya ba-Baptistes, cikondo cya ba-Méthodistes, cikondo cya beena Mpenta, tudi babànde buludi too ne ku Dibwe dya ku lusongo mpindyewu, nwamonu's, munkaci mwa kwindila ne kujinga bwa Dibwe dya mùsongà adi kusòmbadi, nzubu ùkaadi mukumbanangane. Kanùtukù babale mu Mifundu ne: "Dibwe adi dyàkabèngiibwa" anyi? Mu bushuwa bwa bwalu, tudi bamanye ne aci ciywa cyàkula bwa ntempelu wa Solòmò. "Kadi Dibwe dyàkabèngiibwà adi ki dyàkashàlà Dinene dya mu ditumba." Kadi ndi ngamba nunku anu bwa kunwenzelaku ci—ci—ci—cimfwànyì kampanda.

49 Mpindiyewu, kabidi mu Bible, tudi ne mwoyi mu dituku dya ndekeelu, ku lusongo lwà cipaapu cya musàkà, mishipa micyamakane ya cikondo cya kansere mu cidiminanzaji, mu cikondo cya dilwa dya Leo nyama wa ntambwe, mu dibwe dya ku lusongo, ne mu matuku a dimweneshiibwa dya bânà bàà Nzambi, mu Bible, nwamonu's. Nudi numona mwaba wutùdi anyi? Tukààdi anu ku cikondo cya nshiikidilu menemene.

50 Mbanganyi bàdiku babalè cibejibeji aci mu lumingu emu, cìdi Khrouchtchev ne bakwabo abu bambe? Kaa, bôbò bàkaadi badìlongòlòle; ne twètù peetu. Amen. Badìlongòlòle! Mbîmpè, nwamonu's. Kaa, dyèsè kaayi—kaayi—kaayi, dituku kaayipu's we! Bu ne beena Kilisto bàvwakù mwa kumanya dituku ditùdi ne mwoyi's we. Ekelekele!

51 Nudi nwela meeji kaayi? Mufundi wa Mukanda ewu, yêyè wâkacimòna awu, ne mucimone ne mmwaba kaayi wùvwàci mwa kumweneshiibwa mu matuku a ndekeelu, mwindile ne mwikàle útwa mikemu bwa bânà bàà Nzambi abu kajuukabo mu matuku a ndekeelu, biikàle ne bukole bwa Nyuma Mwîmpè kundekeelu kwa cikondo, bwa kubuulula bintu bisokoka kacya ku difuka dya dyulu ne buloba, bwa kubileeja.

52 Mpindiyewu twalukilaayaaku tûkabwelè cyakabidi mu “difuka dya dyulu ne buloba” adi, bwa kupeta dibuulula kampanda, bwa twètù kumona ní tudi babinge anyi ní katwena babinge. Ndi ntekemena ne ncyêna ndivwija munyangakaji wa cijila to pa kubiikila Nzambi ne, “Papa,” kadi ndi muswe kucyamba mushindu awu bwa nufikeku ku dicyumvwa. Papa! Papa úvwa dijinga ne bânà, pa nanku cyàkenzàYe ncinyi? Wâkamba ne: “Banjelo bìikalèku.” Ki Bôbò kulwa kuMunyungulukila. Kaa, abi's mbîmpè. Bôbò kuMukuukwila, dîbà adi kwikalaYe Nzambi, byambiibwà. Vùlukàayi ne, Yêyè úvwa El (E-I), Elah, Elohim, diikalaku dya nkàâyendè adi, kakùyikù cîngà cintu to anu Yêyè. Cintu cya kumpala cyàkalwà mwaba awu civwa m'Banjelo. Dîbà adi, Banjelo kabàvwa mwa kwenza cîngà cintu to pa kuumusha dikuukwila. Bôbò kabàvwa mwa kujimina to. Pa nanku, Bôbò kabàvwa mwa kusaama to, Bôbò bàvwa baakampàndà bàvwà kabàyi bàfwa to. Pa nanku, Yêyè kàvwa mwa kuleeja patooke bukole Bwèndè bwa dyondopa to, Kàvwa mwa kuleeja patooke lupandu Lwèndè to. Pa nanku dîbà adi, kumpala, mpindiyewu anjàayi . . .

53 Pashiishe paanyima pàa aci, kwambaYe ne: “Netwènzè cintu kampanda cya cìlengiibwa.” Ki kwenzaYe buloba. Nenku pààkenzàYe buloba, kwenzaYe bifukiibwa byònsò bya pa buloba, ne pashiishe kwenzaYe muntu. Byònsò byàkapàtukilà ku buloba abi; kubangila ku—ku civuba anyi ku kavubavuba, anu mmwenekelu wetù wa mubidi cyanàànà mwikàle ùlèlema pa màyi, mubangile anu apu, bwa . . .kuumukila apu kuya ku ludimba, cìdi ciikàle mushindu wà mwoyi wùdi mutàmbe kwikala wà kwinshi wùtùdiku mwa kupeta, mùdìbo bàmba

ne, ndudimba. Mushindu wùdi mutàmbe kwikala wà kuulu mmuntu. Kuumukila ku ludimba kubangabi biya too ne ku musodya, kuumukila ku musodya kuyabi anu nanku anu nanku anu nanku, ne musangu wònsò wùvwà Nyuma Mwîmpè ùbanga kwenza “wuuush,” ùpwidija’s, mwoyi wùlwa kabidi; “wuuush,” mwoyi mutàmbe kwikala wà mubàndìle. Kì katanci aka, cintu kampanda kumwenekaci mu cimfwànyì cya Nzambi, ciikàle muntu. Kacyakacya cintu nansha cimwe kacitukù, kacivwakù, ne kakwàkufùkiibwakù kabidi to, cintu kampanda citùmbùke kutàmba muntu, bwalu muntu ùdi mu cimfwànyì cya Nzambi. Nwamonu anyi?

⁵⁴ Pashiishe muntu, pààkenzàYe muntu Wendè wa kumpala awu, mpindyewu, pààkenzàYe Banjelo Bèndè abu apu, Wàkenza muntu: “Yèyè wàkabàfùka mulume ne mukaji,” bònsò mu cintu cimwepele. Ùvwà eku mulume eku mukaji, mwikàle eku ne bukaji eku ne bulume. PààkenzàYe Adàmà ne kumutèèkaYè mu mubidi, vùlukààyi ne, mu Genese 1, Yèyè wàkenza mulume ne mukaji, nenku mu Genese 2, kakùvwà kwanjì kwikala muntu bwa kudima buloba to, muntu wa musunya. Kakùvwà muntu nansha umwe uvwa mwa kukwata cintu ne kudima buloba to, kadi nansha nanku kùvwà muntu mu cimfwànyì Cyèndè. “Ne Nzambi ùdi . . .” [Disangisha dìdi dyàmba ne: “Nyuma.”—Muf.] Ncya bushuwa. Nwamonu anyi? Yèyè wàkenza muntu wa kumpala awu: “Yèyè wàkabàfùka mulume ne mukaji.” Mpindyewu, pààkenzàYe muntu wa kumpala awu . . .

⁵⁵ Mpindyewu, vùlukààyi ne, cyôci cyònsò aci Ùvwà Yèyè naaci mu meeji. Nenku mu dyalumingu diloolo mvwa mwakùle pa cyôci aci. Dìyi didi—didi mmeeji mapatwila mukana. Nzambi wàkeela meeji mushindu wùvwàYe mwa kwikala Nzambi, mùvwàYe mwa kukuukudiibwa, mùvwàYe mwa kwikala Mwondopi, mùvwàYe mwa kwikala Musungidi; nenku pàvwàYe anu wàkula Dìyi, bwalu bùvwà butuuke kashidi. Kaa, bàna bàà Nzambi aba mpindyewu bu bôbò anu mwa kukwata bikole Dìyi adi mushindu awu’s we! Pàdi Nzambi wàkula Dìyi, nkujikè! Kakùyi mpatà to! Mmufwànyine kwikala mwindile . . . Dilondolola dya maalu a bikondo didi dyàmba ne, anyi mulongi wa bintu bya kale bya mwinshi mwa buloba ne bakwabo bònsò, bàdi bàmba ne pàmwàpa buloba mbwenze mìliyò ne mìliyò ne mìliyò ya bidimu. Mémè ncyèna mumanye to, mbufwànyine kwikala bwenze mbòmbò ne mbòmbò ya bidimu. Ncyèna mumanye ne mbwenze ntanta bule kaayi to. Nzambi kàtu wikalakù mu cikondo to. Yèyè kèna ne kasunsa kamwepele kàà dîbà kashààdìle ku pàvwàYe naadi musangu wàkacyàmbàYe awu to. Yèyè mmutùngùnùke ne kwikala anu Nzambi. Bwèndè Yèyè kakwèna bya cikondo abi to.

⁵⁶ Kacya ncìvwakù mumanye aci mushindu awu to too ne diloolo adi, dinda adi’s we. Wa Cyèndèlèlè, kakùyi makeelela, kakùyi maalaba, byònsò bìdi anu mpindyewu. Kacya nukààdikù

bamone mwaku ewu “NDI” anyi? Kí nne “Mvwa,” anyi ne “Nèngìkalè” to, ncyá Cyendèlèlè: “NDI,” nwamonu’s, “NDI,” misangu yònsò.

⁵⁷ Mpindyewu, kadi Yèyè wàkajinga bwa kuteeka bintu mu cikondo. Bìvwa bìkèngela bwa Yèyè kwenza cintu kampanda bwa dikuukwila, ki byambiùbwà Byèndè kupatulabi cyòcì eci. Pashiishe kwenzaYe muntu. Pashiishe, mu mwine muntu ewu, ùvwa ùmwèka mutàmbe kwikala nkààyèndè. Pa nanku, mpindyewu, bwa kuleeja mpindyewu meeji Èndè manene awu, cìvwàYe naaci mu cimfwànyì cya Kilisto ne Ekeleeziya, Yèyè kààkangata kapese kashiilàngàne kàà diima bwa kwenza mukaji to, kadi Yèyè wàkangata mu luseke lwà Adama amu, lubadi; ne kwangataYe ku nyuma wa Adama, cya bukaji aci, ne kuciteekaYe mu lwine lubadi elu. Paùdì umona muntu mulume wènza maalu bu cilùmaacikàjì, kùdì cintu kampanda cipampàlààmùke. Ne paùdì umona muntu mukaji ùswa kwenza maalu bu muntu mulume, kùdì cintu kampanda cipampàlààmùke. Nwamonu’s, kùdì cintu kampanda cipampàlààmùke. Bàdi nyuma yibidi mishilàngàne, ewu ne ewu. Kadi, bònsò pamwe, bàdi bènza cintu cimwepele, “babidi aba bàdi umwepele.” Pa nanku Yèyè wàkenza mukaji ne mulume, ne bòbò kabàvwakù ne cya kukulakaja, kabàvwakù mwa kufwa, kabàvwakù mwa kutoloka mvyá to, nansha. Bàvwa bàdya, bàvwa bànwá, bàvwa bàlààla, anu mutùdì twètù twenza emu, kadi kabàyikù bàmanya ne mpekaatu ncinyì to.

⁵⁸ Mpindyewu nèncingulukè kaaba aka mene bwa dileesona dikwabo musangu kumpala, pa dimiinu dya nyoka. Diine adi, bàvwa bandombe bwa kuumusha cyòcì aci mu bantu. Kadi ndi muswe kumona muntu alwe kundeeja cintu kampanda cishilàngàne. Ki cìndì mèmè muswe kumanya ncyòcì aci, nwamonu’s.

⁵⁹ Mpindyewu, kadi pashiishe paanyima pàà byònsò ebi, pashiishe pààkabwelà mpekaatu, cìdì cyènzekà ncinyì?

⁶⁰ Muulu mwàmwa, lwà kumutu kwàka, mu ntanta wa mùliyò, mìliyò lukama ya kilòmèètà, mùdì cibwashibwashi bunene *ebu*, nenku ki dinanga dipwangane dya agapao ndyòdì adi. Musangu wònsò wùdì wela cidya mu *nunku*, cìdì cikèpela ne ntanta wa bule bwa cyàlà. Kadi nudi anu bamanye mùdìku kafwànyine kushààla kakese pàmbàkù kufika pa buloba apa. S’nkamundidimbi kàà kaamundidimbi kàà mindidimbi. Ki cyùdì wèwè naaci, ki cìndì mèmè naaci ncyòcì aci, kaamundidimbi kàà kaamundidimbi kàà mindidimbi ya dinanga dya agapao.

⁶¹ Kùdì cintu kampanda munda mwebe amu, kùdì cintu kampanda munda mwa mukaji yònsò mwab’ewu ukààdi mupite bidimu makumi abidi, kùdì cintu kampanda munda mwa mulume yònsò mmwab’ewu ukààdi mupite bidimu makumi

abidi, cìdì cìjinga bwa kushààla. Wèwè udi anu ne bidimu bitaanu cyanààna, abi nkuumukila ku dikumi ne bitaanu too ne ku makumi abidi. Paanyima pàà bidimu makumi abidi ki wèwè kubanga kufwa aku. Kadi, kuumukila ku dikumi ne bitaanu, wèwè udi anu nsongà wa mucikàle anu mwànà too ne dîbà adi. Ne pashiishe udi uboba upwila too ne paùdì ufika ku makumi abidi. Kadi paanyima pàà makumi abidi, kaa, ki wèwè awu ne: “Mémè’s ncidi anu muntu pa yèyè.” Awu ngwèwè udi wamba peebe nanku cyanààna, kadi kî ncyùdì to. Wèwè udi wenda ufwa ne wenda ujika, cyùdì wenza nansha ciikàle cinganyì. Nzambi mmukushiye ukola too ne pa bidimu abi, kadi pashiishe ulwa kufwa. Mpindyewu cìdì cyènzekà ncinyì? Wèwè mpindyewu udi ubanga kwenda kufwa, kadi munda amu mùdì cintu kampanda munda mwebe amu cyàmba ne: “Ndi muswe ngìikalèku cyakabidi wa bidimu dikumi ne mwandamukulu.”

⁶² Mpindyewu ndi muswe nnukonkeku cintu kampanda. Anjì ambabi tung bu ne udi mulediibwe kùkaadi bidimu nkama yitaanu, kadi mushààle ne bidimu dikumi ne mwandamukulu too ne leelu? S’udi mufwànyine kwikala wa cyena kale, ne yebe mmwenenu ya kùkaadi bidimu nkama nkama yitaanu ayi! Kumpala kwa baataatù beena lwendu kulwabo muneemu emu, wèwè’s uvwa anu nsongàakàjì wa mmwenenu anu wa bwena awu. Mona’s, s’bìvwa bipiciibwe ne wèwè mutungunuke ne kwela bidimu ne mushààle ne mwoyi bidimu nkama yitaanu. Nwamonu’s, kùdì cintu kampanda cipampàlàmuke.

⁶³ Wèwè udi wamba ne: “Ee, mpindyewu mene mémè’s ndi ndyumvwa bìmpè be, Mwaneetu Branham. Kaa, ndi—ndi—ndi ne bidimu dikumi ne mwandamukulu, ndi ne bidimu dikumi ne bisambombo, s’ndi ndyumvwa bìmpè.” Munanga wanyì, lekela nkwabibileku cintu kampanda. Wàmanyi munyì ne mamwèbè ùdì ne mwoyi mu kasunsa emu, pìikalàye kàyì mu ekeleeziya emu? Wàmanyi munyì ne mulunda webè wa balume awu kî mbamushebeye kùkaadi anu ndambu wa tusunsa cyanààna, anyì mulunda webè wa bakaji awu? Wàmanyi munyì muwàbèngà kwikala citalu mu dinda mu nzubu mwebe? Wàmanyi munyì muwapatuka mu ekeleeziya emu mwikàle ne mwoyi, diloolo edi? S’ndipanga anu dya menemene dya kumanya cyàkwenzekelà. Kakwèna cintu nansha cimwe cyùdì mumanyè to. Pawikalà ne bidimu dikumi ne bitaanu, dikumi ne bibidi, dikumi ne citeema, makumi mwandamutekete ne bitaanu, anyì makumi citeema, kùdì. . . byònsò kabiya bimanya. Kùyì umanya ne udi mwimanyine penyì to. Kadi peebe mwikàle ujinga kwalukila ku bidimu dikumi ne bitaanu, dikumi ne mwandamukulu. Cìdì cìkufikishà ku dyenza ciine aci ncinyì?

⁶⁴ Mpindyewu, wèwè mwalukile ku bidimu dikumi ne mwandamukulu ne mushààdilekù, ne kùyikù mwa kusaama ne kùyikù mwa kwikala. . . s’nebikengeleku bwa wèwè kwikala ne bakwabo bantu pamwe neebe, bwalu mbifwànyine kukutalala

ku mwoyi, wamonu's. Bantu's mbafwànyine kutungunuka too ne bikondo bikwabo kadi wèwè mufwànyine kwikala wa cyena kale. S'mbifwànyine kwikala bibi kutàmba mùvwàbi bifwànyine kwikala bu wèwè mwa kukulakaja pamwe naabo. Kadi kùdi cintu kampanda cidì cibìikilà bwa wèwè kwikala mwaba awu. Nka-agapao kakese aku, kaamundidimbi kakese aku kàdi kàkwenzejà . . . Cintu kampanda lwà kuulu eku.

⁶⁵ Mpindyewu, diloolo adi, anyi dinda adi, pa dîbà mwandamutekete, Nyuma Mwîmpè, ku bwîmpè Bwèndè ne ngàsà Wendè, pàvwàYe mumpatule mu mubidi ewu apu, ngeela meeji, mùndi ngeela meeji. Eyowa anyi to, ncyèna ncyàmba to, ne mukabwele mu Buloba abu ne mukamone bantu abu, ne bônso biikàle bansongà. Nenku mêmè kumona bantu batàmbe bulenga bântù nciyikù mwanjì kumona kacya bândela. Nenku kungambilaYe ne: “Bamwe bàà kùdìbo bàvwa ne bidimu makumi citeema. Mbaùdi mukudimwishe mucima. Kabyena bikemesha to pàdìbo beela lubila ne: ‘Mwaneetu! Mwaneetu!’ apu.”

⁶⁶ Mpindyewu, awu mmubidi wà mu dyulu, mu mushindu wà ne patùdi tufwa katwena tulwa bwalu bukatakaja to, tudi tulwa mubidi kampanda. Bu twètù, muntu ne muntu, mwa kufwa, bu bômbè bwa mushinda mwa kututaayisha mu kasunsa emu, mu tusunsa tutaanu kuumukila ku mpindyewu netwikalè munkaci mwa kulabulangana ku cyanza ne kuupukilangana muntu ne mukwèndè, ne kwela mbila mikole ne kusaluka, ne kutumbisha Nzambi! Eyowa's, mukalenge. Nenku Mwaneetu wa balume ne Mwaneetu wa bakaji Spencer bàdi basômbe kaaba aka aba, ngeela meeji bàdi bamwe bàà ku babàka bàdi batàmbe kwikala bakulakaji mwab'ewu aba, nebiikalè ne bidimu dikumi ne mwandamukulu, makumi abidi. Mwaneetu Neville mmufwànyine kwikala anu mwànà wa balume mutekete, ne mêmè mufwànyine kwikala kânà kàà balume katekete. Ne tudi bônso bafwànyine kwikala anu . . . Aci's cidi menemene anu Bulelela ebu. “Bu ntenta wa cisômbedi wa pa buloba ewu mwa kunyanguka, tukàadi ne mukwabo mwindile.”

⁶⁷ Pàdi mwànà mukese ùpàtuka munda mwa mamwèndè, mu dilediibwa dya mubidi, kaamubidi kèndè kakese aku kadi kàdinyènguvula ne tukolo atu tûtùpika, ne bikwabo. Mfwilaayiku luse bwa cyakwidi aci, nwènu bansongàakàji. Kadi, pàdiku kènza nanku apu, kàdi ne misunya yìdi ne mwoyi ayi miikalè yidìkòka. Kadi pàdiye ùfika pa buloba, cintu cya kumpala, ùdi ùkwàta mweyelu, ne kùdi mubidi wà nyuma wà ngiikàdilù wùdi ne cya kubwela munda mwa mwànà awu pa dîbà adi mene. Wèwè mumulekele, yèyè ùdi ùjuula mutu wèndè mukese awu ùwùlamika ku dibeele dya mamwèndè aku ne ùbanga kwamwa. Yèyè kàyi mwenzè nanku awu to, mabeele kí mmawànyineku nansha kupatuka to.

68 Kacya nukààdikù bamone kânà kàà ngombe pàdiku kàlediiibwa, kàdi... pàdiku anu ne kààpeci makàndà búngì bukùmbàne bwa kwimanyinaku kuulu anyi? Udi ukàmbila ciine aci nganyi? Kààsa lwendu kàya buludi too ne kùdì mamwákù, kàbanga kulamika mutu eku ne eku ne kàbanga kwamwa. Kaa, eyowa's!

69 Bwalu, pàdi mubidi wà pa buloba ewu wùfikishiibwa panwapa, kùkaadi mubidi wà nyuma mumane kudilongolola bwàwù wòwò. Nenku pàdi anu ewu... Kaa, aleluuyah! "Nenku ntenta wa pa buloba wa cisòmbedi cyetu ewu yéyè munyanguke, kùkaadi mukwabo mwindile mwàmwa." Patùdi anu tupatuka mu ewu ewu, tudi twiwela mu wòwò awu; wùdì kawùyi ne dijinga dya kunwa màyi matalale, kawùyikù ne dijinga nansha dikese dya màyi a kunwa to; wùdì kawùyi wùdya, bôbò abu kí mbàà ku lupwishi lwà buloba to. Kadi bàdi anu bàà cya bushuwa, ne biikàle mwa kulengangana ne kulabulangana ku byanza, ne dinanga ne byònsò biikàle anu bipwàngàne. Nenku mubidi awu mmwindile kuntwaku. Ncitùpà cya ku wòwò. Yidi yisatu.

70 Wèwè udi ubangila Mwoyi wèbè wà Cyendèlèlèlè anu ku cyoshelu eku mene. Mwaba ewu ngùdi ubangila Cyendèlèlèlè. Kaa! Wèwè udi ubangila Mwoyi wà Cyendèlèlèlè mwaba ewu mene. Dìbà adi wàlediiibù cyakabidi, mwànà wa Nzambi. Ne pashiishe paùdì ufwa, udi ubanga... Pàdi lufu lwebe lukukwata mu mubidi ewu ne mwoyi wùlekela kutuuta, ne nkata ya cifwaka yibanga kwimana kaaba kamwe, kaamundidimbi kakese kàvwà mundidimbi wà mundidimbi aku, mu kasunsukila kamwe kàà kasunsa kòkò aku kàdi kàshààla mundidimbi wà mundidimbi, pashiishe mu kakwabo kàdi kàlondà kòkò aku kàdi kàshààla mundidimbi awu, pashiishe mu kakwabo kàdi kàlondà kòkò aku kàdi kàshààla konjònjì kakese, pashiishe mu kakwabo kàdi kàlondà kòkò aku kàdi kàshààla kaamusulu, pashiishe mu kakwabo kàdi kàlondà kòkò aku kàdi kàshààla musulu, ne mu kakwabo kàdi kàlondà kòkò aku kàdi kàshààla mbù, ne paanyima pàà katanci wèwè udi udisangana mwimane mu bwikadi bwa bananga beebe biimàne mwàmwa, bavwàle bivwalu bya mubidi wà mu dyulu, mu mushindu wà nwènù numanyangana muntu ne mukwèndè, nunangangana muntu ne mukwèndè, bàalùkile cyakabidi ku nsongàalùmè ne nsongàakàjì. Cya bushuwa menemene. Wòwò wùdì wìndila mwaba awu too ne ku dilwa dya Mukalenge Yesu. Nenku dīngà dituku mubidi Wèndè mutumbishiibwe awu... Mpindyewu vùlukàayi ne, awu mmubidi wà mu dyulu, kí mmubidi mutumbishiibwe to, mubidi wà mu dyulu. Nenku dīngà dituku mubidi wà mu dyulu awu newumuke mu Dyulu pamwe ne Yesu.

71 "Bwalu ndi nzwambila eci," Tesàlònìkà Mwibìdì, nshapita mwi5, anyi Tesàlònìkà wa Kumpàlà, nshapita mwi5, ewu anyi

ewu: “Ndi nzwambila ne, ncyêna muswe kunushiya mu dipanga to, bânà beetu, pa bidì bitàngilà aba bàdì balààle tulu, bwa kanwìkadi mu tunynganyinga to, byenzè bu mùdì bakwabo bàdì kabàyi ne ditekemena. Bwalu pìikalàbi ne tudì biitabùùje ne Kilisto wàkafwà ne wàkabùika cyakabidi mu dituku diisàtù, mbya mwomumwe kabidi ne nansha aba bàdì balààle tulu mu Kilisto Nzambi nealwe naabo pamwe Nende. Bwalu tudì tunwambila nunku ku mèyi matuma a Mukalenge ne, twètù bàdì ne mwoyi ne bashààle too ne ku dilwa dya Mukalenge, katwakupangisha anyì kucyamakana” (mwaku wùdì mutàmbe bwìmpè) “kucyamakana aba bàdì balààle tulu to. Bwalu mpungi wa Mukalenge neadile, ne bafwè mu Kilisto nebànji kubiika dyambedi.” Mibidi ya mu dyulu eyi yidi yitùùluka panshi apa ne yìvwàla mibidi ya pa buloba, mibidi mitumbishiibwe. “Ne twètù bàdì ne mwoyi ne bashààle netushintuludiibwe mu katanci, mu mubunyi wà dísù, ne netwangaciibwe muulu pamwe naabo, bwa kutwilangana ne Mukalenge mu mpeepele.”

⁷² “Ncyakunwa kabidi neenu maala a tumuma twa mvinyo ne Ncyakudyà kabidi to too ne pânNgààbìdyà neenu bipyabipya mu Bukalenge bwa Taatù Wanyì,” Didya dya Dibanji. Bwalu mu bidimu bisatu ne citùpà mufwilakanyi ne Kilisto ùdì ùjikija bukookeshi bwèndè, buloba bujimà bùbùtudiibwa, beena Yuda bàbìikidiibwa, Yozefu ùDimanyisha kùdì bàà Bisàmbà bya bendè, to kùdì beena Yuda. Vùlukààyi ne, pààkadimanyishà Jozefu kùdì bânà baabo, kakùvwa muntu wa bàà Bisàmbà bya bendè nansha umwe mwaba awu to. Pààkatùmàye. . . Nwènu’s nudi bamanye bwalu bulonda abu. Yozefu, cifwanyikijilu cipwàngàne cya Kilisto, mu mushindu wònsò. Nenukù pààkatùmà Yozefu mukenji bwa kubiikidishabo bânà baabo, ne kufikabo, ne kutangilaye e kumona mwakùnyèndè Benyàminà awu, ne kubamonaye mwaba awu ne pashiishe yèyè. . . Bàakamba ne: “Mona’s, mulumyana ewu! Kabìvwa bikèngela bwa twètù kwikala bashebeye Yozefu, mwaneetu awu to.” Beena Yuda abu pààkamònàbo ne bàvwa benze cilema; mpindyewu Kilisto, pìikalàYe munkaci mwa kuDimanyisha kùdìbo. Nenukù Yozefu wàkashààla mupate, mu mushindu wà ne byakakengela bwa kutudikaye ne mwadi, mwambe kudila, pa nanku kuumushaye mukàjèndè ne bânà bèndè, ne balami bònsò ne bakwabo bònsò, ne kubatumaye mu nzubu wa bukalenge. Cya bushuwa menemene. Ki pashiishe mu bwikadi bwa beena Yuda nkààyaabò, kwambaye ne: “Mémè ndi Yozefu, mwaneenu awu. Mémè ki mwaneenu awu.” Ki dìbà adi kudyelapa panshi ne kubangabo kuzakala, kwambabo ne: “Bwa apa kaayi tudì bamanye ne twàbwelàkànyì, bwalu tuvwa bashebeye mwaneetu awu. Twàkamba ne tudì bashebeye mwaneetu awu, kadi mpindyewu s’ki yèyè ewu mfumu munene.”

⁷³ Kwambaye ne: “Nzambi ngwàkacyènza mu kiipacila, bwa kusungila mwoyi.” Ki kabingilà menemene nkòkò aku kàvwà

Nzambi mucyenzèle, bwa kutusungila twètù bàà Bisàmbà bya bendè. Kadi bàà Bisàmbà bya bendè bàvwa bàsanganyiibwa mu nzubu wa bukalenge. Aleluuyah! Mubengiibwe kùdi bàna Baabo, Yozefu, Yèyè wàkangata Mukaji-musela; ne Mukaji-musela awu ùvwa wa bàà Bisàmbà bya bendè, kàvwa wa beena Yuda to. Eyo.

⁷⁴ Mpindyewu, kunùyaayà kwobeka nkwèpi mpindyewu? Paanyima pàà twètù bamane kuvwala mubidi wà butumbi ewu, ne cikondo cya butumbi cìlwalwà aci; piikalà mubidi mutumbishiibwe ewu, mubidi wà mu dyulu ewu mumane kuvwijiibwa mubidi mutumbishiibwe. Nudi bumvwe cìndi njinga kwamba mpindyewu aci anyi? Dìbà adi ndìndi mwa kulwa e kwamba ne: “Mwaneetu Neville!” Ngànji nnupeesheku kaacifwanyikijilu kakese. Ngamba ne: “Mwaneetu Humes, twànjiibi kuya kwa Papa mu dinda emu tũng.” Yèyè ùdi Nzambi. TwâMumanyì bwa mpindyewu, Yèyè m’Musungidi, Yèyè m’Mwondopi.

⁷⁵ Kacya kakùvwakù cintu pààci ne ndifùka dyà mpekaatu nansha. Aci kî ncinùbwelè bilenga to, mmwômò anyi? Mpekaatu kî ncifukiibwa to. To, mukalenge! Mpekaatu ndinyangakaja. Kùdi Mufuki anu umwepele, n’Nzambi. Mpekaatu mbwakane bunyangakaja. Masandi ncinyi? Bwakane bunyangakaja. Mashimi ncinganyi? Bulelela bukònyangaja. Cya bushuwa’s. Dìyi dya mulawu ncinganyi? Mmabenesha a Nzambi makudimuna mavwija dìyi dya mulawu bwa Nzambi, pamutu pàà dibenesha. Mpekaatu kî ncifukiibwa to. Mpekaatu ndinyangakaja. Pa nanku, Sàtaanà kàvwakù mwa kufuka mpekaatu to, yèyè wàkanyangakaja anu civwà Nzambi mufuke. Ncya bushuwa menemene. Lufu lùdi anu ndinyangakaja dya mwoyi.

⁷⁶ Mpindyewu monaayi eci—monaayi eci. Dìbà adi nêngàsè lwendu nye, ne nêngàmbè ne: “Mwaneetu Humes, ne wèwè ne mèmè, ne Mwaneetu Beeler ne bamwe bàà ku bàna beetu bàà balume, tùyaayi kùdi Papa Nzambi. Nenku, twàmbè ne, twànji kwenzaayikù kaalwendu kakese. Nwènù aba’s nuvwa banangè mikuna panùvwa . . .”

“Eyowa, ncya bushuwa ne tuvwa bayinange.”

⁷⁷ “Kaa, kùdi ndambu wa miliyò ya kilòmèètà ya yòyi ayi mu buloba bupyabupya mwàmwa. Ndàayi muntwamu, nwenda nwendakanamu.”

⁷⁸ “Bidi bikèngela bwa mèmè . . . ? . . . dìbà dya kuulu dituku dyònsò, didi dibànda muulu. Nènnùtèèlèjè. Pàcìdìbo bààkula apu, Nènteelejè.” Yeshàayi 66. Ncya bushuwa.

⁷⁹ Nenku nudi bamanye’s, mèmè mpàtukila lwà kwàka naka, twètù bònsò tupàtukila lwà kwàka naka anu munda mwa bidimu nkama yitaanu cyanàànà, anu kaalwendu kakese cyanàànà, mùliyò wumwe, kabiyi ne cidibi bishintululakù to, nwamonu’s.

Kadi mpindyewu—mpindyewu aci cidi cyumvwika bu bupâle, pàaci's mbulelela. Nwamonu's, mbulelela, bwalu kakwena bya cikondo to, n'Cyendèlèlè. Nenukù pândi mpatuka nya kwàka naka, ndi ngenda ngendela kwàka naka, kadi nudi bamanye ne ùndi mêmè—mêmè—mêmè ntwilangana nende kuntwaku nganyi? Ndi ngamba ne: "Ee, pùikalàbi ne wàwa kî m'Mwaneetu wa bakaji Georgie Bruce to! Mona's, Mwaneetu wa bakaji Georgie, s'kwènji ntanta mule ùmvwà mukumone's." Bimwèka anu bu ne yèyè ùvwa anuku misangu yònsò. Nwamonu anyi? Yèyè ùdi mwa kwikala ne bidimu mìliyò dikumi, kadi mwikàle mwànà mutekete anu mwèndè ne kale. Mmufwànyine kwikala ùkoonya kampanda paanyima, ne pândi ntangila kwàka, s'Cisumpa-ntambwe, nyama wa ntambwe.

Ngamba ne: "Maalu kaayi mu dinda emu, wèwè Cisùmpà-ntambwe?"

⁸⁰ "Nyâw," byenze bu kânà kàà mpusu's. "Kaa, mêmè's ndi kuntu kwàka nyiikilanganaku ne bamwe bàà ku bânà beetu bàà bakaji lwà ku bilòngò binène kwàka, tudi kwòkò aku kùkaadi binunu nkama yitaanu ya bidimu, wamonu's, munkaci mwa kukenzakana." Mpindyewu, aci's cidi cyumvwika bu dipaala, kadi's mbulelela. Ncya bushuwa menemene. Mushindu awu ngùvwà Nzambi mubyélèlè meeji.

⁸¹ Ee, mwoyi wèbè wùbeneshiibwè, Mwaneetu wa bakaji Georgie. Dyenzelanganana dya bibi kadiyikù mwa kulwa to, cintu nansha cimwe. Mu dîbà dya yibaamulòlò netùbandè ku lusongo lwà mukuna, ne netwàmbè ne: "Éyì Papa Nzambi, musangu kampanda wàwa mvwa mujimine. Kaa, musangu kampanda wàwa mvwa nsanganyiibwa mu bitoci bya mpekaatu, Papa Nzambi, ki Wèwè kunsungila."

⁸² Mona's, bantu bààkateetateetà bwa kujikula cyôci aci bààkapaala. Ee, muntu wàkafùnda cituminyi cya ndekeelu cya *Éyì Dinanga Dya Nzambi* awu, cyàkafùndiibwà ku cimano cya lupitaadi kampanda lwà babùlùke aci, wàkateeta bwa kujikula dinanga dya Nzambi awu. MwàkashàlàYe wa ciipanshi bwa kusungila bangènzàmpèkààtù, ne mushindu wàkènzàYe, dinanga Dyèndè dyàkapwekà bwa kutùsùngila wèwè ne mêmè adi. Nwènù bàdi bàmba bwa dikuukwila's, Banjelo kî mbamanye cintu nansha cimwe pa bwalu abu to! Dikuukwila, Mwanjelo mmumanye anu... Yèyè ùdi wìmana kwàka ne ùtuma mapwâpwa Èndè awu paanyima ne kumpala ne bikwabo, ne mu nseke ne: "Aleluuyah! Aleluuyah!" Kadi, kaa, luse we! Pàkaadibi bikafika ku kumanya kwa ne mêmè ewu mvwa mujimine ne nkàadi mupetulula, mvwa mufwe, ne nkàadi cyakabidi ne mwoyi! Éyì Nzambi wa yààya, mêmè's mvwa mpekaatu, s'mvwa bitoci, ne mvwa nsanganyiibwa ku diyaala!

⁸³ Ki cidi citàmbe bwîmpè cidiku mwoyi wà pànu mwa kukupèèsha ncyôci aci. Kacya nukàadikù baye ku diyaala dya Colgate eku anyi? S'mmwaba mutàmbe kwikala wà mupuuya mubole wà kacya wûnkaadiku mêmè ewu musanganyibwe. Mwishì wà kale awu wùdi anu wùngendesha ku mwoyi pândi ngukoka mu dyùlù apu. Mudyôlòle panshi mu mwishì wònsò wà kale awu, mu cifu mùkusaama bikole, mùkuvùnguluka anu dikuvùnguluka, paanyima pàà wèwè mumane kunwa bwanga bwa misanda bwa mafuta abu. Nwamonu's, ku mwoyi kùkwenda anu ne mwàkù mwònsò! Ne nkose yìkwendela pambidi pajimà, yiteeta bwa kukukunya. Nenku ki mwoyi wà pànù pa bulenga bwàwù ngwòwò awu. Ki pashiishe muntu kampanda wòlola cyanza ùkwambula. Ne wèwè mukulakaji wa dikema ne kùyiku ne pabwàsà to. Ne ùkwambula anu cyanàànà ne ùkwaluja ku mwànà wa balume wa bidimu dikumi ne mwandamukulu, ùkushikika pa lusongo lwà mukuna, ne mubidi tumatuma pa wòwù, ekelekele, weyelaku kapeepa kîmpè ne a cyashima. Udikù mufwànyine kujinga kwalukila cyakabidi ku diyaala aku anyi? Kwidikiji, kwidikiji, kwidikiji, kwidikiji wadìdinga wàlukilakù cyakabidi ku diyaala adi to.

⁸⁴ Mpindyewu, ki cidici cyumvwija ncyôci aci, mulunda wanyi. Ki cidi cikeena-kumona aci, anyi ditentemunyibwa adi, anyi nî ncinyi, cikeena-kumona. Mêmè nêngàmbè ne ncikeena-kumona, bwalu ndi ncina ne nkwepi kwàlwàci kutapa muntu ku mwoyi pândi ngamba ne nditentemunyibwa, ki cìvwàci ncyôci aci. Mpindyewu, ki dîbà adi divwà Nzambi. . . cyàkenzà Nzambi bwa kufikisha bàna bàà balume ne bàà bakji kùdiYe. Mpindyewu, bantu abu mbanganyi? Mmushindu kaayi wùvwàbokù. . . Bantu aba cyàkenzàbo bwa kukumbanyinabo ciine eci ncinyi? Bòbò biine bààkafikaku ku dicyenza bishi's? Nzambi, ku cibangidilu, kumpala kwa Mwanjelo kampanda kwenjiibwaye. . . Mbanganyi bàdi bamanye ne Yèyè kàtu ne mikàlu? Yèyè kàyi nanku to, Kí n'Nzambi to. Pa nanku, Nzambi, mu luse Lwèndè lwà kalùyi ne mikàlu alu, Wàkamòna ne Lusifere neenzè cyôci aci, bu Yèyè mwa kufuka cyôci eci. Yèyè wàkabàtèeka pa budishikaminyi bwa disungula, cishimikidi aci. Ne wèwè ucidi pòpò apu, ncyà bushuwa, mucu wà maalu mîmpè ne maalu mabi muteekiibwe kumpala kwa yònsò wa kutùdi, wèwè udi wenza disungula dyebe. Nenku Lusifere nguvwa wa kumpala wa kulonda njila mubi. Ki kubangaye kukokela byònsò paanyima pèndè, mwena citù awu, ùteeta bwa kwangata byònsò anu bwèndè yèyè nkààyèndè, ùteeta bwa kudyatakaja muntu mukwabo. Nenku ki pààkabangilà mpekaatu mpòpò apu. Mpindyewu, tèelejàayi eci. Ki pààkabangilà mpekaatu mpòpò apu. Nzambi, mu meeji Èndè a kàyi mikàlù awu, wàkamòna aci, ne wàkamòna njila umwepele. . .

⁸⁵ Mpindyewu, nwênù bàna beetu ba-trinitaires, ncyèna ne

dijinga dya kunutapa ku mwoyi to, kadi mmunyi mu Dîna dya Dîyi dîmpè dya Nzambi adi munùdiku bafwànyine kuteeka Yesu mwikàle mupersona mushiilàngàne ne Nzambi Yèyè mwine? Bu Yesu mwa kwikala mwangate mûngà muntu ne mumutume bwa kuya kafwaye, bwa kupikula ewu muntu udi apa ewu, Yèyè's ùvwa mufwànyine kwikala muntu kàyi mwakane's. Kùdi njila anu umwepele uvwakù Nzambi mwa kucyenzela, ùvwa ngwa kwangata Yèyè mwine kaaba aku! Nenku Nzambi wàkalwa mubidi bwa kumonaYe mwa kulabula bisaamà bya lufu, bwa kuumusha kalonda aku ne lufu kutùdi, bwa twamona mwa kupikudiibwa kùdi Lwèndè Yèyè mwine. Ki bwa cinyi Yèyè neikalè ukuukudiibwa anu bya menemene. Yesu ùvwa muntu, ki cìvwàYe cya bushuwa. Yèyè ùvwa muntu, m-u-n-t-u, mulèla kùdi virgo Mariya. Kadi Nyuma uvwa munda Mwèndè ùvwa n'Nzambi wa kàyi dipima, munda Mwèndè mùvwa musòmbèle kaabujima kàà Bunzambi mu mushindu wà mubidi. Yèyè ùvwa Yehowah-yilè, Yèyè ùvwa Yehowah-laafa, Yèyè ùvwa Yehowah-maanàsè, Yèyè ùvwa Yehowah; Ngabu wetù, Cibwikilu cyetu cya pa cyàdi, Mwondopi wetù; Yèyè ùvwa Alpha, Omega, Ntwadijilu ne Ndekeelu; Yèyè ùvwa wa Kumpala, wa Ndekeelu; Yèyè Uvwa, Ewu Udi, ne Wàlwa; Muji ne Mùtòlokù wà Davidi, Mutooto wà mu Dinda, mona's, Yèyè ùvwa Byònsò-mu-byònsò. Munda Mwèndè mùvwa musòmbèle kaabujima kàà Bunzambi mu mushindu wà mubidi!

⁸⁶ Ne lufu lùvwa misangu yònsò anu ne kalonda, kàvwàlu lùtwa bantu ne: "Aa," mùdi dyabulu wàmba, "ngàakupeci's, bwalu wantèeleji mèmè. Ndi nkusuma, nènkwelè mu lukita. Mashi a mikooko awu kaàkukwambulwishakù to, awu's adi anu mashi a nyama cyanààna." Kadi Nzambi, mu lungenyi Lwèndè, ùvwa mumanye ne kùvwa kùlwa Mwànà wa mukooko, mushebeya kacya ku difuka dya dyulu ne buloba. Eyowa's, mukalenge. Ne bòbò... Yèyè wàkindila cikondo aci, bwa kaabujima kàà cikondo kulwaku.

⁸⁷ Kadi dîngà dituku pàakalwà Mwànà wa mukooko mwine ewu, Muntu ewu, Sataana wàkakùtakajiibwa. Kutangilaye ku luseke Lwèndè, kwambaye ne: "Wèwè ní udi Mwànà wa Nzambi, enzabi *cikampanda*. Wèwè ní udi Mwànà wa Nzambi, enzabi cishima tung mèmè mmone Ucyènza. Mèmè mmone Ucyènza. Uh-huh, mèmè nèmMuswikè mukùsù kwisù, nKutuute cintu. Wèwè ní udi muprofeta, twàmbilèbi wàKutuutù awu ne nganyi." Hum! "Mèmè ncyèna—ncyèna ngiitabuuja ne Wèwè ki Muntu awu nansha. Ní ng'Wèwè, twàmbilè buludi mùdibi ne ng'Wèwè." Nwamonu's, byònsò mushindu awu. "Kaa, twàmbilèbi ní ng'Wèwè's!" Yèyè kaakabuululaku Mwèndè mukana amu to. Kaa, kaa, Yèyè's wàkamwenza diyelè!

⁸⁸ Yèyè wàkatàngila kùdi muyiidi awu, ne kwambaYe ne: "Mèmè's ndi mufwànyine kwambila Taatù Wanyi ne Yèyè mufwànyine kuNtumina bisumbu binènè dikumi ne bibidi

bya Banjelo, bu ne Mvwa muswe kwenza ciine aci.” Pilaatu kaakumvwaku aci to, nudi bamanye’s.

⁸⁹ “Wèwè ní udi! Wèwè ní udi. Kaa, wàwa kî n’Yèyè to. Mona’s, tàngilàayi numone mùdìYe ùtùuka mashi. Ê, bamwe bàà kunùdì nwênù basalaayi ndàayi nuMutwile makodi mwísù amu.” KuMutwilabo makodi, kuMusekabo, kuMutuulabo manza a myedi ku cibàngà. “Kaa, kî n’Yèyè to! To, wàwa kî n’Yèyè to! NèmMucimpikè kalonda kàanyi aka, ambà’s. NÈMubàndishishè kuulu kwàka. S’ngààKupeci mpindyewu!”

⁹⁰ Ndekeelu wa byònsò pààkeelàYe lubila ne: “Eli! Eli! Nzambi Wanyi! Nzambi Wanyi!” Awu ùwa mmuntu. “WàNdekèdì bwa cinyi?”

⁹¹ Mu lupangu lwà Ngetèsèmànè, dilaabiibwa kuMuumukadi, nudi bamanye’s, byakakengela bwa Afwe bu ngènzàmpèkààtù. Yèyè wàkafwà bu ngènzàmpèkààtù, aci kaayi nudi bamanye; kayiyi mpekaatu Yèndè Yèyè to, kadi yànyi mèmè ne yebe wèwè. Mwaba awu ki wàkabwelelà dinanga adi’s, mwàkangatàYe yànyi mèmè! Kaa, aleluuyah! MwàkangatàYe yànyi mèmè!

⁹² Nenku ki Yèyè awu mwaba awu, Kàyikù mwa kubuulula Mwèndè mukana amu to. Kalonda aku kwambaku ne: “Udi mumanye’s, mèmè ndi ngeela meeji ne Yèyè ùvwa anu muntu wetù wa patupu ewu. Kàvwa mulela kùdì virgo to, bwalu ngààMucimpiki kalonda kàanyi.”

⁹³ Kadi ki yèyè ulwàlwa ewu, kuMucimpikaye kalonda kèndè aku, kadi awu musangu kaayi yèyè ùvwa ùtuuta mpanga ne mùsonà’s, balùmyànà! Kudituudishaye kalonda kèndè aku dîbà adi. Kèna mwa kukàbwejangana kabidi to kubangila ku dîbà adi, yèyè wàkashiya kalonda kèndè aku muntwamu. KubiikaYe ku lufu mu dituku diisàtù, ne kwambaYe ne: “Ndi Ewu uvwa mufwe, kadi udi cyakabidi ne mwoyi, ne mwikàle ne mwoyi bwa kashidi awu, Ndi ne nsapi ya lufu ne ya iferno.” Eyowa’s, mukalenge. Ùvwa mupangila bwa kumona ne Yèyè awu ùvwa nganyì. “Ne bwalu Mèmè ndi ne mwoyi, nenwikalè peenu ne mwoyi. Kî ncyanji kumweneka. . .”

⁹⁴ Dìngà dituku, matuku asatu anyì anaayi paanyima pàà cyòci aci, paanyima pàà Yèyè mubànde kùdì Taatù, mwàlukile, pashiishe bamwe kwambabo ne: “Kaa, Yèyè’s. . .Yèyè—Yèyè ùdi ne cya kwikala mukishi. Yèyè ùdi ne cya kwikala cintu kampana cya mukishi’s Mulùmyànà awu. Ne twètù. . .Ní nudi baMumone. Nudi numona cikeena-kumona.”

“To, Yèyè’s ùvwa Yesu anu wetù wa cya bushuwa ewu.”

⁹⁵ Toomààsè kwambaye ne: “Mèmè ngǎnjì mmone byanza Byèndè ne bikwabo byònsò, nenku nènnwàmbìle ní mmwòmò.”

⁹⁶ KwambaYe ne: “S’m’Mèmè ewu.” Yèyè ne: “Nudiku ne mushipa ne dyàmpà mwaba awu anyì? Ntwadilaayi dyàmpà dyela minyiinyi túng.” Nenku kuMutwadilabo dyàmpà dyela

minyiyini, ki Yêyè kwimana mwaba awu e kudidyaYe. Yêyè ne: “Mpindyewu, nyuma ùtu ùdya mûndyadyà Mêmè emu anyi? Nyuma ùtu ne misunya ne mifuba mûndi Mêmè naayi emu anyi?” Nwamonu anyi? KwambaYe ne: “M’Mêmè. Ndi cyôci aci.”

⁹⁷ Ne Pôlò wàkamba ne: “Kî ncyanji kumweneka ne mmubidi wà mushindu kaayi menemene wutwikalà naawu to, kadi tudi bamanye ne netwikalè ne mubidi mufwanangane ne Wëndè” Cinyi? Kacya Yêyè ùkaavwakù ne mubidi wà teòfànî awu anyi? Eyowa’s, mukalenge! PààkafwàYe, Bible mmwambe ne “Yêyè,” ùdi cyakabidi mupinganyi-muleeji-muntu, “Yêyè wàkaya mu iferno ne wàkayiisha misuuka yivwà mu buloko.” Aleluuyah! Yêyè wàkacyènza bishi? Ùvwa ne byumvwilu bya lulengu, Ùvwa ne byumvwilu bya luumu, Ùvwa ne byumvwilu bya dyakula, Yêyè wàkayiisha ne mubidi wà mushindu wumwewumwe wumvwà mumone bantu batumbishibwe abu naawu bufuku kampanda abu. Yêyè wàkayiisha misuuka yivwà mu iferno, yivwà kayi yi minyingalale mu mwoyi-mule wà mu matuku a Noa ayi.

⁹⁸ Kadi pààkabiikàYe ku lufu mu dya Paasaka, kabivwa mwa kwenzeka ne mubidi awu wumònè dibola nansha, bwalu Davidi muprofeta ùkaavwa mudyanjile kucimona ne: “Ncyakushiya musuuka Wëndè mu iferno, anyi Ncyakwitaba bwa Munsantu Wanyi kumonaYe dibola nansha. Kabidi mubidi Wànyì newikishe mu ditekemena, bwalu Yêyè kaakushiya musuuka Wànyì mu iferno nansha, anyi Yêyè kaakushiya Munsantu Wanyi bwa kumonaYe dibola nansha.” Nenku mèbà makumi mwandamutekete ne abidi kumpala kwa dibola kwenzekadi, teòfànî awu, mubidi wùvwà muye mukayiishe misuuka yivwà mu buloko, yivwà kayi yi minyingalale mu mwoyi-mule wà mu matuku a Noa ayi awu, kubiikawu ku lufu, ne cifwaka kuvwalaci dibènga-kufwà, ki Yêyè kwimana e kudyaYe, ne kutwambilaYe ne Yêyè ùvwa Muntu. Aleluuyah!

⁹⁹ Mushindu awu ki wutwaMumona’s, Mwaneetu Evans. Apu mpààsombàYe pa nkwaswa wa butumbi wa Davidi. Aleluuyah! Apu mpatwikalà mwa kwendakana tubànda tupweka mpindyewu, nênye neenu mu lwendu lwà dyàmwàmwa dya mikuna munda mwa bidimu mùliyô mujimà, nwamonu’s, anu ndambu wa matuku cyanààà, anu ndambu wa tusunsa cyanààà, netuye luseke lukwabo alu, tukasomba kuntwaku.

¹⁰⁰ Nenku pàkaadi dîbà dya kudya dikumbana, nudi bamanye’s, katanci aka anyi, Mwaneetu wa bakaji Wood kwambaye ne . . . Mêmè kwamba ne: “Mwaneetu wa bakaji Wood, ee, kùvwà nkwèpi ntanta yònsò wa dîbà ewu? Ncyèna mukumoneku to kwènji . . . bwànyì mêmè’s mbyenze anu bu ne tùvwa ntusunsa dikumi ne tutaanu’s.”

“Kaa, s’kùkaadi bidimu binunu bibidi, Mwaneetu Branham.”

101 “Uh-huh. Udi udyumvwaku bishi?” Kaa, mu bushuwa bwa bwalu’s udi mwa kudyumvwa anu bimpè.

102 “Kùdì, anjì vwilààyibì apa tǔng, balumyana, nǎnnùleejè nwǎnù bǎnsò cintu kampanda, nwǎnù bǎnà beetu, bǎnà beetu bananga. Mpokolo wa mâyi nyêyè ewu mwaba ewu, matàmbe bwǐmpè anùdì kanùyikù banjì kunwa kacya. Nenku, kaa, twètù netunwe mâyi mǐmpè a cyashima. Nǎngòòlolè cyanza kwàka mpoole bisumbu binènè bya tumuma twa mvinyo, ne twètù bǎnsò netusombele panshi mwaba awu bwa kutudya.” Aci kacyakwikalaku cilenga anyi? S’ki cyòci aci menemene. Anu aci ki cyòci.

103 Tudi bapete ciine eci bishi? Tudi bacimanye bishi? Nzambi, kumpala kwa difuka dya dyulu ne buloba, ùkaavwa mudyànjlile kutulongolola! Banganyi biine abu? Aba bàdì mu Buloba bulaya.

. . . kudyànjlila kutulongolola ku diteekiibwa dya bǎnà ku Yesu Kilisto . . . bilondeshìle disanka dǐmpè dyèndè dya diswa dyèndè,

Ku disaamuna dya butumbi Bwèndè . . .

Bwa twamona mwa kuMusaamuna mùtùYe mwambe amu. Ki cìvwàYe ncyòci aci, Nzambi. Twètù’s tudi baswe kuMusaamuna.

. . . disaamuna dya butumbi bwèndè bwa ngàsà wèndè, kùdìye mùtùvwije baanyishìbwe mu munangiibwe awu. (Mu Kilisto mmutùdì baanyishìbwe.)

Mu yêyè mmutùdì bapetè dipikudiibwa ku mashi, difwidiibwa dya luse ku m-p-e-k-a-a-t-u . . .

104 Bìdì bìkèngela bwa mǐmè kwalukila ku diteekiibwa, kadi ndi muswe kwimanyina pa “mpekaatu” apa bwa katanci kakese. “Mpekaatu,” nukààvwakù bamone aci anyi? Nutukù bamanye ne Nzambi kàtu ùpìisha ngènzàmpèkààtù bwa dyenza dya mpekaatu anyi? Yêyè ùdì ùmupìisha bwalu nngènzàmpèkààtù. Ngènzàmpèkààtù yêyè ùnwà cifwanka, Yêyè kèna ùmupìisha bwa aci to; yêyè’s nngènzàmpèkààtù, twamb’eku twamb’eku. Nwamonu anyi? Nwamonu anyi? Yêyè kèna ne mpekaatu to, yêyè ngènzàmpèkààtù awu. Yêyè ùdì anu ngènzàmpèkààtù, nwamonu’s, kèna yêyè ne mpekaatu to. Kadi nwǎnù mbàdì ne mpekaatu, nwǎnù bàdì beena Kilisto abu. Nudi numona ne apa udiye yêyè wàmbila ng’Ekeleeziya. Bwa kumulama mululame’s. Nwamonu anyi? Nwamonu anyi? “Difwidiibwa dya luse ku mpekaatu,” m-p-e-k-a-a-t-u. Twètù mbàdì bènza mpekaatu. Kadi ngènzàmpèkààtù ùdì anu ngènzàmpèkààtù cyanàànà, Nzambi kèna ùmufwila yêyè luse to.

105 Mpindyewu, wèwè udi wamba ne: “Ee, yêyè’s mmupatuke mwab’ewu mukaase muntu cingoma. Ciwènza pa bwalu abu ncinyi?” Aci kì ncintangile mǐmè to. Mǐmè ncyèna mulongolodi

wa maalu to, mêmè ndi muyiishi. Mikenji nyàtàngilà bwalu abu, yôyi ki milongolodi ya maalu. Yôyi nyidi... “Ee,” mùdi wamba, “yêyè’s mmwendè masandi.” Aci, aci—aci’s nci tangile mikenji. Aci mbwalu bwèndè yêyè ne mikenji. Mêmè—mêmè—mêmè—mêmè ncyèna mulongolodi wa maalu to, ncyèna mêmè ndongolola bantu to. Cîndi mêmè nkeba mbwa kubafikisha ku dikudimuna dya mucima. Mêmè ndi muyiishi, nwamonu’s, wànyi mudimu ngwà kumufikisha kùdi Nzambi. Piiikalàbi ne yêyè mmwenze mpekaatu, aci nci mutangile yêyè, yêyè’s nngènzàmpèkààtù. Nzambi ùdi ùmupiishila mu cipidi citàmbe kutumbuka. Yêyè’s ùtu ngènzàmpèkààtù anu kwine kwònsò aku, yêyè mmupiishiibwe anu kwine kwònsò aku. Yêyè kàtu mufike nansha mene pa cishimikidi cya ntwadijilu to, yêyè—yêyè—yêyè kèna mwaba nansha wumwe to. Yêyè nngènzàmpèkààtù anu kwine kwònsò aku. Yêyè kèna ne mpekaatu miine to, yêyè nngènzàmpèkààtù.

¹⁰⁶ Wêwè kwèna mufwànyine kupatuka pambelu kwamba ne: “Too ne *apa* ki bufuku, ne too ne *apa* ki mbufuku” nansha. To, cyònsò mbufuku, anu bufuku pa bufuku. Ki cyàkambà Nzambi ncyôci aci. Aci ncyà bushuwa, yêyè ùdi anu ngènzàmpèkààtù, kwajiki. “Mpindyewu, yêyè mmwenze nenku, too ne *apa* ki bufuku, *eci* mbufuku bwa bùkenka menemene lwà apa mene.” Ndi mumanye, kadi cyònsò cidi anu mbufuku, kwajiki. Nwamonu anyi?

¹⁰⁷ Ncyèna mufwànyine kwamba ne: “Too ne *apa* mbukènkè lwà apa mene” nansha. To, cyònsò cidi anu mbukènkè, nwamonu’s, anu bukènkè pa bukènkè, kwèna mwa kwamba ne ntoo ne mwaba kampanda nansha. Nwamonu anyi? Kadi yêyè mwikàle ditoba difiike mu *eci*, dibà adi mùdi mìdimà munda mwàci amu.

¹⁰⁸ Pa nanku “mpekaatu,” m-p-e-k-a-a-t-u, twètù tudì ne difwidiibwa dya luse ku mpekaatu yetu ku (cinyi?) Mashi Èndè, Mashi a mushinga mukole.

... *bilondèshìle mabanji a...wendè.*

¹⁰⁹ Tudi tucipwa mwoyi bishi? Bwalu tudi bakùmbànyine, tudiku benzèku cintu kampanda bwa mpekaatu yetu kufwidiibwayi luse anyi? Cinganyì Cyèndè?

... *ngàsà,*

¹¹⁰ Kaa, ekelekele! Ncyèna ne cintu nansha cimwe cîndi ndwa naaci mu maboko àànyì to, Mukalenge. Ncyèna ne cintu nansha cimwe cîndi mufwànyinekù kwenza to, kakwena cintu nansha cimwe cîndi mufwànyinekù kwenza to. Tàngilàayi! Yêyè ngudi mudyànjlile kundongolola, Yêyè ngudi mumbiikile, Yêyè ngudi munsungule. Kacya nci tukù mêmè muMusungule Yêyè to. Yêyè ngudi munsungule mêmè, Yêyè ngudi mukusungule wêwè, Yêyè ngudi mutusungule twètù bònsò. Kí ntwètù bàdi baMusungule Yêyè to. Yèsu wàkamba ne: “Nwènù kí mbàdi baNsungule to, Mêmè ngudi munusungule.” KwambaYe ne: “Muntu nansha

umwe kèna mwa kulwa kùNdi pàdi Taatù Wanyì kàyi mumukoke dyambedi to, ne bônso bàdi Taatù muMpeeshe nebalwe kùNdi. Ne nansha umwe wa kùdìbo kî mmujimineku to, pa kuumusha anu mwânà wa dibutuka, bwa—bwa kuuja Mufundu.” Nudi numona anyi? Yèyè wàkamba ne: “Kadi bônso bàdi Taatù muMpeeshe nebalwe kùNdi.”

111 Kaa, nkàadi ngenda mpicisha dîbà be, kî mmwômò anyi? Kadi ncyènàku mupatuke mu cyôci eci to. Ncyèna mwanji kubanga cyôci eci to. Ngănji kulwijakaja, bikèngela mfike ku cintu kampanda anu ne lukasa lwónso mpindyewu kaaba aka mene, nenku tudi tulwijakaja. Bìdi bikèngela bwa ngàalukilè ku diteekiibwa edi mu katanci kakese cyanàànà. Kaa, nudiku mwa kumfwila luse anu bwa—anu bwa katanci kakese cyanàànà anyi? Twàngataàyi eci eci kaaba aka, bamwe bàà ku bantu aba mbendè njila mule kuumukila ku Géorgie balwè kaaba aka anu bwa diloolo edi nkààyaadi, myoyi yabo yìbeneshiibwè. Mpindyewu, wèwè mwaneetu mwena Géorgie, ne mwena Texas ne kwónso kunùdi bafumine aku, tèèlejààyaaku mvensa mwi5 ewu. Twănji túnengàayipù ndambu wa tusunsa.

Mudyànjlile kutulongolola ku—ku. . .

112 Mwaku ewu “ku” wùdi wùmvwija cinyì, mwaku ewu “ku”? Wùdi wùmvwija cintu kampanda kutùdi tuya batàngile, ku. “Nyààya ku mpokolo. Nyààya ku nkwasà.” Humes, umvu aci anyi? “Nyààya mutangile ku bìrô.”

Mpindyewu, Yèyè mmudyànjlile kutulongolola ku diteekiibwa dya bânà ku Yesu Kilisto kùdiye yèyè mwine, bilondèshilè disanka dîmpè Dyèndè Yèyè mwine dya diswa dyèndè,

113 Disanka bûngì kaayi? Dìvwa ndisanka dya nganyì, bwîmpè bwa nganyì? Bwèndè Yèyè mwine. Disanka dîmpè Dyèndè Yèyè mwine dya diswa Dyèndè Yèyè mwine!

114 Mpindyewu, “diteekiibwa” ncinyì? Mpindyewu ngàngatè eci mpindyewu, ncyèna mumanye ní. . . Ncyàkupeta dîbà dya kufika ku dijikija cyôci eci to, kadi nêmfikè ku dilenga bwalu. Dîbà adi, kwôkò lukonko, nudi mwa kulungeela pashiishe ndambu musangu kumpala mu diyiiha kampanda, cintu kampanda. Tèèlejààyaaku. Diteekiibwa dyebe kî ndilediibwa dyebe to. Diteekiibwa dyebe ndishikikiibwa dyebe. Paùvwà mulediibwa cyakabidi apu, Yone 1.17, ngeela meeji, patùdi tulediibwa ku Nyuma wa Nzambi, tudi bânà bàà Nzambi. Kadi tuvwa badyànjlila kulongolola. Mpindyewu cîndi nteeta bwa mêmè kunufikishaku ncyôci eci, bwa bânà bàà ku dituku dya ndekeelu aba, nudi numona’s, ku. . . Nwamonu anyi? Tuvwa badyànjlila kulongolola bwa (ku) diteekiibwa.

115 Mpindyewu, mpindyewu’s ki twètù aba. Mpindyewu, eci ki cìdi cìtâpa ndambu beena Mpenta ku mwoyi. Bôbò bàdi bàmba ne: “Ngààlediibù cyakabidi! Mukalenge atumbe, ngààpeci

Nyuma Mwîmpè!” Bîmpè. Wêwè udi mwânà wa Nzambi. Ncya bushuwa. Kadi kí ng’aci ncîndi ngamba to. Nwamonu’s, nuvwa badyànjila kulongolola ku diteekiibwa. Diteeka, ndishikika dya mwânà.

116 Ndi mutàmbe kwikala pabwîpi ne cyôci aci, bwalu Becky ùvwa ùngambila ne ntu ntamba kufika pabwîpi naaci, mu mushindu wà kanùyi mwa kuumvwa paanyima apu to. Ndi . . .

117 Nwamonu’s, mwânà. Mbanganyi bàdiku bamanyè bilele bya diteekiibwa mu Dipungila Dikulukulu? Mu bushuwa bwa bwalu, nwênù nukààdikù anu batangile. Mwânà wa balume ùvwa ùlediibwa. Ngeela meeji ne ndi naaci mu diyishiha kampanda. Ncinyi ciine aci, Gene, udi muvuluke anyi? Cìdi pa mukaba wà mèyi. Kaa, cìvwa ncinyi? Ndi—ndi—ndi—ndi mucilengè. Kaa, eyowa’s, ndi naaci: *Mutèèlèjaayi Yèyè. Mutèèlèjaayi Yèyè*; diteekiibwa dya bânà.

118 Mpindyewu, mu Dipungila Dikulukulu, pàvwà—pàvwà mwânà ùlediibwa mu dîkù, ùvwa mmwânà pàvwaye ùlediibwa apu, bwalu ùvwa ùlediibwa kùdi baledi bèndè. Ùvwa mmwânà wa balume wa dîkù adi ne mupyanyi wa bintu byônso. Mpindyewu, mwânà wa balume ewu ùvwa ùkoleshiibwa kùdi bandeji. Galàtiyà, nshapita mwi5, mvensa wa 17 too ne ku wa 25. Eyo. Ùvwa ùkoleshiibwa kùdi bandeji, bakoleshi, balongeshi. Mpindyewu, cileejilu, bu mêmè ne mwânà wa balume mulediibwe, twàmbè ne, ndi taatù ne . . .

119 Nenku ki bwa cinyi mu Roi Jacques, mbanganyi bàkaadiku beele meeji ku cyôci aci ne ncya cikèmesha bikole pàdîbo bàcîbala mu Nkùdimwinu wa Roi Jacques, mwambè ne: “Mu nzubu wa Taatù Wanyi mùdi mabàlaasà àbûngi” awu? Mu nzubu, mabàlaasà àbûngi. Nwamonu anyi? Cya bushuwa, mu—mu matuku àvwà Bible mukudimunyiibwe bwa Roi Jacques, *nzubu* ùvwa “ncitùpà cya buloba.” “Mu *citùpà cya buloba* cya Taatù Wanyi mùdi mabàlaasà àbûngi.” Kí nne mu nzubu, mabàlaasà to, kadi Yèyè ùvwa ùbîikidiibwa ne n’Taatu wa citùpà cya buloba eci. Bôbò bàvwà bacyângate anu cya Bible menemene, mu Bible mushindu awu ngùdîbi.

120 Pàvwà taatù kampanda ne ferme munene menemene wa hectares binunu, anyi cintu cikwabo kampanda, ùvwa ne musumbà wà bantu basòmbèle lwà *apa*. Ùvwa ne beena mudimu bàà difutu basòmbèle lwà *apa* bwa kwikala kutangila mikooko, ùvwa ne bamwe lwà *apa* bwa kwikala kutangila ngombe, ùvwa ne bamwe lwà *apa* bàvwà bàya ku mpàtà uvwa kumutu kwàka mu ntanta wa nkama ya kilòmèètà, ne ùvwa ne bamwe lwà *apa* munkaci mwa kutangila mbuji, ne ùvwa ne bamwe munkaci mwa kutangila mpunda ne—ne bintu bishiileshiilàngàne. Yèyè—yèyè ùvwa anu ne bukalenge bunene. Nenku yèyè ùvwa ùbànda pa kampundu kèndè kakese ne ùya wènda wèndakana mu cyônso cya ku byôbi abi bwa kumona ne bàvwà bishi, dikosa dya myôsa

ya mikooko ne byònsò bya mushindu awu. Yèyè kàvwakù ne dibà . . .

121 Kanwena mwa kungumvwa pândi nya kule ne mwaba awu to. Nê—nê—nêntete bwa kushàadila lwà paanyima apa. Nudi mwa kungumvwa bîmpè mpindyewu anyi, apa nunku? Tàngilàayi.

122 Yèyè ùvwa ùbàndapù ùya, ùya kule, ùteeta bwa—bwa kutangila bukalenge bwèndè—bwèndè. Pa nanku yèyè mmuswe mpindyewu . . . Mwanèndè wa balume awu ngwikala mupyanyi wa byònsò bidiyè naabi abi. Yèyè ki mupyanyi.

123 Nenu patùdi tulediibwa mu Bukalenge bwa Nzambi, ku Yesu Kilisto, tudi bapyanyi bàà Dyulu, bapyanyi pamwe ne Yesu, bwalu Yèyè wàkangata kaaba keetu. Yèyè wàkalwa twètù (mpekaatu), bwa twètù kulwa Yèyè (bwakane). Nwamonu anyi? Yèyè wàkalwa mèmè bwa mèmè kulwa Yèyè, nwamonu's, bapyanyi pamwe Nende. Eyo, mpindyewu nwavulukaayi aci, yònsò wa kunùdi.

124 Mpindyewu, vùlukàayi ne, Nzambi ngwàkadyànjila kukulongolola, ku didyànjila-kumanya, bwa ne wèwè uvwa ulwa ku Cyôci eci. Muntu yònsò udi ucyumvwa, àlè cyanza muulu, nwamonu's. Nzambi, ku didyànjila-kumanya, wàkadyànjila kukulongolola bwa wèwè kulwa ku Buloba bulaya. Bwa mwena Kilisto leelu ewu Buloba bulaya ncinyi? Ela anu cyanza muulu cyanààna pawikalà mumanye. “Mulayi wùdi kunùdi nwènù ne kùdi bàna beenu balela, kùdi aba bàdi kule. Nebyenzekè ne mu matuku a ndekeelu ne, mùdi Nzambi wamba, Nèngiucikijè Nyuma Wanyi pa mubidi wònsò, bàna beenu balela bàà balume ne bàà bakaji.” Ne mu Yeshàayi 28.18: “Kanungu kàdi ne cya kwikala pa kanungu, mulongo pa mulongo; ndambu apa, ndambu pàapa. Shààlaayi bakwate bikole ku cidì cîmpè. Bwalu ku mishiku yidì yikukuminà ne mu myakulu mikwabo ki kùNgààkwilà ne cisàmbà eci. Ne Diikisha ndyôdi edi, diine—diine Diikisha adi's mbuloba bwa nsabatu bùMvwà mwambe ne mbùvwà bùkèngelà bwa kubwelabo. Kabidi, bwa byònsò ebi, kî mbaswe kuteeleja to, kadi mbakùpe mitu ne buumuke bayè, ne kî mbaswe kuCiteeleja to.” Nwamonu anyi? Menemene.

125 Cìvwa ncinyi? Anu menemene mùvwà bantu bààkendà njila mujimà kuumukila ku Kaanààna, anyi kuumukila ku Ejiipitu abu, njila mujimà bapicile mu cipeela, ne kufiikabo anu pabwîpi menemene, pabwîpi anu pàà bikùmbàne bya bàlabula tumuma twa mvinyo twàkapàtukà mu bwine buloba abu atu. Mwaneetu, mwaba awu, bantu abu mbaswe bwa mèmè kuumusha cyôci aci, cya pa Ebelu 6 aci. Ndiku mèmè mwa kucyenza munyi? Beena kwitabuuja bàà ku mikàlu abu, bôbò kabaakusabukaku to! Kabeena mwa kusabuka to. Yesu ngudi mwambe ne: “Bwetu . . .”

Bààkamba ne: “Bankambwa beetu’s bààkadyà manà mu cipeela.”

¹²⁶ Ki Yesu kwambaYe ne: “Bôbò abu, muntu ne muntu, s’mbafwe.” Mbwena kwamba ne mbatapuluke. Bôbò abu, muntu ne muntu, s’mbafwe. Ncya bushuwa. KwambaYe ne: “Kadi Mêmè ndi Dyâmpà dya Mwoyi didi difùme mu Dyulu kùdi Nzambi. Muntu udi udyà Dyâmpà edi, yêyè kààdyàkufwàku to. Ncya bushuwa. Eyowa’s, mukalenge, yêyè ùdi ne Mwoyi wà Cyendèlèlèlè yêyè mudye Eci, Mêmè ndi Muci wà Mwoyi wà mu budimi bwa Èdènà awu.”

¹²⁷ Mpindyewu, nwamonu’s, bantu aba bàdi bàlwa too ne pabwípì menemene! Nwamonu’s, bu nwênù mwa kumona mu Ebelu 6, kî nne ndi ngaalukila ku cyôci aci to, kadi mu Ebelu 6: “Bantu aba musangu kampanda balwè baabanyanganyi, balwè pabwípì menemene, ne balabùle dipà dya ku Dyulu.” Bôbò kusòmba, kumonabo dyondopa dyènjiibwa, kumonabo bantu mu bukole bwa Nzambi, kumonabo nsòmbelu mishintuluke, kadi kabàyi baswe kuKùlenga to. To, mukalenge. To, mukalenge. “Ne balabùle bukole bwa buloba bùcìvwavwà; ne bu bôbò mwa kuteeta bwa kudyalujulula cyakabidi ku kanyinganyinga, bu mùdibi ne bôbò—ne bôbò mbapoopèle cyakabidi bwa bôbò biine Mwânà wa Nzambi pa nkuruse, ne babalè Mashi a cipungidi àvwàba bajidiibwe naawu. . . .”

¹²⁸ “Mêmè ndi wa mu ekeleeziya udi witabuuja dijidiibwa.” Aci ncîmpè too ne pàdici cikafika apu, kadi wèwè kwèna uya ntàntà bule bukùmbàne to. Nwamonu anyi? Eyowa’s, mukalenge. Cipeela ncyàkabàjidilà. Eyowa, bushuwa. Bàvwa ne—bàvwa ne nyoka wa cyamu cya kabanda ne—ne cyoshelu cya cyamu cya kabanda, ne byònsò kuntwaku, dijidiibwa, kadi bààkabwela mu Palestine bwa diikisha. Kî. . .

¹²⁹ Tàngilàayi mu Ebelu 4, yêyè kî mmwambeku ne “Diikisha dikwabo” anyi? Nzambi wàkafùka dituku dya mwandamutekete ne Wàkabàpèèsha diikisha mu dituku dya mwandamutekete. Mu mukwabo mwaba yêyè mmwakule bwa dituku dya diikisha, “ne leelu mu Davidi.” Pashiishe Yêyè kubapeesha Diikisha dikwabo ne: “Lwâyi kùNdì nwênù bònsò bàdi bènza mudimu mukole ne bambùle majitu makole, Mêmè nènùnupèèshè Diikisha.” Bwelàayi mu dyôdi Diikisha edi! Bwalu twètù bàdi babwelè mu dyôdi Diikisha edi tukàadi balekèle midimu yetu bu mwàkalekelà Nzambi Yèndè mu dya nsabatu. Cya bushuwa’s. Ki dyenu Diikisha dya Nsabatu ndyôdi adi. Ki dyenu Diikisha dilelela ndyôdi adi mu Buloba bulaya ebu.

¹³⁰ Nyuma Mwîmpè mmulayi kùdi cisàmbà. Kadi ncinyi cyàkakèbelèbo bayiishi balongè tulaasa bàà dimanya dya ngwengwengwe, bàbàlekelà bàvwàla tuputulu ne bàkòsa nsuki yabo, bàlaaba kàpèntà kàà ku mishiku, ne balume bàdi bànàya manayi a twarta twa mfranga ne bànwà maala a bière ne bènza

minèkù, ne bàtùngunuka ne kwenza kwa maalu a lukutukutu mushindu awu, cibi bàdibìikila mùdibo bidimba bya ekeleeziya? Mona's, bôbò nebangate cintu kampanda cya mushindu awu kadi kubenga bulombodi bwa Nyuma Mwímpè! Mona's, Bible's mmwambe ne Diyì dya Nzambi nditwe kutamba mwele wà mvita wà nseke yibidi wùdì wùkòsa too ne mu mufuba, ne mene dijinguludi dya meeji a mu mwoyi. Eyowa's, nansha mene meeji àdì mu meeji!

¹³¹ Nénku twètù banange buloba anyì bintu bya pa buloba, dinanga dya Nzambi kadyena mene munda mwètù nansha. “Bààbùngì mbabiikidiibwe, bakese mbasungudiibwe; bwalu mushiku wà mbelu mmubùmbàkàne, ne njila udi ufila ku Mwoyi mmubùlákàne, kadi nekwikalè anu bakese bààmupetà. Bààbùngì nebalwe kùNdì mu dituku adi, ne nebasombe mu Bukalenge,” mwàkambà Yesu, “pamwe ne Abraham, Izàkà ne Yakòbò. Kadi bàna bàà bukalenge nebiimanshiibwe pambelu, ne nebàmbè ne: ‘Mukalenge, twètù aba katwakenzaku cikampanda mu Dìna Dyebe anyì? Twètù aba katwenaku bayiishe anyì? Twètù aba katùvwakù Docteur *Kampanda* ne Révérend *Kansanga* anyì?’ ‘Kacya Ncítukù munumanye to. Ngumukilaayi apa, nwènù beena mudimu bàà bubi, Ncìvwa munumanye to.’ Kì mbònsò bàdì bàmba ne: ‘Mukalenge,’ bààbwelà to. Kadi ewu udi wenza diswa dya Taatù Wanyì udi mu Dyulu awu, yèyè awu ngudi ubwela.”

¹³² Ki bwalu mbwabu, kubwela kwa mu Buloba bulaya ebu. Tudi tubwelamu bishi? Twètù tudi badyànjila kubulongolwela. Ekeleeziya, ku didyànjila-kumanya dya Nzambi, ùkaadi mudyànjila kulongolola (ku cinyì?) ku buneeme Bwèndè, ku ngàsà Wendè, ku butumbi, ne dikuukwila ne butumbi bwa Nzambi. Papa, musòmbe kwàka ku cibangidilu, mwikàlekù nkààyèndè, kakùyì cintu nansha cimwe ku luseke Lwèndè to, kuswaYe bwa cintu kampanda cìikalè cìMukuukwila, pa nanku kudyànjilaYe kuteeka mu mudimu ne kudyànjila kulongolola Ekeleeziya kampanda, ne kumpala kwa difuka dya dyulu ne buloba, ne kufundaYe mènà abo mu Mukanda wà Mwoyi wà Mwànà wa mukooko, pàvwàbo... mushebeya kumpala kwa difuka dya dyulu ne buloba, bwa bààmòna mwa kumweneka ku butumbi Bwèndè ne ku diMusaamuna ku ndekeelu kwa cikondo, piikalà bintu byònsò bidisangishe mu Muntu umwepele, Kilisto Yesu. Yoyòyò! Butumbi's we! Ki mùdici amu. Aci's cidi anu... Nénku's kí cyòci aci mwaba awu mene, mwaneetu wa balume, mwaneetu wa bakaji. Kùumukukù washiya Aci to.

¹³³ Nzambi, ku ngàsà Wendè wa disungula, wàkakubìikila. Nzambi, ku ngàsà Wendè wa disungula, wàkakujidila. Nzambi, ku ngàsà Wendè wa disungula ne ku bukole Bwèndè, wàkakubàtiiza ne kukubweja mu buloba bwa Diikisha ebu. Aba bàdì babwelè mu Diikisha edi mbamane kwimanyika dipambukapambuka dyabo. Mbamane kwimanyika midimu

yabo mwàkiimanyikà Nzambi Yèndè. Bôbò bàdi ne disanka kadìyi kwamba, ne dyûle tente ne butumbi! Muci wà Mwoyi wùdi munkaci mwa kwela bilôngò munda mwabo. Bàdi ne mwoyi-mule, ne ditalala dya maalu, bwîmpè, lutuulu luvwiijîbwe diitabuuja, diitabuuja, bupole, ditalala dya maalu, ne bikwabo. Muci wà Mwoyi wùdi munkaci mwa kwela bilôngò munda mwabo bwalu dyabo ditekemena ndyele lwongò mu Kilisto Yesu, bujaadiki bwa Nyuma Mwîmpè munkaci mwa kujaadiki pamwe ne bimanyinu ne maalu a kukema bidì bifila beena kwitabuuja ne: “Bimanyinu ebi nebifile bàdi bìtabuuja.” Pàdîbo bènda bàya apu, bàdi bôndopa babeedi, bàdi bìpata baadémons, bàdi bàakula mu myakulu, bàdi bàmona bikeena-kumona. Bàdi...Ne bôbò bàdi bènda pamwe ne Nzambi, bàdi bàyiikila ne Nzambi. Démon nansha umwe kênàku mwa kubanyungisha to, bôbò mbashimâte, bàkèba...?...Biikàle bàpwa mwoyi bintu bikaadi bimane kupita abi, bàdi bàkolesha batàngile ku kiipacila kàà dibiiikila ditùmbuke mu Kilisto Yesu. S’ki bôbò abu. S’ki bôbò abu. Ekeleeziya awu nyawu.

¹³⁴ Mbakafike kwine aku bishi? Kwèna mwa kwamba ne: “Ee, Mukalenge, Wèwè’s udi mumanye ne, dîngà dituku ngâkabanga kunwa bifwanka, nenku mêmè kudishinda, pashiishe mêmè kudyambidila mùmvwà mufwànyîne. . .” Kaa, to, to, to, to.

¹³⁵ Didyànjila-kulongolola! Yèyè ngwâkatùbiikila, ne patùdi baMulondè ki patùdi twamba ne: “Nzambi, tuvwa bajîmine ne banyangûke. Katùvwakù mene ne meeji a kudisungila twètù biine to. Tuvwa ne ngiikàdilù wa ngulube, tuvwa ngulube anu kwine kwônso aku.”

¹³⁶ Wèwè udi uya ku lupangu lwà ngulube ne utàngila ngulube mukaji mukole, wamba ne: “Mpindyewu, tangila kuneeku, wèwè ciimaamù cikulakaji eci, ndi muswe nkwambile bwalu. Mbibi paùdi unwa mâyi a bucyafu.”

¹³⁷ Yèyè’s mmufwànyîne kwamba ne: “Ngwêng-ngwêng.” Nwamonu anyi? Mpindyewu, ki mùdi pèèbe mwà kudisungila nkàyeebe mmwamù. Ki cyôci menemene.

¹³⁸ Wèwè udi wamba ne: “Inâbânzà, kabivwa bikèngela bwa wèwè kuvwala bilàmbà mushindu awu to, bivwa bikèngela wèwè kuvwalaku ne mankenda. Bivwa bikèngela wèwè kwenza *cikampanda*. Kabivwa bikèngela kwikala uya ku...Kabivwa bikèngela wèwè kwikala wenza manayi a twarta aa to. Kabivwa bikèngela wèwè kwikala unwa mfwanka to. Kabivwa bikèngela wèwè kwikala wenza *cikampanda* to. Mukalenge, kabivwa bikèngela wèwè kwikala wambula *cikansanga* to.”

¹³⁹ Yèyè wamba ne: “Ngwêng-ngwêng, mêmè ndi wa mu *Ngwêng-ngwêng*.” Uh-huh. “Ngwêng,” aci’s cidi anu bu ne ki cyèndè pèndè cidìye mumanye. “Ee, ndi nkwambila ne mêmè ndi mwîmpè anu mùdi wèwè amu. Ngwêng-ngwêng!” Nwamonu’s, bàdi bàbènga bulombodi bwa Nyuma Mwîmpè, bwalu Bible

mmwambe ne wêwè munange maalu a pa buloba anyi bintu bya pa buloba, dinanga dya Nzambi kadyena nansha munda mwebe to.

140 Cìdì cibàvwijà bàà pabwàbò ncinyi? Nwénù's nudi ditunga dya cijila. Cinùdì benze ncinyi? Nudi bapatuke mu buloba abu. Nukààdi nusanganyiibwa mu Buloba bukwabo mwamwa. Nudi bakafike mwine amu bishi? Ki Buloba bulaya mbwôbù abu. Mmulayi wà mushindu kaayi awu? “Nebyenzeke mu matuku a ndekeelu, mùdì Nzambi wàmba, Nèngìcikijè Nyuma Wanyì pa mubidi wònsò.” Ku Nyuma umwepele nkutùdì bònsò babàtìjìibwe mu Buloba bulaya bumwepele ebu. Amen. Bàna beetu bàà balume ne bàà bakaji, aleluuyah, ne bukezuke bwa mwoyi, mukawu nansha mukese, lukunà nansha lukese, kantu nansha kamwe! Nansha byôbì ne mwaneetu mmupambuke, cìdiye wènza nansha ciikàle cinyi, wêwè neuye anu wenda ukebangana nende.

141 Mvwa muye ngenda nkebangana ne mwaneetu wa balume kampana kî nkwanji kwenza ntanta to, uvwa mupambuke. Nsongààlùmè kampana kungambilaye, wàmba ne: “Lekèlà muntu udi mupange kaneemu bwa bakwabo awu àye kùyaayàye. Mulekèlè's.”

142 Mémè kwamba ne: “Mémè anu mudidinge mukafike mu mushindu wà mwoyi wànyì kawùciyi wènda pamwe ne mwaneetu to, dîbà adi ki didi dikèngela bwa mémè kuya ku cyoshelu, bwalu ngààpangìdì ngàsà.” Mémè kwamba ne: “Mémè nénye dîbà dyònsò dicidiyekù anu ne mweyelu mu mubidi wèndè adi, nenku nèmmubàkwilè mwaba kampana mu njila amu.” Eyowa's, mukalenge. Ki mémè kumubakula's, aleluuyah, ne kumwaluja. Eyowa's, mukalenge. Yèyè's ùkaadi mwalukile mu cikùmbì ne dikubiibwa dyònsò patùdì twakulangana apa. Eyowa's, mukalenge. Yèyè nunku's mmupambuke cya bushuwa anu mùdì bulobakù emu.

143 Kwènji cikondo kampana pâmvwà mumone mukaji mukese mukwatè ne bya luse awu musòmbe mwaba awu, ki munene wa bampulushi kumbiikilaye, kwambaye ne: “Mona's, s'òvwa bìkèngela kwikalaye muvwale kankooci kàà bapàlè's.” Yèyè ne: “Ùdi anu musalàkàne lungenyi cyanàànà, mmujimije lungenyi.” Yèyè—yèyè, mbamuteeke mu nzubu wa cilààla-beenyi. Mbalwe.

Mémè kwamba ne: “Aci's mbîmpè.”

144 Yèyè ne, munene wa bampulushi awu kwambaye ne: “Mona's, Billy!” Mémè ntu mumumanye bîmpè menemene, ne mumumanye kacya anu pàncivwà mwànà. Kwambaye ne: “Kwòkù cintu cîndiku mwa kwenza bwa kukwambulwisha's.”

Mémè kwamba ne: “Aci's mbîmpè.”

Yèyè ne: “Wèwè udiku mwa kumwambulwisha anyi?”

Mêmè ne: “To, kadi Yèyè ngudi mwa kumwambulwisha.”
Mêmè ne: “Anji indila kakese.”

145 Pa nanku kupatukabo nende pambelu apu. Kadi pùmùkù mukaji awu kùkaadi katanci, mmu ditalala. Cìvwa ncinyi? Tuvwa batume disambila bwa kumulonda. Amen! Yèyè ùvwa mu mushindu wà ne. . .

146 Kwambabo ne: “Udi muswe kwangata ngangabuka anyi?”
Bòbò kwambila bàyendè ne: “Udi muswe kwangata ngangabuka anyi?”

147 Yèyè ne: “Ngangabuka kèna ne cidiye mwa kwenza bwèndè yèyè nansha cimwe to.” Ne aci ncyà bushuwa. Yèyè mmupàle; ngangabuka kèna ne cidiye mwa kwenza bwèndè yèyè nansha cimwe to.

Kwambaye ne: “Dyetu ditekemena dimwepele didi anu kufika kwàka.”

Ki kwambaye ne: “Billy, ncyèna ngumvwa aci to.”

Mêmè ne: “Ncyèna ntekemena bwa ne wèwè newùmvwè to,”
nwamonu’s, “ncyèna ntekemena bwa ne wèwè newùmvwè to.”

148 Kadi, kaa, ekelekele, nansha mêmè ncyèna ncyumvwa to! To. Kadi, mwaneetu, Nzambi mu Dyulu. . . Mvwa pàànyì muye kwàka kule, musangu kampanda, Cintu kampanda cyàkandonda. Amen! Kacivwa ne mbwalu mvwa muswe kulwa to, kadi, to, Cintu kampanda cyàkandonda. Bwalu kumpala kwa difuka dya dyulu ne buloba, Nzambi wàkadyànjlila kulongolola, aleluuya, bwa ne twètù tuvwa mwa kwikala Bèndè Yèyè, bwa buneeme ne butumbi Bwèndè. Tèèlejàayi! Aba bàakadyànjlilàYe kumanya, Yèyè mmwenze cinyi? Wàkabiikila. Ncyà bushuwa anyi? Yèyè mmukubiikile anyi? Eyowa! M’Mukubiikile bwa cinyi? Yèyè wàkadyànjlila kukumanya. Aba bàakadyànjlilàYe kumanya abu, mMubabiikile; aba bàdiYe mubiikile, mMubàbingishe. Ncyà bushuwa anyi? Ne aba bàdiYe mubingishe, mMubatumbishe! Amen! Aci ncidi Bible mwambe ne: “Aba bàakadyànjlilàYe kumanya, Wàkabàbiikila.” Lukongo ne lukongo lwònsò! Aba bàakabiikilàYe, Yèyè ùkaadi mumane kubatumbisha. Cinyi? Ngànji mbalebi Mufundu ewu. Eyo.

Mudyànjlile kubalongolola bòbò ku diteekiibwa dya bânà ku Yesu Kilisto kùdiye yèyè mwine, bilondèshile disanka dîmpè Dyèndè Yèyè Mwine. . .

Ku disaamuna dya butumbi Bwèndè. . .

149 Kaa, nudi ncyumvwa anyi? Ku disaamuna dya butumbi Bwèndè! Bwa Wàmòna mwa kusòmba mwaba awu mu bikondo bya Cyèndèlèlè bìdi ne cya kutùngunuka byènda bìya, ne bânà Bèndè bàvwa ne cya kwela lubila lukole ne: “Abba, Taatù! Abba, Taatù!”

150 Ne Banjelo bàmba ne: “Cidìbo bàmba ncinyi? Cidìbo bàmba ncinyi?”

151 Ncileeejiibwe bilenga bya dikema mu mwânà mutuulavi wa mfranga. “Mvwa mujimine.” “Ewu mmwanàanyi. Ûvwa mujimine kadi mpindyewu wàpetèkì. Ûvwa mufwe, kadi ùdi ne mwoyi cyakabidi. Lwâyi ne kânà kàà ngombe kàà maanyi, muzàbì wà mutàmbe bulenga, ne mpètà bwa numwele ku munu. Nenku twènzàayi. . .” Kì mbya dyela mpatà to mùvwà mitooto ya mu dinda mimbe pamwe, bânà bàà Nzambi beelè mbila ya disanka, pààkamònàbo ndongamu wa lupandu, Nzambi ùfùnda dînà dyebe mu Mukanda kumpala kwa difuka dya dyulu ne buloba.

152 Mpindyewu wêwè udi wamba ne: “Calvin’s ùvwa wìtabuuja cintu cya mushindu awu.” Mémè ncitu mwitabuuje Calvin nansha. Calvin ùvwa mushebeyanganyi. Calvin wàkashebeya muntu ne bwalu ùvwa ùbàtiiza mu Dînà dya Yesu. Yèyè ùvwa muntu mupange kaneemu bwa bakwabo, bìkèngela bwa akudimwishiibwe mucima, yèyè mwine awu. Eyowa’s, mukalenge. Kadi byàkambàye, pa bimwe bya ku bintu byàkambàye, abi kaayi bìvwa bilelela. Kanwìkadi. . .kadi civwàye. . .Cyenzedi cyèndè, muntu wa ùshebeya muntu bwa cintu bu nanku, aci’s ncyà cìkwàcisha bwòwà’s, aci’s ncibi. Eyo.

Bìdiye mutuwudijile ku. . .

153 Kaa, indilaayi, ncyèna mukalengè ku “diteekiibwa” adi to, mmwômò anyi? Dìbà dikaadi dimpite bikole anyi? Tùmonàayi bì tũng cìdì ntanku udi kuulu eku ewu ùleeja, dìbà ditùkaadi. Eyo. Twàngatàayi anu—anu tusunsa dikumi cyanàànà bwa bantu bàdì bafumine ku ntanta buleyi aba. Tàngilàayi. Tàngilàayi.

154 “Diteekiibwa,” lekelaayi nnuleeje ne mbwa cinyi didi dyènjiibwa mpindyewu. Taatù kampana ùdi ne bukalenge bunene, ùnyùngulukamù mubànde pa kabalu. Mpindyewu bààmulelèdì mwânà wa balume. Kaa, yèyè ùdi ne disanka diyila ne panshi! (Kì Nzambi awu.) Pa nanku nudi bamanye cìdì taatù awu wènzà anyi? Ùdi ùpeta mukoleshi wa mutàmbe bwìmpè, ndeji. Nwènu nudi bamanye ne ndeji nganyi, kì mmwômò anyi? Mmulongeshi wa kalaasa. Ùdi ùpeta mulongeshi wa kalaasawa mutàmbe bwìmpè menemene udiyè mwa kupeta mu ditunga dijimà awu. (Nenku dìbà adi tudi twenda tuya mpindyewu, tèelejàayi.) Nenku yèyè ùdi ùpeta mulongeshi wa kalaasa wa mutàmbe bwìmpè udiyè mwa kupeta awu. Yèyè kèna wàngata anu cidindingi nàka eci to, yèyè mmuswe bwa mwanèndè wa balume awu kwikalaye muntu wa nsongo.

155 Nwènu kanwenaayiku baswe bwa beenu bânà kwikalabo mushindu awu anyi? Cya bushuwa’s, cya citàmbe bwìmpè cinùdiku mwa kubapeesha aci! Eyowa’s, mukalenge. Pa nanku pìikalà muntu wa mubidi mwa kwela awu meeji, nudiku nwela meeji kaayi bwa cìdì Nzambi wèla meeji bwa Bèndè bânà? Citàmbe bwìmpè cìdìYe mufwànyine kupeta aci’s.

156 Pa nanku, yêyè mmuswe muntu wíkala ne meeji matooke. Mpindyewu, yêyè kî mmuswe bwa muntu kwambaye ne. . . kî mmuswe muntu wa wàmba ne: “Mpindyewu, tangila, mêmè—mêmè. . . Junior, enza wêwè anu cintu kanà cyònsò cyùdi muswe kwenza aci, munanga wanyi” to. “Kaa, eyowa’s, taatù, uh-huh, yêyè ùdi bîmpè, yêyè mmwànà mulenga.” Bàmutuutakù kaadipi pa mwongo apu ne disàlà dyasa ku cifulu. To, to. Awu muntu’s mmufwànyine kwipaciibwa ku mudimu anu mpindyewu mene. Bushuwa’s. Yêyè mmuswe muntu wíkala mwambi wa bulelela. Pìikalà mwána awu ùlwa mululame, mwambìle. Yêyè kàyi ulwa mululame to, mwambìle cìdi kacìyi cyènda bîmpè aci.

157 Kadi pìikalà taatù wa pa buloba wèla meeji awu. . . Wêwè kwênàku mufwànyine kuswa bwa muntu kwikalaye wa meeji matooke kùdi, bwa mulongeshi wa kalaasa awu kwikalaye wa meeji matooke pa bìdi bitàngilà bânà beebe anyi? Cya bushuwa’s. Ee, udi welaku meeji ne Nzambi ùdi wèla meeji kaayi? Ne Yêyè’s mmumanye; twètù katwena bamanye to, Yêyè mmumanye. Twètù tudi ne mikàlù, katwena bafwànyine kumanya to. Kàdi Yêyè kèna ne mikàlù to ne mmumanye cya bushuwa.

158 Pa nanku, nudi bamanye cìdi Taatù mwenge anyi? Kacya Yêyè kàtukù mwambe ne: “Nêngàngatè paapà kampanda bwa kutangilaye bânà Bàànyì” to. Anyi Kàtukù mwambe ne: “Nêngàngatè mwe—mwepiskopo kampanda” to. To, to. Yêyè kààkenzakù aci to, bwalu Ùvwa mumanye ne paapà neatupakane, nansha mwepiskopo kabidi. Nwamonu anyi? Kacya Yêyè kàtukù mwambe ne: “Nêngàngatè mutangidi wa bònsò bwa kutangilaye ekeleeziya Yànyì” to. To, to.

159 Yêyè mmwangate Nyuma Mwîmpè. Ki uvwa Wendè Ndeji, uh-huh, bwa kukolesha bânà Bèndè. Eyo. Dìbà adi mmunyi mùdi mufwànyine kumanya ne Nyuma Mwîmpè mmucimanye? Yêyè ùdi wàkwila ku mishiku ya buntu. Mmunyi mùdi wêwè mumanye ne Yêyè ùdi wàmba Bulelela? Paùdi umona Nyuma Mwîmpè wàkwila ku mishiku yìdi yàmba Bulelela anu menemene misangu yònsò, yidyànjlila kwamba ne pààbì byènzeka anu mu byòbì menemene, mwàkambà Samwèlè, dìbà adi’s udi umanya ne m’Bulelela. Cìdi cilwa anu cilelela. Bwalu Nzambi wàkamba ne: “Yêyè wàkula kadi cidiye wàmba kacìyi cyènzeka to, kanumuteeleji to, bwalu Mêmè Mêmè ncyèna nende nansha. Kadi yêyè wàmba cintu cyènzeka, ee, dìbà adi numuteelejaayi, bwalu Mêmè ndi nende.” Nwamonu anyi? Ki bwalu mbwòbù abu. Mushindu awu gùdiYe wènza.

160 Mpindyewu, dìbà adi Yêyè ùdi wèndakana eku ne eku. Mpindyewu, nudi nwela meeji ne Ndeji awu mmufwànyine kù kwamba cinyi bu byòbì mwa kukèngela bwa kuyaYe kùdi Taatù aku? Bwa kwambaYe ne: “Bânà Beebe—Beebe bàdi bènza maalu mu mushindu mubi be. Nyawu nKwambila’s, mwan’Ebe wa balume awu, yêyè, hum, s’mmuntu mupidye diitabuuja. Yêyè’s ncijijibùlùndù, kacya mêmè ncitukù mwanjì kumona muntu wa

mushindu wàwa to! Ekelekele, Udi mumanye cìdiye wènza? Ne mwan'Ebe wa bakaji awu! Kaa, yoyòyò, ncyèna mumanye ne ciWikalà mwa kwenza nende ncinyi to. Hmm. Ee, Udi mumanye cìdi bwalu? Mmumweke anu bu ne yèyè. . . Mmudilaabe bilaabu bya kwisù anu mùdi bamwe bàà ku bàna bàà bakaji bàdi kwàka bàba. Mwena Pelèshètè. Eyowa's, Mukalenge, yèyè mmuswe kwikala wènza maalu anu mùdìbò bènza bòbò amu."

"Mwan'Àanyi Mémè wa bakaji?"

161 "Eyowa, s'mmwan'Ebe wa bakaji awu." Ki cìdi Nyuma Mwímpè mwenzèjìbwe bwa kwamba bwa ekeleeziya leelu ewu ncyòci aci. Kabyena bikemesha to patùdi katùyikù mwa kupeta ditabulujá. Nwamonu anyi? Mpindyewu, aci's ncilelela.

"Kadi bishi bwa mwan'Ebe wa balume yèyè? Huh? S'ncintu anu cyòci cimwecimwe aci."

"Cinyi?"

162 "Ee, Wèwè's udi mumanye ne Ukàadi misangu yònsò mwambàmbe ne bìdi bikèngela bwa mikooko ayi kwikalayi yìdiila mu mpàtà udi kuntu kwàka wàwa yìdya Cyakudya cya mikooko cyàcya nàka. Eyowa's, Udi mumanye cìdiye mwenze? Mmujuuke kadi kuyisaka kuya naayi mu mushiki wà bisoosa bibi wàwa. Mmujuuke kuya anu kwinsi kwàka mùdiye mukayilekèlèlàngàne yònsò mu kasulu kàka, ne muyilekele milààle lwà ku mushiki wà bisoosa bibi byàbya, munkaci mwa kudya bisoosa bya twèbà byàbya, ne yòyi yikaadi minyaanùnùkàngàne yònsò mu mushindu wà ne bikaadi bìyikolela bwa kupàtukamù." Abu's mbeepiskopo, bampaasata bàdi bàvila Bukole bwàci abu. "Ee, Ndi nKwambila bulelela, Ncítukù mwanji kumona cisumbu cya mikooko mibindùlùke ya mushindu wàwa to kacya bàNdelà." Yèyè kàtu musweku aci to. To. "Kadi Udi mumanye mùdi bwalu? Ngombe yìdi apa eyi, Wèwè's udi mumanye ne Utu—Utu mubàmbile bwa kwikalabo bayidisha lutende lùdi pàapa lwàlwa—lwàlwa, Udi mumanye's, bwa kuyidundishalu?"

"Eyowa."

"Udi mumanye cìdiye yèyè uyìdiisha anyi?"

"To."

163 "Mingòngà mikulakaji ayi. Eyowa. Yèyè ùdi ùbàsàka ku diya kashàala bàà mu tusumbu twa bantu basunguluke ne bikwabo byònsò. Kacya Wèwè kùtukù mwanji kumona cya nàka to kacya bààKulela. Wèwè kùtukù mwanji kumona cya nàka to kacya bààKulela. Udi mumanye cìdiye wènza? Ùpàtuka kwàka wènda ùnwa cifwanka cinène, mwalukile cyanyima. Ùdi wàngata mukàjèndè bènda bèndakana nende, mukaji muvwale kaputulú anu mùtù twena Pelèshètè atu tùvwàla pambelu pàapa amu. Eyowa's." Mukenji wà mushindu awu ki wùdi Nyuma Mwímpè

mwenzèjùibwe bwa kutwàla pa bidì bitàngila ekeleeziya leelu ewu. Mpindyewu, nudi peenu nwela meeji kaayi bwa ciine aci?

164 Ki diteekiibwa ndyôdi adi. CidìYe . . cyàkenzàYe ncinyi? Wàkadyànjila kutulongolola twètù—twètù ku diteekiibwa. Yèyè mmutupeshe Nyuma Mwímpè; kadi, anjì indilaaayi kakese tûng, diteekiibwa, ki citùdi twamba. Diteekiibwa!

165 “Ee, Udi mumanye cidìye wènza? Mwepiskopo awu mmulwe dituku adi, ne kumwambilaye. Yèyè ùvwa ne kaadisangisha kakese kàà dyondopa kàvwàye munkaci mwa kwenza kuntwaku, ki mwepiskopo kuvwilayepu. Muntu kampanda, mwaneetu wa balume kampanda, kuvwilayepu ne ùvwa ùsambidila babeedi. Kadi yèyè kwamba ne: ‘Imanyika abi!’

“Kaa, kaa, eyowa, taatù mwepiskopo, nêngènzè nanku.’

“Kwedyanganyi nende mu diboko nansha.’

“Kaa, to, to, taatù mwepiskopo, ncya bushuwa nanku.’

166 “Kadi ki mèmè kulwa ne kumwambila Bulelela bwa mu Dìyì Dyebe. Wamonu’s, s’ki Bwòbù ebu. Mèmè kumubadila mikenji Yebe anu menemene cìvwà cìkèngela kwenza, kadi yèyè kàyi ùyitèèlejaku to. Kwambaye ne: ‘Kaa, abi’s bìvwà mbya cikondo cikwabo, mwànà wa balume mukwabo wa cikondo cikwabo kampanda. Abi kabyena bwànyi mèmè to.’” S’ki bwalu mbwòbù abu. Aci, mpindyewu aci’s ki Bulelela, mulunda wanyi. Mpindyewu kanwenaayiku numona mwaba wùdi ekeleeziya ùpangila dishikikiibwa dyèndè, bwa cinyi katwena bapetè ditabulujà, bwa cinyi katwena ne bintu biikàle bitungunuka anyi? Ki mwaba wùdici cìsanganyiibwa ngòwù awu.

167 Yoshùwà wàmba ne: “Gaadà, ndi muswe bwa wèwè . . . anu mwòmò emu ki mùdi mùsanganyiibwà keebe kaaba bilondèshile dizola, keebe kaaba kàdi kàsanganyiibwa mwaba ewu, mwaba ewu mene. Bwela emu, Gadà, ne ùshaalè mwaba ewu. Wèwè Benyàminà, udi upweka buludi mwaba ewu. Nunku mpindyewu nwènù bônso nùshaalàayi kule ne mukàlù wà beena Pelèshètè.” Dya Yoshùwà wàlukila anyi, ki bôbò aba myaba yônso mu beena Pelèshètè, munkaci mwa kwenza fète munene wa mutooyi wàbùngi, biikàle anu bàtáfunya maja mushindu awu, ne bakaji bônso badilaabe bilaabu kwisù, ne bàja maja ne bàpìcila mu cikondo cya dicyonkomoka. Ki Yoshùwà ùdikoonya ku mutu, wàmba ne: “Mpindyewu cya dyenza ki cinyi?” Mpindyewu cyòci aci menemene ki cidì munkaci mwa kwenzeka; kì mbônso to, Nzambi twasakidila, kì mbônso to, kadi bùngì bupitè’s. Eyo.

168 Mpindyewu cidì munkaci mwa kwenzeka dîbà adi ncinyi? S’ki cyàkenzekà aci. Kanwenaayiku nudifwanyikijila ne Muntu awu, Nyuma Mwímpè, ùdi ùbìnduluka kumpala kwa Taatù pàdìbi bikèngela bwa kwambaYe ciine aci anyi? Kaa, ekelekele! “Ndi—Ndi—Ndi mumwambile, kadi kàyi—kàyi—kàyi anu muswe bwa kuCiteeleja to. Ndi mumwambile cyòci aci, ne mumulekele

mubalè ne mu Mukanda mene amu. Mwwa—mwwa mubiikidisha mwambi mutekete kampanda ne yèyè kumuleeja ne Yesu Kilisto ùdi umwèumwè awu makeelela, leelu, too ne kashidi. Kadi Udi mumanye cìdì bwalu anyi? Kulekelaye umwe wa ku—kulekelaye umwe wa ku balami bàà mbuji bàà kale abu bàlwa mwaba ewu bwa kumwambilabo ne aci cìvwa cya cikondo cikwabo. Wamonu anyi? Wa bwalu yèyè mwine awu ùvwa ùnunka mupuuya mubi be dìbà dyàfikìye mwaba awu adi, ùnunka mupuuya wà mbuji, Udi mumanye's, bifwanka, ne Udi mumanye's, ne bikwabo, ùnunka mupuuya mubi be dìbà dyàfikìye mwaba ewu adi. Wamonu anyi? Kadi Ndi nKwambila's, mulami wa mbuji awu ùvwa ne bitàdì búngì bukumbane bimulamika pambidi pajimà apu, bwalu, Ndi nKwambila's, bu Wèwè mwa kwamba ne ùfundè dìnà dyèndè mu cibejibeji, mbifwànyìne kwangata (dibalulula dya maalu a nsòmbelu wendè's) mbifwànyìne kwangata cyabibidi cimwe cya dibejì bwa kufunda myànzu yèndè. Eyowa's, Mukalenge, ncyà bushuwa ne mbamunange mwine mu citùpa cya buloba aci amu, kadi, Ndi nKwambila, ncyà bushuwa ne yèyè kí mmumanye mwa kudiisha mikooko to. Ki cintu cimwe pa bwalu abu ncyôci aci. Yèyè kèna anu muswe kuNteeleja to," mùdì Nyuma Mwimpè wàmba. "Ndi muteete kumwambila ne Wèwè udi umwèumwè awu makeelela, leelu, too ne kashidi, kadi yèyè—yèyè kèna anu muswe kucyenza to. Yèyè kadi ki cintu citulumuke cya citàmbe bunene cìntùku Mèmè mumone kacya bàNdela. Eyowa. Ne ekeleeziya mmujuuke kadi kumuvwija mutangidì wa bònsò, mwepiskopo, ne bikwabo, bantu bònsò bàmutèèleja yèyè. Kabidi pashiishe Udi mumanye mùdì bwalu? Bàdi bàngata. . . bàdi ne kaacintu kakese kàà kale kuntwaku kàdìbo bàbìikila ne 'télévision.' Udi unyùngululapù kaacintu kakese mushindu ewu, nenku—nenku bakaji abu bàpàtuka mu cyalu ne bènza bintu bya lukutukutu, tunkanzu twa tutùpà twa mishindu yònsò. Kabidi, Udi mumanye's, bààbúngì bàà ku bàna Beebe bàà bakaji mbalengùbw-. . ."

"Kakaa, cya bushuwa ne kí nnanku to!" Nwamonu anyi?

169 Yèyè wàmba ne: "Eyowa's, s'ki cidìbo. Eyowa, s'ki cidìbo bènza. Hum. Bamwe bàà kùdìbo bàdi bàdìla bèèla mbilà bwa kupeta ditàbuluja, Taatù, bamwe bàà kùdìbo bàdi naadi dijinga anu cya bushuwa. Bamwe bàà kùdìbo bàdi cya bushuwa bàlonda njila awu, bamwe bàà kùdìbo mbashààle anu ne lulamatu ku Díyi adi ne mwabo mwònsò. Bakwabo bòbò, Ncyèna mumanye cìdì cìkèngelà kwenza to, bàdi—bàdi anu pambelu menemene pààpa's. Udi mumanye cìdì bakwabo abu bènza anyi? Bàbèèlulwila, bàmba ne: 'Bòbò's bàdi anu musumbà wà bantu bàà lungenyi lusalàkàne.'"

"Ee, aci's cìdì cìmfikisha ku didyumvwa bibi bya dikema's."

170 Kadi mpindyewu twànjàayibi kushintulula cimfwànyì. Mpindyewu Taatù, mwan'Èndè wa balume mmwànà mwimpè. Tatwènde anu—anu dìbà dyònsò, ki Ndeji nyèyè ewu, Nyuma

Mwîmpè. Njila yônsò udi Nyuma Mwîmpè ùleeja awu, Yêyè mwambe ne: “Nêngìikalè mwa kwenda,” Ndeji mwambe ne: “Ndi. . .”

171 Mwânà mwambe ne: “Nêngëndè anu Neebe. Nêngëndè anu Neebe.”

“Kaa, kakuna nkatàmbe kutumbuka bibi be, mwanàanyi.”

172 “Nênye anu Neebe. Ndi ne dyeyemena Kùdì. Mémè mubange kucyoka, Yêyè neanjuule cyanza ne neatungunuke anu ne kunkwata.”

“Kadi’s kùdì nyama ya ntambwe pa kakuna pàapa!”

173 “Kí mbwalu to bu mùdìbi ne Wêwè udi ku luseke lwànyì, kacyna ne cìdici cishintulula to nansha kakese. Ndi mémè ngenda anu Neebe.”

“S’nyawu kùdì ntatu kumutu kwàka, mmbwebwe ya busenu.”

174 “Kí mbwalu to, bu mùdìbi ne Wêwè udi munkwate ku cyanza; mémè nêngëndè anu Neebe. Nêngëndè anu Neebe.”

“Kaa, udi mumanye mùdì bwalu? Tatwèbè’s ùvwa ne ciibidilu cya kwenza nanku, wamonu’s. Abi mbîmpè. Eyowa’s, mukalenge.”

175 Ûbànda ku lusongo lwà kakuna aku. “Kaa,” mwàkambàYe, “Udi mumanye mùdì bwalu anyì, Taatù? Mwan’Ebe wa balume’s ùdì anu wêwè menemene. Kakùyi mpatà to, yêyè ùdì bu Wêwè pyòpyopyò. Dìyi dyònsò dy’Ùdì Wêwè wamba, yêyè ùdì ùtwaKù ‘amen.’ Mvwa—mvwa mumubuulwile mu Bible dituku adi, ne Cyàmba ne: ‘Yesu Kilisto ùdì umwèumwè awu makeelela, leelu, too ne kashidi.’ Udi mumanye cìvwàye mwambe? Kwelaye lubila lukole ne kukùpayè byanza muulu, kwambaye ne: ‘Aleluuyah! Amen!’ Kaa! Ne Wêwè’s udi mumanye ne nCyambe mwab’ewu, mu—mu Dìyi Dyebe emu, Udi mumanye’s, mwaba w’Ùdì mwambe ne: ‘Byenzedi, ewu udi uNgiitabuuja, byenzedi bìNdi ngenza yêyè neàbyènzè pèndè’ awu?”

176 “Eyowa, Ndi mvuluka ne Ndi mufundile mwan’Àanyi wa balume awu Aci. Eyowa, Ndi mvuluka ne Ndi mufunde Aci.”

177 “Kaa, yêyè mmwenze ùmòna anu aci anyì, kwelaye anu lubila lukole ne kutupikaye muulu ne panshi, kutuutaye mukobolo ne: ‘Aleluuyah, Mukalenge. Umushaku maalu a pa buloba ònsò munda mwànyì. Mvwijeku mufwanangane ne Cyôci aci!’ Eyowa’s, Mukalenge. Ne bintu byònsò byàkenzàye abi!”

178 “Kaa,” mwàkacyàmbà Taatù, “Ndi—Ndi ne disanka bwa mwànà wa balume awu. Awu’s mmwànà wa balume mwîmpè maalu. Eyo. Ikàlà ne dîsù pa yêyè munda mwa ndambu wa bidimu, bwa ùmonè mùdiye—bwa ùmonè mùdiye wènda ùkola, ne mùdiye ùtanta.” Paanyima pàà ntanta ki bidimu kupitabi. “Yêyè mwine ùdì wènda ùya bishi?”

179 “Kaa, ekelekele, yêyè’s ùdi mene wênda ùdyunda ne mu ngâsà! Kaa, ekelekele! Yêyè’s ùdi anu . . . Yêyè’s ùdi anu ùyiisha ne mwèndè mwônso kàyi wìkishakù to. Mêmè ndi nKwambila ne, yêyè ùdi—ùdi menemene . . . Mona’s, yêyè ùdi wàngata mikooko ayi, mumanye mwa kuyitangila anu—anu mùtù Wèwè wenza amu. Yêyè kààkuyipèèshakù bisoosa bya pamutu pàà mbû abi to. Yêyè kààkuyipèèshakù bisoosa bya pamutu pàà mbû to. Pàdìyi yìlwa mwaba awu, yàmba ne: ‘Tudi baswe kuya kashàala bàà mu ekeleeziya,’ yêyè ùdi wàmba ne: ‘Bwikilaayi mukana mwenu amu, kí ng’aci cìdì cìnùkèngelà nansha! To, mukalenge. Cìdì cìnùkèngelà ncyôci eci: ‘Nyingalalaayi ne nubatiijibwe, muntu ne muntu wa kunùdì, mu Dìná dya Yesu Kilisto, bwa dilekelediibwa dya mpekaatu yenu. Nenupete kupà kwa Nyuma Mwîmpè.’” Eyowa’s, Mukalenge, ki cyàkambàye ncyôci aci.”

“Kaa, ncyà bushuwa ne ki cìdìye wamba anyi?”

“Eyowa’s, Mukalenge, ncyà bushuwa ne ki cìdìye wamba.”

“Ee, mushindu awu menemene’s ki wùNdì muCifunde.”

“Anu mushindu awu menemene ngùdìye ùCyàmba.”

“Hmm!” Eyowa, mukalenge.

180 “Yimwe ya kùdìyi yìvwa yàmba ne: ‘Shààlaayi mu cimenga cya Yelusàlèrà too ne panwàvwàdikiibwà ne bukole bwa ku Dyulu. Pàànùtùlulukilà Nyuma Mwîmpè, nenwìkalè bantemu Bàànyì mu Yelusàlèrà, mu Yudààya’ ne mu Sàmaalèya, ne mu bitùpà bya kumfudiilu kwa buloba.’ Mmwenze ùbala anu aci anyi, kutuutaye mukòbolo ne: ‘Aleluuyah, ki cìdì cìnùkèngelà ncyôci aci!’ Udi mumanye cìdìye wenza? Ùdi ùkabàfikisha buludi kwòkò aku too ne pàdìbo bàCìpeta, kwajiki, ùshàala anu naabo.

181 “Kadi pàkaadìyi yìbanga kukokangana, yêyè ùdi wàmba ne: ‘Wup, wup, wup, anjì indilaayi kakese, anjì indilaayi kakese. Awu mushindu ngùtù mbuji yènza maalu, kí mmikooko to.’ Nwamonu anyi? Nwamonu anyi? Kaa, míngà misangu yìdì yìdisuuyakù ndambu yìimukwàcila cijìjì, kadi yêyè ùyìtuutakù ndambu tuumapi mu mwongo, wàmba ne: ‘Anjì indilaayiku kakese tùng, sh-sh, sh-sh, sh. Bidi anu bîmpè.’ Yêyè mmumanye cya bushuwa mwa kukontonona mikooko ayi. Eyowa’s, Mukalenge, Ndi nKwambila.

182 “Udi munanye mùdì bwalu? Mêmè kumona Mwepiskopo *Kampanda* wa mutambidile ùmwambila ne yêyè ‘kàvwa mwa kulwa mu cimenga *kampanda* bwa kwenzamu disangisha to.’ Kadi, Udi mumanye’s, Mêmè kumulombolaku mu mushindu *kampanda*, Mêmè kwamba ne: ‘Ndààku anu kuya nansha bishi.’ Wamonu anyi? ‘Umusha mikaba yà mèyì eyi mu cyalu, ne kuyilekedi yipàtuka to.’ Twètù kukùya nansha bishi! Twètù kuya mu byòbì bimenga ebi, yêyè kwamba ne: ‘Ee, katwakutuula mfrang- . . .’

183 “Nenku Udi mumanye’s, dyabulu kuyaye kuntwaku, kwambaye ne: ‘Mémè ndi ndya Neebe lupiku ne ndi mwa kumupangisha bwa kubwela mu cimenga aci.’ Mémè kwamba ne: ‘Kwéna mwa kucyenzaku to. Mémè mumwambile bwa kuyaye, yéyè’s neaye. Ndi ndya neebe lupiku ne yéyè neaye.’ ‘To, to, to, to, to, mémè’s nêmmwambilè. Nênyemù ngâmbè ne: “Mpindyewu, nwênù bônso beena mudimu bàanyi, disangishaayi bônso. Kanwitabiku dikolesha dya maalu nansha dikese muneemu emu nansha, byônso bya dyondopa dya kùdi Nzambi ne bintu byônso bya kale bya Nyuma Mwîmpè abi. Abi byâkamana kushââla paanyima ne bapostolo kûkaadi bidimu. Nwênù’s nudi bamanye ne kî mbîmpè, kuntu kwâka.”’ Ûteeta kubapeesha bisoosa bya pa mbû bya kale abi, bintu byônso bya mushindu awu. Bàdi . . .

184 “Kadi, Udi mumanye mùdi bwalu’s, nansha nanku yéyè kuya anu buludi kuntwaku. Yéyè kuya anu buludi kuntwaku ne kubangaye kukûpa lutende, lwà mu . . . Kadi Udi mumanye mùdi bwalu’s, mikooko ayi kubangayi kudya, kudyundayi ne mwâyì mwônso. Eyowa’s, Mukalenge. Pàdìyi munkaci mwa kupeta dyondopiibwa ne masangisha apu, nenku Udi mumanye’s, yâbúngì ya kùdìyi ya nsongâàlùmè ayi kubangayi. Mona’s, kumonayi ne bu yôyô mwa kudya mushiki munene wà bisoosa bya dyelela nyama bu mùdi lutende alu. Udi mumanye cìdìyi myenze naabi? Bìvwa bilenga bya dikema mu mushindu wà ne yôyi yâkaya lubilu kùdi beena mutumba, kwambayi ne: ‘Anjì labulaayibi Eci! Anjì labulaayibi Eci! Anjì labulaayibi Eci tûng!’ Wamonu’s, cyuyûyâ mwaba awu kuumvwikaci anu mùdi cìdi apa nunku eci’s. S’ki Cyôci aci mwab’ewu. Anu mwab’ewu’s ki Cyôci eci, Wamonu’s. ‘Nyingalalaayi anu cyanâânà, muntu ne muntu wa kunùdi, ne nùbatijibwè mu Dìnà dya Yesu, nwamonu’s, nupete Nyuma Mwîmpè. Cìdi bwa ewu yônso udi muswe, alwe, alwe kaaba aka bwa kumona cìdi Bible mwambe.’ Wamonu anyi? Ne bôbò’s ki kupicilabò mu cikondo cya dicyônkomoka kuntwaku eku.”

185 “Kaa, ki mwan’Àanyi Mémè wa balume nyéyè awu’s! Ki mwan’Àanyi Mémè wa balume nyéyè awu. Ee, Wéwè udi ucinka ne yéyè ûkaadi mubobe mupwile anyi?”

186 “Eyowa. Cya bushuwa’s,” mwâkambâ Nyuma Mwîmpè. “Ndi mumupicishile ku mateeta. Balumyana wa yââyâ, Mémè kumuteetela mu mushindu *kampanda*, kumuteetela mu mushindu *kansanga*. Mémè kumubyankula panshi, ne mâsaamâ, Mémè kumwela cibûlâ. Mémè kumudyatakaja, Mémè kulekela dyabulu ùmwenza byônso bìvwâyè mufwânyîne kumwenza abi, yéyè ùjuukuluka anu kujuukuluka. Kulwaye anu mwine. Wamonu’s, ùjuukuluka. Mémè kumusaamisha. Mémè kwenza *cikampanda*. Mémè kumukûpa mu bulââlù bwa lupitaadi. Mémè kumuvwija apa pânDi mwenze *cikampanda*, pânDi mwenze *cikansanga*. Mémè kusâka mukajëndè bwa âmutombòkèlè, Mémè kusâka beena mutumba nendè bwa bàmutombòkèlè,

Mêmè kwenza byònsò. Abi kî mbishintulule kantu nansha kamwe to. Kwambaye ne: ‘Nansha Yèyè munshebeye, nansha nanku nêntungunukè anu ne kuMweyemena.’ Mêmè kushebeya dîkù dyèndè. Mêmè kwangata *bikampanda*, Mêmè kwenza *bikansanga*, Mêmè kwenza *bikankenga* byònsò, Mêmè kwenza *bikampanda*, *bikansanga*, *bikankenga*. Yèyè ùvwa anu kacya wimana kamungulu ne: ‘Nansha Yèyè munshebeye, nansha nanku nêntungunukè anu ne kuMukwacila mudimu! Yèyè ngwanyì!’”

187 “Kaa! Ee, Ngeela meeji ne bìvwa bikèngela bwa Twètù kumubiikila ne kupatukaku nende mu mwaba mukese kampanda wà pabwàwù bwa kwenza diteekiibwa.”

188 Mpindyewu, taatù awu, mu Dipungila Dikulukulu, pàvwàye ùmvwa ne mwanèndè wa balume wàkolù, ne ùvwa mufike pa cipimu cya diteekiibwa. Kufika ku! Ùvwa mulediibwe mwànà, kadi, dîbà adi yèyè mmwànà mulume. Kadi dîbà adi kààkwikalakù mutàmbe anu mwànà wetù ewu to, mwànà wa balume anu wetù wa patupùpù ewu, too ne pàdiye ùboba ne ùleejakù cidiyè. Dîbà adi, ùdi ùmubiikila ùpàtuka nende dîbà adi.

189 Mpindyewu’s ki twètù aba, ekeleeziya. Nudikù anyi? Mpindyewu dîbà dyàpici kakese, muntu ne muntu àdisùmèku mènù ku munu, àcintè musuuka wèndè, ne àdikwàtè bikole ku mwoyi wèndè, anu bwa katanci kakese cyanààna. Nwamonu anyi? Mpindyewu netushikike ekeleeziya. Mpindyewu pàdi ekeleeziya ùfika pa kaaba aku, Yèyè ùdi wàmba ne: “Wèwè Maanàsè, udi wèwè apa nunku. Efàlàyimà, wèwè udi apa nunku.”

190 Dîbà adi ùdi ùpatuka ùya nende ku mwaba kampanda, taatù awu’s, ne ùmusòmbesha pa kaaba katumbuke mùdì *aka* nunku, ne wènza mushingà kampanda, ne bôbò bònsò bàdì bàlwa bànyùngulukilapù. Nenku ùvwa wàmba ne: “Ndi muswe bwa bantu bònsò bàmanyè ne ewu mmwanàànyì, ne ndi ngenza diteekiibwa dya mwanàànyì wa balume. Ne ndi muswe bwa muntu kanà yònsò àmanyè ne, kubangila ku mpindyewu, dîna dyèndè. . . Ndi mmuwadika, civwalu cya pabwàci pambidi pèndè. Ne ndi muswe bwa numanye ne dîna dyèndè pa kabeji kàà shekè didi menemene anu mùdì dyànyì dîna. Yèyè mmwanàànyì, Ndi mmuteeka mu dîkù dyànyì, nansha mùdìbì ne yèyè ùvwa mwanàànyì wa balume kacya wàlediibwa. Kacya wàpeta Nyuma Mwîmpè, yèyè mmwan’Àànyì wa balume. Kadi mpindyewu Mêmè nêmmushikikè mu bukookeshi bilondèshile mwaba. Udiyè yèyè wipata ku mudimu awu mmwipaciibwe, udiyè wàngata ku mudimu awu mmwangaciibwe.

191 “Ne bulelela, bulelela, Ndi nnwambila ne, wèwè mwambile mucì ewu, wèwè mwambile mukùnà ewu ne: ‘Tentèmùkà,’ ne kùyi wela mpatà munda mwa mwoyi wèbè to, kadi witabuuya

ne ciwǎmbì aci necyènzeke, udi mwa kupeta ciwǎmbì aci.” Nwamonu anyi? Ki bwalu mbwòbù abu; ki bwalu mbwòbù abu. Nwamonu anyi? “Yèyè mmwan’Àànyì wa balume.” Mbanganyì bàdì bamanye ne diteekiibwa, ne . . . bàvwa bateeka mwànà wa balume paanyima pàà yèyè mumane kufila cijaadiki cya ne yèyè ùkaavwa . . . Bantu bònso bàkaadiku babale Bible, dishikikiibwa dya mwànà wa balume.

¹⁹² Mpindyewu, Nzambi wàkenza cintu cyôci cimwecimwe aci bwa Wendè Mwànà pàakabàndishàYe Yesu pa Mukuna wà Dishintuluka dya mpala. KubàndaYè ne Peetèlò, Yakòbò ne Yone kuntwaku, abu mbantemu basatu bàà pa buloba. Kùvwa Yesu, Mòsà ne Eliyà, ne Nzambi, kuulu ku mukuna aku. Ki bôbò bàvwa biimàne pa mukuna apu abu. Nenku, dyakamwe, bôbò kutangila, ki Yesu kutumbishiibwaYe kumpala kwabo. Ncya bushuwa anyi? Mbanganyì bàdì bamanye ne m’Mufundu? CyàkenzàYe ncinyi? Yèyè—Yèyè wàkaMuvwàdika mùzùbì wà dibènga-kufwà. Ne yèyè mmwambe ne: “Civwalu Cyèndè civwa cibàlakana bu dîbà.” Ncya bushuwa anyi? Ki ditutu kubabwikiladi. Ki Peetèlò ne Yone ne bakwabo, kudishindabo batwè mpala panshi. Ki kutangilabo, ki Mòsà ne Eliyà bàvwa biimàne bàba, munkaci mwa kuyiikilangana Nende. Pèndè’s Mòsà ùkaavwa mufwe, ne mujiikiibwe mu lukita lùvwa kalùyi lutèèka cimanyinu to kùkaavwa bidimu nkama mwandamukulu. Ne Eliyà wàkenza lwendu lwà mubànde mu Dyulu mu dikalu dya mvita, bidimu nkama yitaanu kumpala kwa cyôci aci. Yoyòyò! Kadi’s bàcivwa anukù! S’ki bôbò bàvwa bàyiikilanganà Nende abu. Nwamonu’s, Yèyè ùvwa mubàndishe Yesu bwa kubamonaYe, bwa kumona ne byónso abi bìvwa cinyì, kumona kuntwaku, kuMuleeja maalu aa. Nenku bàvwa bàyiikilanganà Nende, bòosha Nende muiiki’s.

¹⁹³ Pashiishe Peetèlò mwenze anu ùtàngila cyakabidi paanyima ne ditumbishiibwa adi dyumùke pa Yesu, kumonabo anu Yesu nkàayèndè, ki Díyì kufuminaDi mu ditutu adi, dyàmba ne: “Ewu m’Mwan’Àànyì munanga, Muteelejaayi Yèyè! Dîná Dyèndè dîdi menemene anu mùdì Dyànyì Mémè mpindyewu. Muteelejaayi Yèyè!” Ki cyôci aci, bânà bàà balume batèèkiibwe, anyi bashikikiibwe.

¹⁹⁴ Mpindyewu, s’ki mwaba ngwòwò awu wùdì Nzambi ùteeta bwa kufikisha ekeleeziya wa beena Mpenta mu Mukanda wà Efeso. Nwamonu anyi? Nudi—nudi nuumvwa anyi? Bìkèngela twimanyikè, bwalu dîbà dyàtàmbe kuya be, nwamonu’s, bânà bàkaadi basòmbe bàbùngila. Kadi pàànyì mvwa njinga kupweka too ne ku mvensa udi kaaba aka mene ewu, kadi ncyèna mwa kukùfika to, too ne—too ne ku mvensa wa 13, nwamonu’s, citùpà cya ndekeelu, “batwibwe citampi cya Nyuma Mwìmpè wa mulayi.” Netwangate aci mu dyalumingu, nwamonu’s. Tàngilàayi. Mpindyewu, mushindu kaayi, ncinyi

cìdì citùbwejàmu, ne mushindu wutùdì tulamiibwa kùdì Cyòcì eci.

195 Kadi mpindyewu “kushikika,” udi ushikikiibwa mushindu kaayi? Dyambedi udi wanji kulediibwa mu Bukalenge ku Nyuma Mwîmpè. Mbanganyì bàdì bamanyè aci? Eyo. Cìdì cìlondà, udi mudyànjila kulongolola ku cinyì? Diteekiibwa. Ncinyì ciine aci? Udi mudyànjila kulongolola ku dishikikiibwa.

196 Kaa, Mwaneetu wa bakaji Scott, ngeela meeji ne ngwêwè, wêwè udi musòmbe apa ewu. Kí ngwêwè uvwa kwànyì kumbelu leelu ewu awu anyì? Dilongesha diikàle ònyùnguluka mwaba kampanda pa buloba bujìmà, mu bitùpà bishìlèshìlàngàne bya ditunga, nkààdì muumvwe bàdyàmbe, bikole be, ne Yesu ùdì pa buloba apa, wènda wèndakana mu mubidì kampanda, Ùdì ùbwela ne wèza *cikampanda*. Aci mmashimi! Nyuma Mwîmpè Wendè ngudi apa, ne Yèyè ùdì ùteeta kushikika Ekeleeziya Wendè, bwa kuteeka Ekeleeziya Wendè ewu mu bulongame, kuMushikika mu Buloba bulaya, bwa bààmòna mwa kubwela . . . bwa beena lukuna bònsò bìipaciibwè.

197 Maanàsè kèna mwa kwangata buloba bwèndè to. Mèmè ncyèna mwa kwenza disangisha dya dyondopa pàdì cyabibidi cimwe cya . . . pàdì . . . Ndi nya kuntwaku nyiisha dibatiiza mu Dìna dya Yesu Kilisto, kadi—kadi bânà beetu ba-trinitaires bàmba ne: “Kaa, yèyè’s mmwena Yesu Nkààyèndè wa kale.” Kabidi ncìyikù mwa kuya lwà kuntweku ne kwenza disangisha dya dyondopa dya kùdì Nzambi pàdì cyabibidi cimwe cya kùdìbò bàmba ne: “Dyondopa dya kùdì Nzambi ndìmpè,” ne bààbùngì bàà kùdìbò bàsànkila bishima bya kùdì Mukalenge kadi bàmba ne: “Ee, ndi ngiitabuujà ne Mwaneetu Branham mmuprofeeta, kadi imana nkwambile cintu kampanda. Pàcìdì anu Nyuma pambidi pèndè, ne yèyè munkaci mwa kujingulula apu, yèyè mmusadidi wa Mukalenge. Kadi Dilongesha dyèndè ndibole, kí nDìmpèku to.” Mbanganyì bàkaadiku bumvwe bintu bya budingidingi bya mushindu awu? Anyì mbya kùdì Nzambi anyì kí mbya kùdì Nzambi to. Ncya bushuwa’s. Anyì byònsò n’Nzambi anyì kí n’Nzambi mu kantu nansha kamwe to. Mushindu awu ngùdìbì. Kadi mmunyì muwàcyènzà? Maanàsè kàyi muswe kushààla mulame cyèndè citùpà cya buloba to, Efàlàyimà kàyi muswe kushààla mulame cyèndè citùpà cya buloba to, Gaadà kàyi muswe kushààla mulame cyèndè citùpà cya buloba to, Benyàminà kàyi muswe kushààla mulame cyèndè citùpà cya buloba to, bònsò bàpàtuka lubilu pambelu apa ne beena Pelèshètè, ne bònsò badìsangè naabo cimbòndambònda. Mmunyì mutwàshikikiibwà? Kadi tudì balediibwe ku Nyuma Mwîmpè, twètù bònsò. Ncya bushuwa anyì? Tudì balediibwe bwa kufika ku cinyì? Badyànjila kulongolola . . . Nenku paanyima pàà twètù bamane kulediibwa, tudì badyànjila kulongolola ku diteekiibwa, bwa kushikikiibwa mu Mubidi wà Kilisto. Nudi numona cìndì njinga kwamba aci anyì?

198 Mubidi wà Kilisto ncinyi? Bamwe mbapostolo, bamwe mbaprofeta, bamwe mbalongeshi, bamwe mbatangadiki, ne bamwe mbampaasata. Ncya bushuwa anyi? Ki kutùdi babiikidiibwe. Bakwabo bàdi ne mapà a myakulu, dyandamuna dya myakulu, lungenyi, dimanya, bishima, dyenza dya bishima, mapà ónsò mashiilèshiiàngàne aa. Kadi cidibo benze ncinyi mpindyewu? Mbabiteeke byôbì abi mu cyenzi kakese. Cinyi? Mbabilekèlèlàngàne kabiyi bikòntonona mu mushindu wúndiku mèmè ewu nciyi mumanye ne ngwà bishi to. Umwe ùjuuka, wàkula mu myakulu, ne mukwabo ùtúngunuka, wàkula ne: “Brrr, brrr, brrr, brrr, blii.” Uh-huh. Muiyishi ùdi mwa kwikala munkaci mwa kuyiisha, wènta dibiiikila dya ku cyoshelu, kadi muntu kampanda ùjuuka, wàkula mu myakulu wàmba ne “Aleluuyah! Butumbi kùdi Nzambi!” Muiyishi yèyè anu—yèyè mudidinge mutungunuke ne diyishi dyèndè adi, mwikàle mulaaba maanyi, díbà adi bantu bàdi bàmba ne: “Muntu mutwe cimpinga wa kale.” Nwamonu’s, mbwalu kí mbalongeshiibwe to.

199 Bible mmwambe ne nyuma wa baprofeta ùdi ùkòòkela muprofeta. Nzambi kí mmufidi wa cibwejàkàji nansha. Pàndì mwimane kaaba aka apa, anyi mwambi kampanda mu dilaabiibwa dya Nzambi, nansha wèwè muswe bishi bwa kwakula mu myakulu, shààla mupuwe too ne piikalà Nzambi mujikije kuneeku. Díbà adi wèwè mwakùle mu myakulu, kaciyèna mwa kwikala anu dyambulula kampanda dya Mufundu to, bwalu Nzambi mmwambe ne kwènji dyambulula dìdì kadiyi ne musinga to. Kadi mmukenji wà buludi mutùmina muntu kampanda. Ùnkònkèku musangu nansha wumwe, funkunaku munu pa musangu wumwe cyanàànà kacya wùkaadiku Nyuma Mwimpè, mu dijingulula, mwambile muntu kampanda, mwambe mwambulule Mufundu kampanda misangu ne misangu. Yèyè ùvwa ùmwambila cintu kampanda cibi kùdiye ne cintu kampanda cìvwàye mwenzè, ne cintu kampanda cìvwàye ne cya kwenza anyi cintu kampanda cìvwà ne cya kwenzeka, anyi cintu kampanda cya mushindu awu. Ncya bushuwa anyi?

200 Ki mùdi kabidi dyakula dya mu myakulu ne dyandamuna! Kwòkò muntu mu ekeleeziya wàkula mu myakulu, ne mukwabo ùyàndamuna, cyàmbè nunku: Twàmbè ne Mwaneetu Neville ùdi ùjuuka kuulu wàkula mu myakulu, ne mwaneetu wa balume ewu kaaba aka ùfila dyandamuna, wàmba ne: “Ambilaayi muntu udi apa ewu ne makeelela yèyè mmupatuke kaaba aka mukenze cintu kampanda cìvwà kaciyi cìkèngela bwa kwikalaye mwenze to. Mpindyewu ngangabuka mmumwambile leelu ewu ne ùdi ne kansere. Nda ùkàlongòlòlè bwalu abu, wàlukilè kaaba aka ùdìlongòlòlè ne Nzambi.”

Muntu awu yèyè mwambe ne: “Cya bushuwa, mbulelela.” Díbà adi Nzambi ùdi neenu.

201 Kadi netwikalè mwa kucyenza mushindu ewu bishi? Nwamonu anyi? Nyawu bìdi anu ne: “Blmp, brrr, brrr, brrr.”

Anu ku mpuukapuuka, mushindu wònsò kanà, kakùyikù dishikikiibwa nansha dya kànà to. Mpindyewu aci's cidi... Nwamonu's, beena Efeso, bàdi bàteeta... Nwamonu's, bàdi bàpangila aci. Nudi numona mùdìbo bàcìpangila anyi? Twètù tudi badyànjila kulongolola ku diteekiibwa dya bânà bàà balume! Mpindyewu mbanganyi bàdi bùmvwà cìndi njinga kwamba aci? Elàayi byanza muulu. Diteekiibwa! Tudi tulediibwa mu Nyuma wa Nzambi, bushuwa, tupeta Nyuma Mwimpè, ne twela lubila ne: "Abba, Taatù! Aleluuyah! Butumbi kùdi Nzambi!" Twètù tudi, ncya bushuwa, twètù tudi bânà, kadi katwena ne kutùdi mwa kafika to. Katwena mwa kutuuta kuzengeja beena Pelèshètè to.

²⁰² Tàngilàayi Billy Graham mwimane pàapa. Ne Mùzùlùmanyi awu wàmba ne: "ÚCileejè's."

²⁰³ Tàngilàayi Jack Coe mwimane pàapa nàka. Ne muntu udi ubènga kwitaba diikalaku dya Nzambi awu, mwena église de Christ awu ùlabulangana ku cyanza ne muntu udi ubènga kwitaba diikalaku dya Nzambi awu kuntu kwàka ùtwa ku ciine aci. Pèndè ne mmwena Kilisto, kadi mwikàle ùlabulangana ku cyanza ne démon wa mùdi Joe Lewis, mwikàle munanyi wa lungenyi mudikàdile, ùya too ne ku dyela dya Nzambi mulawu ne wàmba ne "kakùtu cintu pàaci ne n'Nzambi to, nansha bishi, kacya kwònsò eku," ne bintu bya mushindu awu. Ne ekeleeziya wa ùdibùikila ne mbeena église de Christ, bàlabulangana nende ku cyanza, ne bàbènga kutwa ku cya Mwaneetu Jack Coe. Mmunyi mutwikalàku mwa kwenza cintu nansha cimwe? Ne beena Mpenta pààbò, bààbùngì bàà kùdìbo, bàlwishangana nende; pààbi, muyiishi yònsò wa mu ditunga dyetu edi's bìvwa bikèngela kutwanganaye nende nkundù, ne kwamba ne: "Nzambi, tuululaku Bukole Bwebe." Nwamonu's, ki bwalu mbwòbù abu's, mwaba wùdiye kàyikù mwa kushikikiibwa to.

²⁰⁴ Efàlàyimà kî mmuswe kushààla to. Umwe wa kùdìbo ùya lwà apa, tudi tusangana Maanàsè ùya lwà apa, wàmba ne: "Kaa, ekelekele, Mukalenge wàmpeeshi budimi bwìmpè bwa matala!" Pashiishe, ki Gaadà ulwàlwa apa ewu, wàmba ne: "Ee, mpindyewu, anjì indilabi kakese túng. S'bidì bikèngela bwa nkune mpondà, kadi ndi ne cya kupeta anu pàanyi matala. Aleluuyah!" Nudi numona anyi? Bwalu bwa matala kî mbukutangile wèwè to; peta wèwè mpondà, mpondà ki cyebe cya kukuna. Wèwè kwèna ne cya kumuna mikooko to pàdibi ne udi ne cya kumuna ngombe. Nzambi mmuswe kushikika Ekeleeziya. Kadi yònsò wa kùdìbo mmuswe kwenza anu cintu cimwecimwe aci. "Aleluuyah!" Kùyikù mwa kubambila cintu pa bwalu abu to. To, to. Bòbò bàcidi anu ne ngiikàdilù wa mbuji awu ne: "Tukùng, tukùng, tukùng, tukùng, tukùng, tukùng, tukùng." Nwamonu's, wèwè kùyi mwa kubambilaku to. Ncya bushuwa. Mpindyewu, aci kî ncilelela anyi? Nenku kùyikù mwa kushikika ekeleeziya to. Nwamonu anyi?

205 Ekeleeziya ùdi ne cya kwikala mudyànjila kulongolola ku diteekiibwa dya bânà, kùdì muntu. . . Nzambi ùdi mwa kwangata muntu ne kumuteeka mu dîkù, ne kumupeesha cintu kampana. Aci, dyambedi, citeetàayi numone nî ncy bushuwa. Bible's mmwambe ne nùteetàayi nyuma. Muntu ewu nyewu ùdi wàmba mùdiye ne cintu kampana, kadi nùciteetàayibi numone nî ncy bushuwa. Cyôci cya bushuwa, tûngunukàayi naaci. Dîbà adi ambàayi ne: "Mukalenge, tûtûminèku cintu kampana cikwabo." Tûngunukàayi nwenda nuya, nwamonu's, tûngunukàayi anu ne kwenda kuya too ne pàngatà muntu yònsò kèndè kaaba. Dîbà adi nenumone ekeleeziya wa Nzambi mùdiye ùbanga kupeta kaaba kèndè. Dîbà adi's ki pàbangà beena Pelèshètè kwalukila cyanyima. Tuputulu netuumuke, nsuki neyileepe too ne kwinsi, kwîsù nekwoweshiibwe màyi; bifwanka nebîikalè kabîciyikù to. Ncy bushuwa. Pàabangà Ekeleeziya kubwela mu Bukole Bwèndè bunene abu, patwikalà ne Anaaniyà kampana ne Saafilà, ne ndambu wa kùdibo. Eyowa's, mukalenge. Nenumone pîimanà Ekeleeziya wa cijila awu mudîsangîshe mu Bukole Bwèndè, mushikîkîibwe bilondèshile myaba bu bânà balume bàà Nzambi, batèkîibwe mu dîkù dya Nzambi, Ekeleeziya wa bukole mwimane kwàka mu butumbi Bwèndè. Kaa, aci's ki cìdîYe ùvwila.

206 Nudi numona ne nkule kwa mushindu kaayi kutùdi twètù tusanganyiibwa anyi, bânà beetu? Kanùyikù mene mwa kupetangana pa Mifundu. Ne muntu kanà yònsò, muntu kanà yònsò udi kàyiku mwa kumona dibatiiza dya màyi mu Bible, mu Dînà dya Yesu Kilisto, anyi ùdi mpofo anyi cintu kampana kaciyi mu cyôci mu byeledi byèndè bya meeji. Ncy bushuwa. Ne mwaba awu ngùdi mvita minene yîsanganyiibwa.

207 Nê—nêngàm bilè muntu kanà yònsò wantwàdila Mufundu nansha bàwàmba ne ngwà bishi mùdîku muntu mubatiijibwe mu dînà dikwabo kaayi pa kumusha mu Dînà dya Yesu Kilisto, mu ekeleeziya mupyamupya. Anyi, pîikalàye mubatiijibwe mu mushindu mukwabo kanà wònsò, bìwwa bìkèngela bwa kubatiijibwaye cyakabidi mu Dînà dya Yesu Kilisto, bwa kupetaye Nyuma Mwîmpè. Ulwe undeeje. Cya nanku kacyenaku to. Mudimu mutumangana naawu wa nanku kawenaku to. Yesu pàakambàYe mwaba awu ne: "Ndààyaaku, nùlongeshè matùngà ônsò, nubàbàtîizè mu dînà dya Taatù, Mwânà, ne Nyuma Mwîmpè," Taatù, Mwânà, anyi Nyuma Mwîmpè, nansha umwe kí ndînà to, nansha umwe wa kudibo, Peetèlò wàkakùdimuka, anu paanyima pàà matuku dikumi, kwambaye ne: "Nyingalalaayi, ne nubatiijibwe mu Dînà dya Yesu Kilisto, bwa dilekelediibwa dya mpekaatu." Ne mu myaba yònsò mu Bible. . .

208 Ne pathiishe ki bakwabo bàvwà babàtîijibwe mbôbò aba mwaba awu, mu mushindu mukwabo, kùdì Yone, anu bwa kanyinganyinga cyanàànà. Pòlò kwambaye ne: "Bidi

bikèngela bwa nubatiijiibwe cyakabidi. Bidi bikèngela bwa nulwe cyakabidi.”

209 “Kaa, kadi twètù’s tudi babàtìjìjìbwe kùdì muntu munene wa cijila, Yone. Yèyè awu’s ngwàkabàtìiza Yesu.”

210 “Eyo, eci ki Evanjeeliyo. Eci ki Nyuma wa Nzambi uvwa ne cya kubuludiiibwa kùndì. Mèmè ndi mupostolo wa Mukalenge, ne bu mwanjelo wa mu Dyulu mwa kulwa ne kuyiisha cintu cikwabo nansha bàcyàmba ne ncinganyi. . .”

211 Lekèlaayi ncibalè. Bible mmwambe ne: “Bu mwanj- . . .” Pòlò wàkamba ne: “Bu mwanjelo wa mu Dyulu mwa kwamba cintu cikwabo nansha bàcyàmba ne ncinganyi,” mwepiskopo, mwepiskopo wa mutàmbidile, paapa, mutàngidi, cyònsò cìdiye mwa kwikala aci, “yèyè muyiishe cintu cikwabo nansha bàcyàmba ne ncinganyi pa kuumusha Eci cìndì mèmè munuyiishe, èdiibwè mulawu.” Kakwenaku nansha. . . Twètù katùtukù ne bilele bya nanku to. To, mukalenge. Wèwè udi anu. . . Cintu bu nanku kacitukù to. Wèwè, twètù. . . Kadi dìbà adi—dìbà adi, nwamonu’s, bantu kabeenaku mwa kumona aci bwa cinyi? Bantu kì mbasweku—kì mbasweku—kì mbasweku kwitabuuja aci bwa cinyi? [Muntu kampana mu disangisha ùdi wàmba ne: “Badyànjila kulongolola”—Muk.] Nwamonu anyi? Muntu kampana wàlengi anu pa bwalu menemene mwaba awu, Gene. “Badyànjila kulongolola,” menemene. Bwa cinyi? “Bònsò bàdì Taatù muMpeeshe” (nebènzè cinyi?) “nebalwe kùNdi.” Mushindu mene wùdìbi menemene’s! “Bònsò bàdì Taatù muMpeeshe nebalwe—nebalwe kùNdi.” Mbwalu kaayi ebu kùndì’s, mùndì nteeta kupeta mwab’ewu? S’ki bwalu mbwabu. Eyo.

212 Lekelaayi ngǎnjì mbaleku mvensa ewu nenku pashiishe nènwwàmbilè cìdì Pòlò, bintu bìdì. . . Diiyiisha mene dìndì mèmè muyiishe diloolo edi, cìdì Pòlò mwambe pa bìdì bitàngila didyànjila-kulongolola ncyòcì eci, pa bìdì bitàngilà dibatiiza dya mu màyi mu Dìnà dya Yesu, dibatiiza dya Nyuma Mwimpè, dishikikiibwa mu ekeleeziya, ne bikwabo. Cìdiye mwambe ncyòcì eci:

Ndi nkèma be (mwikàle wàmabila beena Ngalàtìyà aba’s) munùdì nwènù buumùke ne lukasa lwònsò kùdì ewu uvwa munùbùkile ku. . . ngàsà wa Kilisto (Nudi bamfwishe bundu bwa dikema, mu ngaakwilù mukwabo’s, panùdì balekele muntu kampana ùbwela ne ùnùkùdimuna ùnùumusha ku Cyòcì aci) ùnùtùma ku evanjeeliyo mukwabo;

Pàakù kakuyi evanjeeliyo mukwabo to, kadi kùdì bantu bàdì bànùtácisha, ne baswe kupangisha evanjeeliyo wa Kilisto, kupangisha Evanjeeliyo mulelela wa Kilisto.

213 Kadi tàngilààyaaku. Mpindyewu, nwavulukaayi ne, Pòlò ngwâkenzeja muntu yònsò uvwa kàyi mubatijiibwe mu Dîna dya Yesu Kilisto, bwa kulwaye kubatijiibwa cyakabidi mu Dîna dya Yesu Kilisto. Mbanganyì bàdi bamanyè ne aci ncilelela? Mbanganyì bàdi bamanyè ne Pòlò ngwâkamba ne minsokòntù eyi yìvwa misokoka kacya ku difuka dya dyulu ne buloba, ne yìvwa mimubuulwila yêyè ne, twètù tuvwa badyànjila kulongolola bwa kwikala bàna bàà Nzambi ku diteekiibwa, ne ùvwa m’Pòlò? Tàngilàayi apa cyâkambaye:

Kadi nansha twètù, anyi mwanjelo wa mu dyulu, munuyiishe evanjeeliyo mukwabo nansha wa bishi mushùlàngàne ne utùdì twètù banuyiishe, èdùbwe mulawu.

214 Kwàmbi anu ne: “Ncyèna ngumvwangana neebe ku mèyi to, mukalenge” to. Èdiibwè yêyè anu mulawu. Lekelaayi mbale mvensa udi ulonda awu:

Bu mutwàmbi kumpala amu, nenku nyewu ncyamba cyakabidi mpindyewu ne: Muntu nansha bàmwamba ne nganyì yêyè muiishe evanjeeliyo mukwabo nansha wa bishi mushùlàngàne ne utùkaadì twètù bamane kupeta, èdiibwè mulawu.

215 Neya bushuwa. Mpindyewu, mwaneetu wa balume, mwaneetu wa bakaji, piikalàbi ne ùvwa n’Nzambi dituku adi, ne ndi—ndi ngamba aci, mwikàle ntekèmena ne kî ndipanga dya kaneemu to, nguvwa mumfikishe ku dimona dya kaacintu kakese aka . . . Mpindyewu, ndi ndyumvwa musaluke’s; ncyèna ngeela meeki ne ndi musaluke to, ndi anu mbèneshiibwa mu kuyiisha. Ndi ndyumvwa ncìcìyi mu mêmè to ne nnulama kaaba aka too ne pândi mmanya ne nukàadi nubùngila ne bacyòke. Kadi, kaa, ndi . . . Bu nwènù—bu nwènù nanshà mwa kumanya mùndi njinga bwa nwènù kwikalamu’s! Nwamonu anyi? Nenku mêmè, pândi ngamba cyòci eci cyakabidi, pândi . . . pàvwàYe mwambe . . . pâmvwà mwambe ne: “Ncifwànyine kwenza . . .”

Kwambaye ne: “Udiku muswe kumona cìdì ndekeelu anyi?”

216 Ki mêmè kutangila paanyima ne kudimona mêmè mwine mudyòlòle mwaba awu pa bulàalu. Neya bushuwa ne nwènù nudi bammanyè mêmè ewu kùkaadi ntanta bule bukùmbàne bwa kumanya ne—ne ndi nnwambila Bulelela. Ndi muswe kunukonkaku cintu kampanda, bu mwàkambà Samwèlè kumpala kwa kwelabo Shawùlà maanyi, kacya nkàadikù munwàmbile cintu kampanda mu Dîna dya Mukalenge cìvwà kacìyi cilelela anyi? Neya bushuwa anyi? Cìtu misangu yònsò anu cilelela. Kacya nkàadikù mulwe kunulomba mfranga anyi nî ncinyi cyònsò cya mushindu awu bu kàà pa luse anyi? Bwàlà, nwamonu’s, kacypu. Kacya nkàadikù mwenze cintu kampanda pa kumusha kuditacisha ne mwànyì mwònsò bwa kunulombola kùdì Kilisto anyi? Menemene.

217 Mpindyewu mbaswe kwamba mũndi mwena lubuku, nudi bamanye's, mumonyi wa maalu àdì matàmbe byumvwilu. Mu bushuwa bwa bwalu, bikèngela bwa bintu abi bijuukè, Bible mmwambe ne nebijuuke. Anu mwàkakàndameenàbo Mòsà kùdì Yambèlè ne Yanè, bòbò bààkenza pabwìpì ne cintu cimwecimwe cyàkenzà Mòsà, mu mushindu wà ne byàkafika ku diteetangana dya makanda. Ncya bushuwa. Kadi vulùkààyi ne, Yambèlè ne Yanè kabàvwa mwa kwondopa to. Kabàvwa mwa kwondopa to. Bàvwa mwa kutwala bipùpù, kadi kabàyi mwa kubyumusha to. Nwamonu anyi? Eyo. Mpindyewu, Nzambi ngudi Mwondopi. Dìyi dya Nzambi didi dìshààla anu Bulelela.

218 Ndi muditacishe bwa kwikala ne meeji matooke kunùdì. Ndi muditacishe bwa kunwambila Bulelela. Ndi—ndi . . . bidimu bitwè ku makumi asatu ne cimwe mbyòbì ebi, bìndì mwimane mu cyambilu eci, ngâya ngâlùkila, bidimu makumi asatu ne cimwe bulubulu, ne dîngà dituku ndi mwa kuya mu Butumbi nguumukila ku cyambilu eci. Kùvwakù mukàjàànyi, mwanàànyi wa bakaji, taatù wanyì, mwaneetu wa balume, bààkajiikiibwà bònsò luseke lukwabo lwàlwa, balunda bàà mushinga mukole. Nkàadi mutangila misheete yabo ya bafwe ne bilòngò bitèèka mwaba ewu, ne mmanya ne dîngà dituku wanyì pàanyi newuteekiibwe mwaba awu. Mpindyewu, aci ncilelela. Kadi ne meeji matooke ònsò, ne mwoyi wanyì wònsò, ndi nnwambila ne mwoyi wanyì wònsò ne, ndi ngiitabuuja ne ndi munuyiishe Evanjeeliyo mulelela wa Mukalenge Yesu Kilisto. Mémè ndi ngiitabuuja ne bìvwa bikèngela bwa nubatiijiibwe, muntu ne muntu wa kunùdì, mu Dîna dya Yesu Kilisto, bwa nupete dibatiiza dya Nyuma Mwimpè. Ne dîbà kanà dyònsò diwàcyènzà adi, necikutwadile dsanka, ditalala, mwoyi mule, bwimpè, bupole, kalolo, lutuulu, diitabuuja.

219 Nenu dituku adi, cìvwa cingenzekele mu dinda adi aci, ncyèna mumanye to. Ncyèna mwa kwanji kwamba ní mvwa nsanganyiibwa panwapa mu mubidi wanyì ne mumone anu cikeena-kumona cyanàànà, anyì ní mvwa muumushiibwe panwapa, muye kwòkù aku. Ncyèna mumanye to, ncyèna mwa kucyamba to. Cintu cimwepele cîndiku mémè mumanye, ncya ne mvwa—mvwa misangu yònsò anu ne bwòwà bwa kufwa, kaaba kakese kàà kalonda aku. Kadi, mpindyewu, ncìyi nciina ne nkwèpì kwikalà Yesu mufwànyîne kubènga kulwa kungangata to, ncìvwa nciina aci to, bwalu mémè—mémè ncìvwa nciina aci to; kadi nkwèpì kùndi mufwànyîne kutwilangana neebe kadi wèwè mwikàle anu kaadifwima kakese kàà kale kènda kàbùuka mu lupeepele. Kadi ngàmòmu mpindyewu. Pàmvwà mumone bantu abu, bàvwa anu beetu bàà cya bushuwa aba. Ne bàvwa mbantu bàvwàku musangu kampanda baswikàkàne naanyi panu pa buloba, nansha mene ne mukàjàànyi wa kumpala awu. Yèyè kàvwa mukàjàànyi to, ùvwa mwaneetu wa bakaji. Yèyè kàakambiikilakù bu bàyendè to, wàkambiikila bu

mwanaabo wa balume munanga. Kamùvwa nî mbya disangila dya mulume ne mukaji, nî mbya milowu ya mushindu awu to, kabìvwakù bifwànyine kwikalamu nansha; bìvwa bipwàngàne, bìvwa kalolo, cìvwa bupwàngàne.

Ndi mêmè ndyela nkonko, ncyêna mumanye to, ndi ndyela nkonko ne: Ki cyôci aci cyâkamônàye, kumpala kwa yêyè kushiyangana ne buloba anyi? pàvwàye ùsanganyiibwa mu lupitaadi mwàmwa, pângàâkamubiikilà, ne kwambaye ne: “Billy, wêwè’s utu muciyiishe, utu mwakule pa bwalu abu, kadi,” mwâkambàye, “kwêna mumanye ne ncinyi to.” Kwambaye ne: “Ncicyena kabidi ne milowu ya kushààla to.”

²²⁰ Ndi ndikonka ní ki cyôci’s, ne muntu mukulakaji wa difwana dya Nzambi, munsantu F. F. Bosworth awu, wâkiimana mu cyambilu eci, wâkayiisha naanyi mu bitùpà bishiilèshilàngane bya buloba. Mukulumpe F. F. Bosworth, nwênù bônso, pamwe ne bônso, nuvwa bamumanye; muntu mukulakaji wa difwana dya Nzambi, wa bunsantu. Mèbà abidi kumpala, ee, bu lumingu lumwe nanku awu anyi yibidi kumpala kwa kushiyanganaye ne buloba, ngâkaya kùdiye ne ki yêyè awu mulààdika kwâka, lwà, ne bidimu biipacila ku makumi citeema. Tuboko twèndè tukese tukulakaji atu twolola, katu kèndè kakese kàà dibàla aku ne myedi mitooke ku cibàngà. Mêmè kukwata mukulumpe awu mu maboko àànyì kadi kwela lubila lukole ne: “Taatu wanyì, taatu wanyì, makalu a mvita a Izaleela ne babàndi bàà pa tubalu twawu.”

Bwalu bu ní kùvwakù muntu uvwa muleeje mpala wa Mpenta ne uvwa mupostolo mulelela, s’ùvwa ng’F. F. Bosworth awu, Evanjeeliyo mukezuke, mululame, mulelela, nwamonu’s, ùvwa m’Bosworth awu. Nenukù pângàâkamukwàta mu maboko àànyì, ki mêmè kwela lubila lukole ne: “Taatu wanyì, taatu wanyì, makalu a mvita a Izaleela ne babàndi bàà pa tubalu twawu.”

²²¹ Kwambaye ne: “Mwanaànyì wa balume, shààla mu budimi bwa bwambi.” Yêyè ne: “Udyanjidilè yimwe yà ku nsongààlùmè eyi mu madimi a bwambi a ku baabèndè, wêwè ne mushindu, kumpala kwa bôbò kuyabo kafikisha dikolesha dya maalu búngì cyanààna kuntwaku. Ùbàtwàdìlè Evanjeeliyo mulelela ùdì nende awu, mwanaànyì wa balume.” Kwambaye ne: “Wèbè mudimu wà bwambi kí mmwanjì kubanga bwa kafika ku ciikalàwu to.” Yêyè ne: “Wêwè ucidi Branham wa mupyamupya menemene.” Yêyè ne: “Wêwè ucidi mwànà, mwanaànyì wa balume.”

Mêmè kwamba ne: “Mwaneetu Bosworth, mêmè’s ndi ne bidimu makumi anaayi ne mwandamukulu.”

²²² Yêyè ne: “Kwêna mwanjì kubanga to.” Yêyè ne: “Kulekedi bayiishi bàà nsongààlùmè bàà beena Mpenta aba bàya kuntu kwâka ne lukutukutu búngì cyanààna, bàya bàkeela mulungù

mu cintu ciine, nenku bènza ne ba—ba-diplomates bônso ne ditunga dijimà bàbangè kuCilwisha kumpala kwa wèwè kukùfika.” Yèyè ne: “Tungunuka nda kumpala, Mwaneetu Branham, tungunuka ne Evanjeeliyo ûdi nende awu.” Yèyè ne: “Mémè—mémè ndi ngiitabuuja ne wèwè udi mupostolo, anyi muprofeta wa Mukalenge Nzambi wetù.”

223 Mémè kumutangila, mémè kumuupukila mu maboko àànyì. Mémè kwamba ne: “Mwaneetu Bosworth, ndi muswe nkweleku lukonko. Ncikondo kaayi cya mwoyi wèbè cìvwà citàmbe kwikala cya disanka. . . dîbà dya wèbè. . . bidimu byebe byônso byùdi muyiisheyiishe?”

Yèyè kwamba ne: “Mpindyewu mene, Mwaneetu Branham.”

Mémè ne: “Udi mumanye ne udi munkaci mwa kupùnga ne lufu anyi?”

Yèyè ne: “Mémè ncyèna mwa kufwaku to.”

Mémè ne: “Ncinyì. . . Bwa cinyì bùdì mufwànyine kwambila ne eci ki cyebe cikondo cya citàmbe kwikala cya disanka?”

224 Kùvwa kaaciibi kakese. Kwambaye ne: “Ndi mulaale panshi mwab’ewu ne mpala mutàngija ku ciibi cyacya. Mu kasunsa kanà kônso, Yèyè ûndi munange awu, ne Yèyè ûnkaadi muyiisheyiishe ne mutwätwätwe nyama ku mikolo awu, ônsò aa. . . mwoyi wànyì, Yèyè nealwile ku ciibi cyàcya bwa kungangata, nenku nènye Nende.” Mémè kumutangila, kwela meeji, mvwa—mvwa mutangile anu mushindu wumwewumwe wùmfwà mwa kwikala mutangila Abraham, Izàkà, anyi Yakòbò awu.

225 Mémè kumukwata ku cyanza, kwamba ne: “Mwaneetu Bosworth, tudi bônso babidi twitabuuja Nzambi umwèumwè awu, tudi twitabuuja cintu cimwecimwe aci. Ku ngàsà wa Nzambi mémè nènyiiishè too ne pùumukà mweyelu wà ndekeelu mu mubidi wànyì. Nènshaalè ne lulamatu kùdì Nzambi ne mwànyì pàànyì mwônso mùndì mwa kushààla amu. Mémè ncyakudyaku cibanga pa Evanjeeliyo to nansha luseke kaayi anyi mwaba kaayi. Nènshaalè ne lulamatu ne mwànyì pàànyì mwônso mùndì mwa kushààla amu. Mwaneetu Bosworth, nèntwilanganè neebe mu Buloba butàmbe bwîmpè muwikalà kuyiku nsongà amu. . . anyi muwikalà kùciyikù mwa kukulakaja amu, kadi nsongà.”

226 Yèyè ne: “Newikalèmu, Mwaneetu Branham, kùtàcishi meeji nansha.”

227 Nenku dîbà dimwe kumpala, mēbà abidi kumpala kwa yèyè kufwa. . . paanyima pàà ngondo mitwe ku yibidi, mvwa ngeela meeji ne yèyè ùkaavwa ùpùnga ne lufu dîbà adi, mukàjàànyì kubwelaye ne kumumonaye (yèyè ùvwa misangu yônso anu ùtwa mukàjàànyì mushinga), ne pashiishe Mandamu Bosworth. Nenku mēbà matwe ku abidi nanku yèyè ùvwa mulàale panshi apu, muye mu tulu. Kukàtamukayè, kutangilaye, ne kujúukaye

dyakamwe pa bulààlù pàvwàye apu. Kwambaye ne: “Mààmù, ee, ncyèna mukumoneku to kùkaadi bidimu! Papa! Mwaneetu Jim, mona’s,” mwàkambàye, “twǎnjibi kumona tǔng, wèwè ewu’s uvwa umwe wa ku bǎngààkakùdimwishà mucima kùdì Mukalenge, ku Joliet, mu Illinois.” Mwine awu ngukààvwa mufwe kùkaavwa bidimu makumi ataanu. Nwamonu anyi? Eyowa’s! Kwambaye ne: “Wèwè udi Mwaneetu wa bakaji *Kampanda*. Eyowa, ngàkakufikisha kùdì Mukalenge ku—ku disangisha dya ku Winnipeg. Eyowa. Mona’s, Mwaneetu wa bakaji *Kampanda* nyèyè ewu. Ncyèna mukumone to... Eyowa, wamonu’s, wèwè wàkalwa kùdì Mukalenge mu mwaba *kampanda*.” Ki munda mwa mèbà abidi malondangane kwikalaye ùlabulangana ku cyanza ne aba bàakafikishàye kùdì Mukalenge. Kwalukilaye buludi wènda wènda tamakatamaka too ne ku kaaba kèndè, kudilongaye panshi, kuvungaye byanza, ki pààkù kùmba kùjika’s. Mwaneetu F. F. Bosworth mmukabwele mu Buloba bùvwà Yesu mundeje bufuku abu abu anyi? Pìikalàbi nanku, yèyè ùdì ùsanganyiibwamù mwikàle nsongààlùmè diloolo edi. Nzambi ikishisheku musuuka wèndè awu. Ne mèmè ngìikalèku misangu yònsò anu ne nsòmbelu wa lulamatu bwa ngaamonaku mwa kubwela mu bwòbù Buloba abu. Ne ngìikalèku musadidi wa—wa Kilisto wa lulamatu lwà menemene!

228 Mèmè ndi ne bundu bwa nsòmbelu wanyì. Ndi ne bundu kumpal-... Ndi—ndi... Pìikalàbi ne ndi mwenze mpekaatu kumpala kwenu, nudi—nudi beena dibanza dya kulwa kucingambila. Nwamonu anyi? Mèmè ndi nditacisha bwa kwikala ne nsòmbelu mululame mu kantu kònsò kàdì Nzambi ùmpèsha mushindu wà kwenza ku ngàsà Wendè. Nwamonu anyi? Nwamonu anyi? Kadi, tǎngilààyi, nwènù balunda bàànyì, nudi beena dibanza kùndì panwìkalà bamanyè cintu kampanda cidì cibi mu nsòmbelu wanyì, nùlwaayi nùngambile nanku. Nenku, tǎngilààyi, mèmè ndi mwena dibanza kunùdì dya kwimana apa ne kunuyiisha Evanjeeliyo mulelela. Ndi mwena dibanza kunùdì dya cyòci aci, bwalu ndi ntekemena ne nèmmonè yònsò wa ku mpala yenu ayi, nsongààlùmè ne nsongààkàjì, anu dyàmwàmwà dya mukàlu awu. Kùdì anu mweyelu wumwepele cyanàànà pankaci pàà mwaba wunùdì nusanganyiibwa mpindyewu ewu ne kwòkù aku. Mpindyewu, aci ncyà bushuwa. Mwaba awu wùdikù.

229 Nenku Nzambi wa ngàsà yònsò àswèkù, Nzambi wa mu Dyulu awu, kì mbya dipanga dya kaneemu to, kadi ne kaneemu kònsò, “Papa,” dituku adi dinene ditwàleejiibwà cyakabidi patwìkalà baalùkile pǎnwàpa ne bapetè cyakabidi mibidi yetu ya pa buloba ayi, bwa twamona mwa kunwa, ne kudya tumuma twa mvinyo ne mamuma a mu buloba abu. “Nebìibakè nzubu kabìyi bwa mukwabo kusòmbayèmu to. Nebakune madimi a mvinyo kabìyi bwa mukwabo kuyidyaye to.” Nwamona anyi?

Muntu ùkùna budimi bwa mvinyo, mwanèndè wa balume ùbwàngata, ne pashiishe mwânà wa balume wa awu awu ùbwàngata, ne wa awu awu pèndè. Kadi kî mmu ebu bwalu to; yèyè neabukune ne neashaalemu. Nwamonu's, aci ncyà bushuwa. Netwikalèmu kashidi. Nenku, mu Buloba abu, mmoneku yònsò wa kunùdi.


230 Ne ndi mumanye ne ndi ngaakula kaaba aka nansha mene ne bambi bàà ba-trinitaires. Nenku, nwènù bânà beetu, ncyèna ngamba nunku—ncyèna ngamba nunku bwa kutapangana ku mwoyi to. Ndi pàànyì Trinitaire, mèmè ewu, ntu ngiitabuuja busatu, byambiibwà bisatu bya Nzambi (Taatù, Mwânà, ne Nyuma Mwîmpè), kadi kaciyi Nzambi yisatu to. Nwamonu anyi? Ndi ngiitabuuja ne kùdi byambiibwà bisatu, kakùyì mpatà to, ndi ncìitabuuja aci ne mwoyi wànyì wònsò, “Taatù, Mwânà, ne Nyuma Mwîmpè,” kadi kî n’Nzambi yisatu to. Bìdi anu byambiib- . . . bisatu anyì midimu yisatu ya Nzambi. Nzambi musangu kampana wàkasòmbela mu buuTaatù, buuMwânà, ne mpindyewu Nyuma Mwîmpè. N’Nzambi umwèumwè awu mu midimu yisatu. Nenku yìdi ne . . .

231 Ne Taatù, Mwânà, ne Nyuma Mwîmpè, kî n’Dînà dya Nzambi to. Nzambi ùdi ne Dînà dimwepele, ne Dînà Dyèndè n’Yesu. Bible mmwambe ne: “Famiye mu Dyulu mmwinyika Dînà dya Yesu, ne famiye pa buloba mmwinyika Dînà dya Yesu.” Ncyà bushuwa. Pa nanku Nzambi ùvwa ne Dînà dimwepele, Dînà dya buntu. Yèyè ùvwa . . . ùvwa ne dînà divwà dibìikidiibwà ne Yehowa-yilè, Yehowah-laafà, ayi yìvwa mmyânzù Yèndè ya Bunzambi. Kadi Yèyè ùvwa ne Dînà dimwepele: Yesu! Nenku ki Yèyè awu.

232 Ne mu bulelela, nwènù bânà beetu, panwikalà kanùyì nutwa ku cyànyì to, nwavulukaayi ne mèmè—mèmè—mèmè nèntwilanganè neenu mwàmwa, nansha bishi. Nwamonu anyi? Mèmè—mèmè nèngìikalèmu neenu. Nenku Nzambi anubeneshe. Ne mèmè ndi mununange.

233 Nenku ndi muswe bwa ekeleeziya àvulukè mpindyewu ne, mu dyalumingu mu dinda netwàngacilè kubangila apa ne nènditacishè bwa kubènga kunùlama too ne kupita dîbà ibidi, bwa twamòna mwa kwenza disangisha dya mu mapingaja, twètù ne mushindu, ne bu mèmè mwa kwenza mùngènji diloolo edi emu, dîbà dikumi wa bufuku ne tusunsa makumi asatu. Nudikù numfwila luse anyi? Nwènù balunda bàànyì, kî nkutùshààdile cikondo cyàbúngì to, munanga wànyì. Ndi—ndi nnùbìikila “munanga wànyì” bwalu ki cinùdi. Nudi—nudi bananga bàànyì. Nudi bamanye mùdì bwalu anyi? Twánjààyi anu . . . Mufundu ngwòwò ewu muumvwile. Pòlò wàkamba ne: “Ndi neenu mukawu (Ekeleeziya Wendè's) mwikàle ne mukawu wà kùdi Nzambi, bwalu ndi munùbangìle.” Ki bwalu mbwòbù abu's, aci's ncìleeja bwalu. S'ki bwalu abu. “Bwalu ndi munùbangìle, munùbangìdile Kilisto, bu mushikankunde virgo.”

²³⁴ Mpindyewu, pìikalàbi ne cyôci aci cìvwa cilelela mu dituku adi, yéyè wàkamba...Bôbò, bantu abu bààkangambila, ne: “Yesu neàlwe kùdì wêwè, ne wêwè neùtùleejè kùdìYe,” bu mushikankùnde virgo. “Wêwè neulumbulwishiibwe ku Dìyì diwakabayiisha adi.” Nenku, tàngilàayi, pìikalàbi ne mèmè ndi nnuyiisha anu menemene cìvwa Pòlò muyiishe wendè ekeleeziya aci, kèndè kasumbu kôkò kabwelè, keetu pààkù nekabwele, bwalu tudi ne cintu anu cimwecimwe aci. Amen.

Twìnyikààyaaku mitu yetu mpindyewu patùdì twamba ne, “Nzambi akubeneshe” apa. Mpindyewu...?...mpaasata wetù munanga, Mwaneetu Neville. 

DITÈÈKIIBWA 2 LUA60-0518
(Adoption 2)

DILONDANGANA DYÀ MALONGESHA PA DITÈÈKIIBWA

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisâtù diloolo, mu matuku 18 a ngondo mwithânù, cidimu cya 1960, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org